

Ñtwum Lwen Ye Jân Kœ

Yesù ne ðyi wě ñwanni, à ðe tì ñzison

1 ¹Kwan se ðe lè ñgyô' wan ðunmi kife', ðe lè Ñzà' le' ti kwe. À ðe tòn bon lè Mvènnswæb mban, à ðe Mvènnswæb. ²À ðe bon lè Mvènnswæb lè ñgyô' wan ðunmi kife'. ³Be fœ ywum hwæn bon lè nun. Mvènnswæb fœ kân swum ndo', à shì ðe kwe. ⁴Mwum hwæn tã ñzison cinni cì shon, ñzison màzwùm si wě ñwanni se ta ðwum me' sannzi. ⁵Ñwanni ta ðwùm ke njimmi nun, son, njimmi cinni kan ñkimmô' lè nun njimnza' ñwanni màzwùm.

⁶Mwum ndo' ðenne nyě Mvènnswæb fyii, jin shon ðe le Jân. ⁷À kîn ðã nun ðyi shitàkwù, shitàkwù she ke nywi ñwanni, lè ðwum hwæn ke ñlim lè Yesù Kristò ke nyě le' se nun yě leli. ⁸Nun ne' ne ðe kân ñwanni, son, à kîn shitàkwù ðyi ke nywi ñwanni. ⁹Ñwanni màzwùm, son se ðyi she ñkæmñkæm. Ke mben ye son ðennâ ke ñgyô' wan, son se ta ðwum hwæn me' sannzi. ¹⁰Ñzà' le' màzwùm ðe ke cě ñgyô' wan nun. Mvènnswæb fœ ñgyô' wan bon lè nun, son, lan ñgyô' wan limme kân nun. ¹¹À kien ke cí ðwum byon, son, ðe yè kan nun. ¹²Kwo fe' li, byindo' ðe ye nun, ðe ke ñlim lè nun. Bon màzwùm, à wò bon mbyi le ðe ðe ðwen Mvènnswæb. ¹³Ñðun ye bon ðun ke læm ðwen Mvènnswæb nun, ðe ye kan bon wě tà she ðe ta ðwum ðe ñgyô' wan ye, shikì a ðe lè ñkimmô' mwum ndo', son, Mvènnswæb ne ci.

¹⁴Ñzà' le' màzwùm fyonne mwum wě ðwi', à kîn tòn ke nyinnim she' nun. Mvènnswæb kwàsâ kwènnzì nlim shon lè leñkæm shon ke nywi yon. 'Bwi' yennâ ñtwu yon, ñtwu ye Ce nyon Mvènnswæb fe nun, nun mwen mbo' ti ku' mbo' nyon. ¹⁵Jân ðyi shitàkwù shon, à ðunmi ðæmmì le: «Nun ne mún ðe leli ke nywi yon le: mwum ndo' tã kîn nyè yêm, à cinni ñtwu, à làn mún, ntwi' se ðe lè à ti mbyí lè ðe ye kife' mún.» ¹⁶Ke nlwinni ye nun ni ñlwinni lè kwènnzì nlim, ðwi' hwæn, à tà ðwi' floa yon fe ke moan zwêm. ¹⁷Mvènnswæb feâ ðwi' lwuà nyon fya' Môizè. Ti lè kwènnzì nlim shon, kònddi lè leñkæm shon, à kwàsâ yon ke nywi Yesù. ¹⁸Mwum ndo' yen kife' Mvènnswæb. Son, Mwen mbo' nyon nyě bon ta tòn bon lè nun, à sannzâ mbòkì ne Ce nyon tòn.

Shitàkwù se Jân Bâtisi ðyie ke nywi yon ne'

(Mt. 3.11-12; Mr. 1.1-8; Lk. 3.1-17)

19-20 A kien bèn nywɔ' mbo' ndo', mè ci-zwi' me Yuda bye ke Yèrusalèm, be fyii mè ci-mfe sàtikà' bon lè òkwìn bɔwum me Lèví, lè be kiin Jân cibbi le yà mwum ne ku' nyi? À ywome ñcibbi màzwùm li, à byinnɔ' kan le nun bǎ byi le' fyònnzi ɲwum, son, à yili le' ke swi' shan lè leŋkæm. Shitàkwù she nun ðyie be le: «Mùn ne ba mún **Kristò**, mwum ne Mvènnswæb yě fyii.» 21 Be cibbi lè nun le: «Ti wù, wù ni wen? Wù ne ðyie **Èlí**?» Jân fyònnzi lè bon le: «Ayi, mún ne ban.» Be kà kònnɔ' cibbi be lè nun le: «Wù ni ci-nleli ke ɲwum Mvènnswæb nun?» Jân fyònnzi le: «Ayi.» 22 Be kà shě lè nun le: «Shè le bwi', wù ni ku' wen? Ntwi' se a yili le bwi' ken bɔwum be fyii bwi' ñzà' le' ndo' shě be ke nywi ywù. Ti ku' wù ne', wù tà ku' shè le wù ni ku' wen?» 23 Jân kà fyònnzi lè bon le: «Mùn ni mwum ne Èzai, ci-nleli ke ɲwum Mvènnswæb nun lele ke nywi yon le:

“Mwum ndo' tǎ ðæmmi ke nlim kyɔ' le:

Dyilèni mbyi nyeli nye' zu.” »

24 Ke nyinnim bɔwum bye be fyii cǐ Jân, mè **Fàriziën** ndo' be kwe. 25 Be kà cibbi lè nun le: «Ke wù bǎ **Kristó|Kristò**, wù bǎ ku' wù **Èlí**, shiki wù be ku' wù ci-nleli ke ɲwum Mvènnswæb nun ni, yen se ci wù tǎ bɔwum jimnzi nun?» 26 Jân kà fyònnzi lè bon le: «Mún, mún tà bon jimnzi lè mlǎ', son, mwum ndo' ni ke nyinnim shin nun nyě byin limmi kan. 27 À tǎ kìn be nyè yêm, mún wòli kan ma kim mún kwemmi lè nun, lè mún sù mè ndu' mè diba' byon.» 28 Ywum màzwùm hwæn li lannze ke nsòn ye be be lon le Bètànî, ke ɲygin Jùrdën. Cìcì màzwùm se Jân be bɔwum jimnzi kwe.

Yesù ne ðyie mwen nzwumɲgan ne Mvènnswæb fyie

29 A kien bèn be shikpon màzwùm, Jân yen Yesù tǎ kìn cì shon, à shè le: «Ceèni fe' mwen nzwumɲgan ne Mvènnswæb fyii le nyi ni kiin byebbi lan ɲgyɔ' wan zùsi. 30 Nun ne mún lele ke nywi yon kwan se mún be le' le: “Mwum ndo' tǎ kìn be nyè yêm, à cinni ñtwu, à làn mún, ntwi' se be lè à ti mbyi lè be ye kife' mún.” 31 Mún, mún limme kǎn mún nun, son, mún kien bɔwum jimnzi lè mlǎ' lè mún ci bɔwum Izràél limmi nun.» 32-33 Jân kwùbtà' tì ñzà' le' ni be, à shè le: «Mún limme kàn mún nun, son, Mvènnswæb ne fyii mún lè mún kiin bɔwum jimnzi lè mlǎ', à shèe mún le: “Wù yě Mpùn Nsanmi yenni, à tǎ wai ke zwò, à kìn tòn ke nywi mwum ndo', mwum màzwùm ne ye bɔwum jimnzi lè Mpùn Nsanmi.” Mún yennà Mpùn Nsanmi wai ke zwò wě mwen pyi', à kìn tòn ke nywi yon. 34 Ke nyen ye mún yennà ywum màzwùm hwæn li, mún tǎ shitàkwù ðyie le mwum màzwùm ni Mwen Mvènnswæb.»

Bwesɔ' bye Yesù sete cinni

35 Shikpon fɔ', Jân be tì kwe lè kì-bí bwesɔ' byon. 36 À yen Yesù tǎ làn, à shè lè bon le: «Ceèni fe' mwen nzwumɲgan ne Mvènnswæb fyii.» 37 Kì-bí

ƒwɛsɔ' Jân ywɔme swum se nun be le' li, be donnni nun, be ɔwɔn Yesũ nyè. ³⁸Yesũ yònnzi me', à yen ƒwɛsɔ' ɓi Jân ɓi ta nun ɔwɔn nyè, à kà cibbi lè bon le: «Yen se ɓyin yili?» Be fyonnzi lè nun le: «Wù tã tòn fen, Ræbbi?» (Sù Ræbbi ni lè ñlìsà!) ³⁹À fyònnzi lè bon le: «Klènni, ɓyin yen cìcì màzwùm.» Li, be wai kèn, be ken ɓèn, be yen cě nun be tòn nun, be lannzi kwæbbi màzwùm kwe bon lè bon. Be lè a ti kènni lànɔmè nywɔ' nyí kwæbbi nun.

⁴⁰Ke nyinnim ɓwum ɓi ɓi bye ywɔe ñzæ' le' Jân, be ɔwɔn ti Yesù ke nyè, jin nyè m̀bɔ' be le Àndrê. Ìgyinni Simôn Piêr ne be. ⁴¹Àndrê sete kèn ñgyinni nyon Simôn cinni, à shè lè nun le: «Bwi' cinnâ ɓwi' **Kristò**, mwum ne M̀vènnswæb fyii.» ⁴²À twe' Simôn, à kèn lè nun cì Yesù. Yesù yenme Simôn, à shè lè nun le: «Wù ni Simôn mwen Jân. Mùn kèâ wù jin she ɔ' le Sefà.» Ke le' she ɔ' nun, be ta ti son lon le Piêr. (Sù jin màzwùm ni le mble.)

⁴³Shikpon she ɔ', Yesù yile nun ken ke ñgyɔ' Gàlilè nun. À cinni Filipò, à shè lè nun le: «Dwoin m̀n nyè.» ⁴⁴Filipò be mwum nyè wai ke Bètsaidà. À be myi ɔ' bon lè Àndrê lè ti Piêr. ⁴⁵Ke nyè yi, Filipò cinni Nàtànàèl, à shè lè nun le: «Mwum ne Mòizè lele ke nywi yon ke ɔ̀wà me lwuà nun, mè ci-nlèli ke ñwum M̀vènnswæb nun konndi ti ku' leli ke nywi yon, ɓwi' cinnâ ɓwi' nun ɔ̀yè. Mwum màzwùm ni Yesù, mwum Nàzàrè', mwen Jòsè'.»

⁴⁶Nàtànàèl ywɔme li, à shè lè nun le: «Swum lwen ndɔ' ye ɓwi' kwain ɔ̀yè ke Nàzàrè'?» Filipò fyònnzi lè nun le: «Klìn, wù yen lè zè' swù.»

⁴⁷Kwan se Yesù yen Nàtànàèl tã kìn cì shon, à ɔ̀nmi leli mbyí nywi yon le: «Seansean nun ne' mwum Ìzràèl ne nyè. Swum wèsi ndɔ' ɓa nun nywi.» ⁴⁸Nàtànàèl ywɔme li, à cibbi lè nun le: «Wù limmi m̀n fen?» Yesù fyònnzi lè nun le: «Lè Filipò kà loin wù ke ndù' ñgæ' kwùmmvu, ɓi lè m̀n yennâ wù.»

⁴⁹Nàtànàèl kà shè lè nun le: «Ñlìsà', lè leŋkàm, wù ni Mwen M̀vènnswæb, wù ni m̀vèn Ìzràèl.» ⁵⁰Yesù kà shè lè nun le: «Ntwi' se m̀n le' le m̀n yenni wù ke ndù' kwùmmvu, son se wù yili nun? Wù yen kife' swum ndɔ', wù yè ywum klwɔkea ye lan yi ton ye yenni.» ⁵¹À kà kònni ti le' be le: «Mùn tà ɓyin shè lè leŋkàm le: 'Byin kà yenkà' ɔ̀b lwon lè mè cikpu' M̀vènnswæb ta nàn lè be ta kyìli ke nywi **Mwen Mwum.**»

Hilea zwimbyi' se Yesù cìe

2 ¹Ìgyin leân be ɓi, be kpæmme ɔ̀m ndɔ' ke myi ye be ta lon le Kanà, ye be ke ñgyɔ' Gàlilè nun. Mon Yesù be lè à ti kwe. ²Be loin ti ku' Yesù bon lè ƒwɛsɔ' ɓyon lè ɓyi ɓi kiin kwe cìcì ɔ̀m màzwùm.

³A kien ɓèn kwan se ɓæ' mlɔe kwe cìcì ɔ̀m, mon Yesù kèn Yesù shè le ɓæ' ɓa tí. ⁴Yesù ywɔme li, à shè lè mon nyon le: «Mon nyèm, wù ne woli wù shè m̀n swum se m̀n yè cì? Kwan shèm wòli kife'!» ⁵Mon nyon ywɔme li, à shè lè mè ci-she le: «Cìèni swum se nun yè ɓyin shè.»

⁶Kwe nye màzwùm nun, mè ñgwu ndo' be kwe bon fyuru. Mè Yudà be mlá' ké ke me ñgwu màzwùm nun lè be bosa' nywi nun kwan se bi lè be ye bě' nyenswàb shan cí. Ñgwu mbò' be twe' lànme letà mla' ndu'. ⁷Yesù shè lè mè ci-she màzwùm le: «Lwinnzèni mè ñgwu bi lè mlá'.» Mè ci-she lwinnzá bon lwèn han, be pwipwè'.

⁸Yesù kà shě lè bon le: «Jene lwoèni kwæ', byin ken fe lè mwum nyě cinni ñkimmò' lè ñgwìn. Be lwome li, be ken nun fe. ⁹Mwum màzwùm bweb mlá' ye bi lè ye fyonná bə'. À limme kǎn cě bǎ' màzwùm wai nun, son, mè ci-she bye lwəe mlá' be limme. À loin ci-dəm, ¹⁰à shè lè nun le: “Cici hwæn se be ta ñgwìn kèa, bwum hwæn ta seti bwum be be loin bǎ' lwèn fe, kwan se a ye be lè be ti ywi nún, wǔ kà fe bon she sǎbbi. Ti lè wù, wù lwəsi wù she lwèn be han a kin bèn jene.” »

¹¹Hilea se si hilea she zwimbyi' se Yesù ciè. À ciè son ke Kanà ke ñgyò' Gàlilè nun. Ke ncì ye nun ciè hilea màzwùm, à lisea ñtwu yon, bwesò' byon dunmi zwùm tɛli lè nun.

¹²Ke nyě yi, à wai kèn ke Kàpèrnàò bon lè mon nyon, lè mè ñgyinni byon, kòndni lè bwesò' byon, son, be cì kan kwe ñgyin mèan.

Yesù ke nyenswàb ndwun

(Mt. 21.12-13; Mr. 11.15-17; Lk. 19.45-46)

¹³Be lè ñgwìn mè Yudà nyě be ta lon le **Ñgwìn-ñkwan-Èjìb** ti kwukwǎ', li, Yesù kèn ke Yèrusalèm. ¹⁴À bèn kwe, à kèn nyenswàb ndwun, à cinni bwum bye ta mè nje kyí, mè pò', lè mè pyì' nun. À cinni tì mè ci-ñkwebsi lòn kwe nji' ñtònmi ke me tâblè byan zwem. ¹⁵À yenme bon li, à twon ñgwà' ndo' lè ñdu', à kwannzi bon lè mè nyàm byan nun hwæn. À nywæsa' lòn yan, à twotò' mè tâblè byan ñgyò', ¹⁶à shè lè mè ci-ñkyì me pyì' le: «Pǎlèni mè pyì' bi ke cě, ba byin twe' nye Ce nyèm wě pà' lwùmwù.»

¹⁷Kwan se bwesò' byon yenme li, be bun ñzǎ' le' ye be kœ ke dèwǎ Mvènnswàb nun le: «O, Mvènnswàb, ñyili ye mùn kè ke nye nywù nun ta mun ñlim twènni ke zwum wě win.»

¹⁸Mè ci-zwi' me Yudà yenme swum se nun ciè nyenswàb li, be cibbi lè nun le: «Yǎ hilea se wù yě cì bǎ se lisà' bwi' le Mvènnswàb ne fe wù ñkimmò' ncì yi?» ¹⁹Yesù kà fyònnzi lè bon le: «Bwùmmòèni nyenswàb ne, mùn yě nun bwemmi be ke nyě ñgyin lè nun.» ²⁰Mè ci-zwi' me Yudà bi ywome li, be kà fyònnzi ku' be lè nun le: «Be bwemme nyenswàb ne ke dŵùm mwum nyî blàn fyuru nun. Son ti wǔ, wù le' le wù ni ye nun bwemmi be ke ñgyin lè nun?»

²¹Son, nyenswàb ne Yesù be le' be kwæ' nywi shon ne'. ²²Kwan se à yimne ywi, bwesò' byon kà bŷn swum se nun lele, be ke mwù ke nzǎ' le' ye be kœ ke dèwǎ Mvènnswàb nun, kòndni lè ñzǎ' le' ye Yesù shèe bon yi.

Yesù limmi swum se ðyi ke nlim mwum nun

²³Ke kwan se Yesù be ke Yèrusalèm lè Ìḡgwìn-ḡkwan-Èjìb wòlime, à be yì hilea cì. Bwum mèan bε be kwe ðunmi zwùm tɛli lè nun ke nyen ye bon yenne yì hilea màzwùm. ²⁴Son, Yesù be kǎn zwùm tɛli lè bon, ntwi' se nun limme mè mbàkà' nyan hwæn. ²⁵À be kǎn bònḡgà' lε be ðyi shitàkwù ke nywi mwum ndò', ke ntwi' se nun limmi swum se ðyi ke nlim mwum nun.

Yesù bon lè Nikòdêm

3 ¹Mwum ndò' be kwe, jin shon be lε Nikòdêm. À be mwum nyě ke ḡkwìn mε Fàrizièn nun, à be tì ci-zwi' mè Yudà ndò'. ²Mwum màzwùm kien nywò' mbò' ndò' kpon nun cì Yesù, à shè lè nun le: «Nìsà', bwi' limmi lε Mvènnswæb fyii wù le wù ni kin bwi' ywum lisea, ntwi' se mwum ndò' wòli kan kim à ci hilea wě tà she wù tǎ cì, à Mvènnswæb shi bε lè nun.» ³Yesù fyònnzi lè nun le: «Mùn tà wu shě lè leḡkǎm le mwum ndò' wòli kan à ðun ke ywò' Mvènnswæb nun, bε shi nun ye kǎmmi bí.» ⁴Nikòdêm kà cibbi lè nun le: «Beshe mwum ti mwumḡkǎm, à yě cì le bε kà ye tì nun kǎmmi she me mbì? À yě tì ðun be zwum mon nyon, bε ye tì nun be?»

⁵Yesù kà fyònnzi lè nun le: «Mùn tà wu shě lè leḡkǎm le mwum ndò' wòli kan à ðun ke ywò' Mvènnswæb nun bε shi nun ye lè mlá', kònnḡ lè ḡkimmò' Mpùn Mvènnswæb. ⁶Mwen ne mwum ye ni ku' wě mwum, mwum ne bε ye lè ḡkimmò' Mpùn Nsanmi ni ku' ñlwinni lè Mpùn Nsanmi. ⁷Ba shìmmea ci wù lè ñshè ye mùn shè wu le se yili le bε ye wù ye nyě mè mbì. ⁸Mùn twe' fe' mbòkì nywi mpùn. Mpùn ta ðwi wě tà she yon yili, wù ywò' ḡgìnnò' ye yon ta cì, son, wù limmi kan cì yon wai nun, shikì wù limmi cě yon kenme. Li ne se ta lànnzi ke nywi mwum nyě bε ye lè ḡkimmò' Mpùn Nsanmi.»

⁹Nikòdêm ywòme li, à kà cibbi lè nun le: «Swum màzwùm ye ku' yili lànnzi le?» ¹⁰Yesù kà fyònnzi bε lè nun le: «Wù ni kǎn ñlisà' ndwun ke ḡkwìn bɔwum Izràèl nun? Ti, a ci le, wù limmi kan ywum màzwùm nun? ¹¹Mùn tà wu shě lè leḡkǎm le bwi' ta leli ke nywi ywum ye bwi' limmi, bwi' konndì shitàkwù ðyi ke nywi ywum ye bwi' yenná lè ze', son, byin yili kan shitàkwù she'. ¹²Byin tà ka ñlim ké ke nzǎ' le' ye mùn tà byin shě ke nywi ywum ye ta lànnzi ke ḡgyó' wan. Ke kǎmmi nyi nun, byin ye ñlim ké ke nywi ywum ye ta lànnzi ke ðeb?»

¹³«Mwum ndò' nàn kife' ðeb a shi ku' bε **Mwen Mwum** nyě kyili ḡwai ye ke ðeb. ¹⁴Kwan se Mòizè bε ke nlim kyo', à sheli pa' ḡwum ndò', à fò' nywun lè yon. Be nyě yi, à yili nywun màzwùm ke ḡgæ' zwem, à wasi nun zwò. Mbanmbò' ku', bε ye ku' **Mwen Mwum** wasi li, ¹⁵lè mwum ne yě zwùm tɛli lè nun, à yě ñzison ðwùmðwùm cinni. ¹⁶À si li ntwi', ke

nyili ye Mvènnswæb yili ngyô' wan ñzwanzwò', li ne ci à fyii Mwen mbo' ti ku' mbo' nyon bã mwum ne yě ñlim kě lè nun lækì bwu, son, bã nun cinni ñzison d'wùmdwùm. ¹⁷Mvènnswæb fyii kǎn Mwen nyon cě ngyô' wan lè nyí ni kiin lan ngyô' wan vènè' yennzi, son, à fyii nun lè be fyôn swæ' ke nyè yon.

¹⁸«Mwum ne kèà ñlim ke nywi Mwen Mvènnswæb, à bà tí làn ke me kè' nun, son, mwum ne kè kan ñlim ke nywi yon, mè kè' bænnâ nun, ntwi' se ǎ kè kan ñlim ke nywi Mwen mbo' Mvènnswæb nun. ¹⁹Mwù me kè' màzwùm yi le ñwannì benne ngyô' wan, son, lan ngyô' wan yili tòn she njimmi nun, a lan she be ye tòn ke ñwannì nun, ntwi' se mè she nyan be mbyibba seansean. ²⁰Byin limmi lwen le mwum ne tǎ byebbi cí, à tǎ ñwannì byinnɔa nún, ǎ kèn kan ke cìcì se ñwannì si kwe, ntwi' se yi ta nun kwènni le byebbi nyon yě kwàli ke pisean. ²¹Son, ti lè mwum ne tǎ swum se Mvènnswæb yili cí, à tǎ kèn ke ñwannì nun lè bwum hwæn pæ' yen seansean le à tǎ ñwum Mvènnswæb ywòli ke me she nyon nun hwæn.»

Yesù bon lè Jân

²²Ke nyě yi, Yesù bon lè bwesò' byon kennô' ke kpinnzò' ngyò' se be ta lon le Jùdê. À lannzi kwan ndò' kwe lè bon, lè à tǎ bwum jimnzi. ²³Jân be ku' làn nyon bwum jimnzi be ke Ènôn. Myi màzwùm be kwukwæ' lè Sàlím. À be bwum jimnzi kwe, ntwi' se mlǎ' be kwe mèan. Bwum be kǐn cì shon lè à tǎ bon jimnzi. ²⁴(Be lè be kè kife' Jân ke nye njè.)

²⁵Li, ke nyinnim bwesò' Jân nun, byindo' dùnmi ngyi kwùmmi lè mwum Yudà ndò' ke nywi mbòkì ne bon ta nywi bosi ke bè' nyenswæb nyan nun. ²⁶Be nyě yi, be kennô' ke Jân, be cibbi lè nun le: «Ñlisà', wù tà tí ku' fe' mwum nyě byin be byin lè nun ke ngyin Jùrdên ni bǔn? Nyě wù kònnɔdì tí ku' bwi' njè nyon shě ni? Ywò' fe', à ti bwum jimnzi nun, bwum hwæn ti su' kèn ke cì shon. Wù yen ke le' màzwùm le?»

²⁷Jân ywome li, ǎ kà fyònnzi be lè bon le: «Mwum ndò' wòli kan kim à cinni swum ndò' beshe Mvènnswæb ne shi nun fe. ²⁸Byin ne', byin woli kim byin ðyi shitàkwù le mún lele le mún ne ba mun **Kristò**, mwum ne Mvènnswæb fyii, son, Mvènnswæb sete mún fyii ke swiswi' shon. ²⁹Mwum ne be lannzi mlib hwù cì shon, nun ne ðyi ku' lè mlib màzwùm. Son, ti lè ñwè ci-ðæm, à tǎ ðyi moan ke yon lè nun ywò' ñkwu yon. Kwan se nun tǎ ñkwu yon ywò, ñlim ta nun lwukea zwum ñzwanzwò'. Li, mún lwinnâ jene lè ñdàli. ³⁰Ñdikà' à yæki ñtwu cinni, mún, mún fyòn ku' mún be ngyò'.

³¹«Mwum ne wai ke ðeb ne ðyi swiswi' bwum hwæn. Ti lè nyě cě ngyô' wan, à su' ku' ðin mwum ne cě ngyô' wan. Ñzǎ' le' ye nun tǎ leli, a su' ywum ngyô' wan yenni. Mwum ne wai ðeb ni swiswi' bwum hwæn. ³²À tǎ shitàkwù ðyi ke nywi ywum ye nun yennâ, lè ye nun ywòâ kwe, kwo fe' li,

mwum ndo' tà ka shìtàkwù shon yili. ³³Mwum ne tà shìtàkwù shon yili, à yilâ Mvènnswæb ñgwòn. ³⁴Mwum ne Mvènnswæb fyiâ tà ku' ñzǎ' le' yon shě, ntwi' se Mvènnswæb tà nun lwinnzi lè Mpùn Nsanmi nyon. ³⁵Ce nye' Mvènnswæb tă Mwen nyon yili, à feâ nun ywum hwæn pæ' fya'. ³⁶Mwum nyě tă ñlim kě nywi mwen Mvènnswæb cinnâ ñzison d̀wùmd̀wùm. Ti lè mwum nyě tă ñwum yon fyinnzi, à bǎ ñzison d̀wùmd̀wùm màzwùm cinni, son, nyeni nlim Mvènnswæb ta su' lwæb ke nywi yon.»

Yesù bon lè ñlib ne wai ke Sàmàrí

4 ¹⁻³Be lè mè Fàriziën ywâ le Yesù be ðwesò' cinni mèan lè à tà tí bon jimnzi, ðwesò' byon lan bye Jân. (Lè lèḅkǎm Yesù ne be kǎn ðwum jimnzi, ðwesò' byon be be bon jimnzi.) Ke ñlimmì ye Yesù limme le be ywâ li, à wa' ñgyò' Jùdê, à kèn be ñgyò' Gàlilè nun. ⁴Lè ǎ kà kèn bèn ñgyò' Gàlilè nun, se cibbi le à fyiò' ke ñgyò' Sàmàrí nun.

⁵Ke mfyi ye nun fyie Sàmàrí, à kien bèn ke moan myi ndo' ye be ta lon le Sishâr ye be kwukwæ' lè ndem ne Yàkôb fee lè mwen nyon Jòsê'. ⁶Ke moan myi màzwùm, swu' mla' Yàkôb be kwe. Yesù be lè à hwummâ lè kèn. Li, à tòn kwe nji' moan swu' mla' màzwùm. Be lè nywo' mwum se ti.

⁷Ñlib Sàmàrí ndo' wae lè nun kiin mlǎ' lwo. Yesù yenme nun, à shè lè nun le: «Fe mun mlǎ', m̀n nwi.» ⁸(Be lè ðwesò' byon kennâ ke ñlim myi lè bon hwinnì ywum ji.) ⁹Ñlib Sàmàrí ni kà shě lè Yesù le: «Wù bǎ mwum Yudǎ? Se ci le wù cibbi mlǎ' nwi lè m̀n ne mwum Sàmàrí?» (Mli màzwùm leli li ntwi' se ðwum Yudǎ be kǎn lwuni bon lè ðwum Sàmàrí.)

¹⁰Yesù fyònnzi lè nun le: «Wù limmè swum se Mvènnswæb tă fe, wù limmì tí ku' mwum ne tà wu mlǎ' nwi cibbi, wù ne setè nun cibbi, ǎ feè wù mlǎ' ye ta ñzison fe.»

¹¹Ñlib ni shè lè nun le: «Mwumḅkǎm, wù bǎ lè lwùḅḅgan ntè' mla' fya', li ma swu' si jimmi, wù yě mlǎ' ñzison màzwùm cinni fen? ¹²Mbibe nye' Yàkôb ne fee ðwi' swu' mla' se. Nun ne' nwie mlǎ' màzwùm lè ðwum byon nun hwæn, mè nyàm byon konndi nwi. Wù ne ðyi ñdwun, wù làn nun?» ¹³Yesù fyònnzi lè nun le: «Mwum ne tă mlǎ' ye nwi, ñjè mlǎ' yě tí nun kònni kwènni be. ¹⁴Son, ti lè mwum ne yě mlǎ' ye m̀n yě nun fe nwi, ñjè mlǎ' bǎ tí nun kwènni nywo' ndo'. Ntwi' se mlǎ' ye m̀n yě nun fe ye nun be zwum wě yon mlǎ' she ta ñzison d̀wùmd̀wùm fe.»

¹⁵Ñlib ni shè lè nun le: «Mwumḅkǎm, fe le m̀n mlǎ' màzwùm, lè ñjè mlǎ' làkì tí m̀n kwènni, shikì m̀n kìn tí mlǎ' lwo cě.» ¹⁶Yesù shè lè nun le: «Kènnè, wù loin ywù, byin kiin cě byin lè nun.» ¹⁷⁻¹⁸Ñlib ni fyònnzi lè nun le: «M̀n cinni kan mun ñd̀wèb.» Yesù ywome li, à shè lè nun le: «Wù ðwèli kan, wù le' lèḅkǎm le wù cinni kan ñd̀wèb, ntwi' se be lè wù sheâ mè d̀wèb shæn. Ti lè nyě byin ton jene byin lè nun ni, ywù ne ban.»

¹⁹Ke nyě yi, ñlib ni kà shě lè nun le: «Mwumḅkǎm, m̀n yen le wù ni wě ci-sheli. ²⁰Mè mbibe bye' be Mvènnswæb d̀ca ke kpa' ne zwêm. Ti

lè byin, mè Yudà, byin le' le cìcì ndɔa Mvènnswàèb suku' ke Yèrusàlèm.»
 21 Yesù fyònnzi be lè nun le: «Dyim mè yib, ywɔ' fe' swum se mún yě wù shě se. Kwan ndɔ' kà wòlàkà', byin ba tí su' Ce nye' Mvènnswàèb ɔa ke cě kpa' ne zwêm, shikì a be ku' ke Yèrusàlèm. 22 Byin, lan Sàmàrì, byin limmi kan mwum ne byin ta ɔa. Ti lè bwi', mè Yudà, bwi' limmi mwum ne bwi' ta ɔa, ntwi' se mwum ne yě bwum swæti yě wai ke mvu bwum me Yudà nun. 23 Son, kwan ndɔ' ta kìn, se bennâ ma nùn, she mè ci-ndɔa Mvènnswàèb bye òkàmòkàm ye nun ɔa lè òlim fɔ' ke mbyi lèrkàm nun, ntwi' se Ce nye' Mvènnswàèb yili bwum be ta nun ɔa li. 24 Mvènnswàèb ni m̀pùn, bwum be ta nun ɔa, se yili le be ɔa nun lè òlim fɔ' ke mbyi lèrkàm nun.» 25 M̀lib ni shè lè Yesù le: «Mùn limmi le **Kristò** yě bèn. Kwan se nun ywìme bèn, à yě bwi' ywum hwæn pæ' sannzi.» 26 Yesù shè lè nun le: «Mùn ne tã lèli ne, mún ne ɔyi mwum màzwùm.»

27 Ke kwan màzwùm nun, bwesɔ' Yesù fyoin. Shìmmea ci bon lè nyen ye bon yenne Yesù lè à tã lèli lè m̀lib. Kwo fe' li, mwum ndɔ' cibbi kan nun le: «Yen se wu tã cibbi fya' yon? Wù tã lèli lè nun lè ntwi' yen?»

28 M̀lib ni ɔonzi ògwu mlâ' nyon kwe, à fyòn be myi, à kèn bwum shě le: 29 «Kìènnì, byin ce fe' mwum ndɔ' ne shè mún ywum hwæn ye mún ciâ. Kè shindɔ' **Kristò** ne?» 30 Li, bwum wai myi, be kiin cí Yesù.

31 Ke kwan màzwùm nun, bwesɔ' Yesù loin nun cí ji, be she lè nun le: «Nìsà', kiin, wù mgbati fe' ògwum.» 32 Son, Yesù kà fyònnzi lè bon le: «Mùn cinni ji ndɔ' nyě mún tã ji, nyě byin limmi kan.» 33 Ke nywɔ' ye bwesɔ' byon ywɔme li, be ɔunmi leli nyinnim shan nun le: «Mwum ndɔ' kien nun ji fe be?» 34 Yesù ywɔme li, à shè lè bon le: «Ji nyèm ni le mún lwinnzi nyili mwum ne fyii mún lè mún mlɔ' tì ku' she se nun fi mún fya' le mún ci son. 35 Byin, byin ta ka lèli le: “Kwan mfyàèb ywum ji nzwonme mè nywi' nyí?” Son, mún, mún tã byin shě le: Wasèni fe' me', byin cèɔ' ndem nun. Ywum ji kimmâ nùn, fyàèb fyàèbbi ne ti. 36 Mwum ne tã ywum ɔyim fyàèbbi, à ti ɔèbbi nyon yě, à tã ywum ɔyim swɔsi, ye ye tòn ɔwùmɔwùm. Li, mwum ne tã ywum ɔyim myili, lè nyě tã fyàèb nun, be ta òdàli ywo m̀banmban. 37 Ìkæn le' ndɔ' lèli le: “Mwum ndɔ' tã myi', nyě m̀bɔ' ndɔ' fyàèb nun.” Ìkæn le' màzwùm yi lèrkàm. 38 Mùn fyie byin le byin ken ywum ɔyim fyàèbbi ke ndem ne byin ɔyimme kàn. Be lè bwum ndɔ' ɔyimmâ mbyi nùn, byin seà tì ku' nyě she shan.»

39 M̀an bwum Sàmàrì be be kwe ke myi màzwùm nun, be ke òlim lè Yesù, ntwi' se m̀lib ni shèe bon le: «À shèâ mún ywum hwæn ye mún ciâ.» 40 Li ne ci, kwan se bwum Sàmàrì kin ke ci shon, be swulea nun le nyí ni ton fe' lè bon. Yesù nden kwe lè bon ògyìn bí. 41 Bwum be be òlim kě lè nun yæke m̀an nùn, ntwi' swum se nun ne' be lèli. 42 Bwum màzwùm she lè m̀lib ni le: «Jene, bwi' su' kan òlim kě ntwi' òzà' le' ne wù shí bwi' ni, son, bwi' ne' bwi' ywɔâ lè mè ywi' bye', bwi' limmâ lè lèrkàm le mwum màzwùm ni Ci-nswæti ògyɔ' wan.»

Ëkimnzi ye Yesù kimnze mwen mwum ndwun ndò'

⁴³Ke nyè ye Yesù nòen kwe myi màzwùm ñgyìn bí, à wa' kwe, à yè mbyi ñgyo' Gàlilé. ⁴⁴Ntwi' se nun nɛ' shèe le: «Be tà ka ci-ntwum mwumnzi ke ndù' nsòn yon.» ⁴⁵Lan Gàlilé kenne ñgwìn-ñkwan-Èjib ji ke Yèrusàlèm bon lè mè Yesù mban. Ke kwe, be yenne ywum ye Yesù cie. Li, kwan se nun bèn ke ñgyo' Gàlilé nun, be ye nun lwen.

⁴⁶À fyòin be ke ñgyo' Gàlilé, à kèn ke myi ye be ta lon le Kanà, cici se nun kwèbse mlá', ye fyonnì bàè'. Mwum ndwun ndò' ne me ñgyo' nun be kwe, à be lè mwen ne ñdweb ke Kàpèrnàò, ñgwènnwèn. ⁴⁷Kwan se nun ywò' le Yesù weâ ke Jùdè, à ti ke Gàlilé, à kèn kwe cí Yesù, à ñunmi nun pyitea le nyí ni kiin ke Kàpèrnàò, lè nyí ni kimnzi nun mwen nyon ne ywime. ⁴⁸Yesù shè lè nun le: «Beshe byin shi hilea yenni lè ywum ñgwulea, be byin, byin kè kan ñlim?» ⁴⁹Mwum tòn ni tá ló' Yesù febbi le nyí ni kiin, bon ken lè mwen nyon ni làkì ywi. ⁵⁰Yesù shè lè nun le: «Fyòn be, mwen nywù kimmòâ.» Mwum tòn ni kè mwù lè ñzàè' le' ne Yesù le' ni, à wa' kèn. ⁵¹Kwan se be lè à ti mbyi ñwòn nyon yè be, à cinni mè ci-she byon mbyi nun, be kiàn nun bònngèa. Be she nun le: «Mwen nywù kimmòâ be.» ⁵²À cibbi bon le ñpùn ni ñunmi mwen nyon fyii nywi yá kwan? Bon le: se be ñún, lè nywò' ñbò' nyè nywò'-mwum, mbèb nyí mlò'. ⁵³Mwum tòn ni kèn yen le kwan màzwùm se Yesù shèe ku' nun ñún le: «Mwen nywù kimmòâ.» Mwum tòn ni lè ñwòn nyon nun hwæn, be te' zwùm lè Yesù.

⁵⁴Kwan se Yesù wai Jùdè, à fyòn be ke Gàlilé, ke kwan si nun, hilea she me mbi se nun cie kwe, son se shi.

Ëkimnzi ye Yesù kimnze ñlòñlò' ndò'

5 ¹Ke nyè yi, mè Yudà cinne ñgwìn ndò' ke Yèrusàlèm. Yesù kènnò' ku' kwe. ²Ke kwe Yèrusàlèm, moan ñwum ñka' ye be be lon le ñwum nye me pò', yon mla' ndò' be kwe. Ke moan yon mla' màzwùm, mè pà' be kwe bon shæn. Be be cici màzwùm lon ke le' Èbrù nun le Bètzatà. ³Ke me pà' màzwùm ñji, mè ñgwènnwèn mèan ndò' be kwe nònngèa, mè ci-bwubè, mè ñyemñyem, lè mè ñlòñlò' be kwe. (Be be bònngà' le mlá' yon màzwùm funnzi. ⁴Ntwi' se cikpu' Mvènnswèb ndò' be kyilà' ñwai ye ñeb, lè à tá kìn mlá' yi funnzi. Kwan se nun funnzà mlá', ñgwènnwèn nyè zwimbyi' ne setà ñun ke yon màzwùm nun kimmò', kwo fe' ñgwènnwèn shon be fe' le.) ⁵Mwum ndò' be ku' kwe nyè nòân ke ñgwènnwèn nun ñwùm mwum lè blàn ñini. ⁶Kwan se Yesù yenne nun lè à ni ke ñji ñnònmi, à limmì le nyí ni nòân ke ñgwènnwèn nun kwan làbbi, à cibbi lè nun le: «Wù yili le ñgwènnwèn swù kimmò'?» ⁷Mwum màzwùm kà fyònnzi lè nun le: «Mwumñkàm, mñ cinni kan mwum ne yè mùn sheli, à ñunni mùn yon mla' nun kwan se mlá' ta funnzi. Kwan se mùn tá shè

mùn dúôn ke mla' nun, nyě mbo' ndo' ne seti dun mbyi.» ⁸Yesù shè lè nun le: «Wa' zwô, wù hwe' kè swû, wù kèn.» ⁹Ke fya' zwem ñnywèn, mwum tòn ni kimmò', à sheli kè shon, à wa' kèn.

Ìjgyìn mè yìnni mè Yudà ne be. ¹⁰Li ne ci, mè ci-zwi' me Yudà she lè mwum ne Yesù kimnze ni le: «Ìjgyìn mè yìnni ne kăn? Lwuà nye' yili le wù she kè swû dyě?» ¹¹À kà fyònnzi be lè bon le: «Mwum ne kimnzi mùn shí mùn le: “Sheli kè swû, wù wa' kèn.” »

¹²Be kà cibbi lè nun le: «Yă mwum ne shí le: “Sheli kè swû, wù wa' kèn?”» ¹³Son, mwum tòn ni limmi kan mwum ne kimnze nun, ntwi' se, she ðwum be kwe mèan si, Yesù kènne nun.

¹⁴Kwan læb kwæ', Yesù kènne nun cinni be nyenswæb ndwun, à shè lè nun le: «Ce fe' she wù kimmôâ jene. Ba wù cì tì byebbi be lè wù lækì vènè' yæki yenni.» ¹⁵Kwan se mwum ni ywo' li, à kèn mè Yudà shě le Yesù ni ne kimnze nun. ¹⁶Li ne ci mè Yudà ðunmi mbyi kæbbi lè be yennzi Yesù vènè', ntwi' se nywo' mè yìnni nyan ne nun cìe she màzwùm. ¹⁷Son, Yesù kà fyònnzi lè bon le: «Ce nyèm tá she cí kwan mèan hwæn, se yili le mùn ci ku' she li.»

¹⁸Kwan se mè Yudà ywo' ñzæ' le' ni, be yæki mbyi fîsi kæbbi, lè be wu Yesù. A sue kăn ntwi' se nun gwànnze lwuà ñgyìn mè yìnni nyan, son, ntwi' à kònnde le' le Mvènnswæb ni Ce nyon. Li, à kènne mwù wòsi lè Mvènnswæb mban.

Ìjkimmò' ye Mwen Mvènnswæb cinni

¹⁹Li ne ci, Yesù wèlì tì ñwum be, à shè le: «Mùn tà byin shě lè leŋkæm le, Mwen tà ka swum ndo' cí lè mwù yon, son, à tá Ce nyon kònnzea. Swum se Ce nyon tá cì, son se nun tà ku' cì. ²⁰Ntwi' se Ce yili Mwen nyon, à tà nun swum se nun tá cì lè nun ne' lisea hwæn. À yě tì nun ywum cí ye ðin ndo' lisea, ye ðyi klwókea, ye lan yi ton ye. Kwan se byin ye yon yenni, ye ye byin shimmea cí. ²¹Ntwi' ñyìmnzi ye Ce nyèm tá ðwum yìmnzi ke ywi nun, à fe bon ñzison be, mbanmbo' ku', mñ, Mwen nyon, mùn tà ku' ñzison fe lè ðwum be mùn yili ñfe. ²²Ce nyèm tà ka mwum ndo' mè kàè' lànnzi, son, à fe ñkimmò' nlànnzi me kàè' hwæn ke fya' yêm, mùn ne Mwen nyon. ²³À cì li lè mwum hwæn mwumnzi ku' Mwen wě tà she be ta ku' Ce nyon mwumnzi. Mwum ne tà ka Mwen mwumnzi, à tà ka ku' Ce nyon ne fyii nun mwumnzi.

²⁴«Mùn tà byin shě lè leŋkæm le, mwum ne tá ñzæ' le' yêm ywo, à kè ñlim lè mwum ne fyii mùn, à cinnâ ñzison ðwùmðwùm, mè kàè' ba tí nun bænni; à nywælâ ke ywi nun, à ðun ke nzison nun. ²⁵Mùn tà byin shě lè leŋkæm le, kwan ndo' ta kìn, se bènnâ ma jene nùn, she ðwum bye ba lè me' ye ñkwu Mwen Mvènnswæb ywo. Ke nyě nywo' ye be ye yon ywo, be ye ñzison cinni. ²⁶Mbòkì ne Ce nyèm cinni ñkimmò' le nun fe ñzison, mbanmbo' ku', à feâ ku' mùn ne Mwen nyon ñkimmò' màzwùm. ²⁷À feâ

tì mún mbyi nlànnzi ßwum mè kàè', ntwi' se mún ne ðyi **Mwen Mwum**.
 28 Ba le' si ci ßyin shìmmèa, ntwi' se kwan ndo' ye ßèn she ßwum ywi ße
 ße gwummâ ke me mbyù' ßyan nun ye ñkwu yon ywo, 29 ße kwain ke me
 mbyù' nun. 'Bwum ßye ße lwen cǐ, ße ye ywi yìmni, lè ße cinni ñzison
 ðwùmðwùm. Ti lè ßwum ßye ße ßyebbi cǐ, ße ye làn nyan ywi yìmni, ße
 lan ke vènè' nun ke nyè kyitàè'.»

Ywum ye lisa' ñkimmò' Yesù

30 «Mún wòli kan kim mún ci swum ndo' lè mwù yêm. Mún tǎ mè kàè' linni
 wě tǎ she Mvènnswæb shè mun. Nlànnczi me kàè' yêm yi ke mbyi nun, ntwi'
 se mún tǎ ka kæb le mún ci swum se ñlim yêm yili, son, mún tǎ fyõn swum
 se mwum ne fyii mún lwinnzi. 31 A mún ðyi shitàkwù shêm lè mún ne', lè
 ßyin ßa son tweli lè leñkæm. 32 Son, mwum ndo' ni kwe nyè tǎ shitàkwù
 ðyi ke jin shêm nun. Swum se nun tǎ leli ke nywi yêm, mún limmi le à si
 leñkæm. 33 Byin fyiâ ßwum ke cǐ Jân, à ðyiâ shitàkwù ke nywi swum se ðyi
 leñkæm. 34 Se ßa mun nywi dólè' le mwum wan ne ðyi shitàkwù ke nywi
 yêm, son, mún tweli ku' mún mbòkì ke nywi Jân, ßǎ ßyin swæ'. 35 Jân ße wě
 læm nnyàenni ne tǎ ñwanni fe. 'Byin yile le ßyin dali kwan kwæ' ke ñwanni
 shon nun. 36 Son mún, mún cinni ywum ye ta shitàkwù shêm ðyi, a lan she
 Jân ße ðyi. A si le mè she nyè mún tǎ ci, nyè Ce nyèm fe mún fya' le mún ci
 ni, yon hwæn li ta lisà' le Ce nyèm ne fyii mún. 37 Ce nyèm ne fyii mún tǎ
 ti ku' shitàkwù ðyi ke nywi yêm. 'Byin ywo' kife' ñkwu yon, shikì ßyin yen
 ku' fli me' shon. 38 Nzá' le' yon tǎ ka ßyin tón ke nlim nun, ntwi' se ßyin tǎ
 ka zwùm teli lè Mwum ne nun fyii. 39 Byin ta kén tǎ' ke ðewǎ Mvènnswæb
 nun, ntwi' se ßyin ßaka' le ßyin ye mbyi nzison ðwùmðwùm cinni ke nlim,
 kànmbè', ðewǎ màzwùm ta ma kònni leli ke nywi yêm. 40 Kwo fe' li, ßyin
 yili kan ßyin kiin ci shêm, lè ßyin cinni ñzison she ñkæmñkæm.

41 «Mún tǎ ka kæb lè mwum wan twuli mún. 42 Son, mún limmi ßyin, mún
 limmi le ßyin tǎ ka Mvènnswæb yili. 43 Mún kiân ke jin Ce nyèm nun, son,
 ßyin yili kan le' shêm. Son, ßeshe mwum ðin ndo' kìn ke jin shon ne' nun,
 nun ne ßyin ye le' shon yili. 44 Byin yili ñtwuli ßyin ne' ke nyinnim shin nun,
 ßyin tǎ ka ñtwu kæbbi fya' Mvènnswæb ne ðyi Mvènnswæb nun ne'. Ti, a ye
 ci le, ßyin kà ké ñlim ke nywi yon? 45 Ba ßyin ßakà' le mún yè ßyin wulea ke
 swi' Ce nyèm. Mwum ne tǎ ßyin wulea ni Môizè. Nun ne ßyin ta zwùm teli lè
 nun. 46 Byin keè mwù lè ñzá' le' ye Môizè ße leli, ßyin keè ti ku' lè yêm, ntwi'
 se ñzá' le' ye nun kœ ta leli ke nywi yêm. 47 Mbòkì ne ßyin kè kan ñlim lè
 swum se Môizè lekà', a ye ci le, ßyin kà ké ñlim lè ñzá' le' yêm?»

Ñdǐ ye Yesù ðie ßwum ñkæm nshên (Mt. 14.13-21; Mr. 6.30-44; Lk. 9.10-17)

6 ¹ Ke nyè yi, Yesù shèð' ke ñgyin swùm Gàlilè nun, se ße ße ti ku' lon
 le swùm Tìbèrià'. ² ñkwìn ßwum mèan ndo' ðwoôn nun kwe, ntwi'

se be yenne yì hilea ye nun be cì ke ñkimnzi ye nun be mè ñgwènñgwèn kimnzi nun. ³Yesù nèòn kpa' ndò' zwêm, à kèn tòn kwe lè ðweso' byon. ⁴Be lè ñgwìn mè Yuda nyě be be lon le **Ñgwìn-ñkwan-Èjib** ti kwukwæ'. ⁵Yesù wasi me', à cè, à yen ñkwìn ðwum mèan ndò' ta kin ke cì shon. À shè lè Filipò le: «Yă cìcì se ðwi' ywime kën ji hwinni kwe, ðwi' fe ðwum be ton be lè be ji?» ⁶(À lèle li lè nun ywò' swum se Filipò yě fyònnzi, ntwi' se be lè à limmâ swum se nun yě cì.) ⁷Filipò fyònnzi lè nun le: «Kwo fe' ðwi' cinnè fe' lõn ñkæm ndu' mbi, ye wolè kân lè ñhwìn ji, lè wen ne hwæn cinni kùš' ji shon.»

⁸Mwesò' Yesù ndò' be kwe ne jin shon be le Àndrê. Ñgyinni Sìmôn Piêr ne be. À ðyi, à shè lè Yesù le: ⁹«Mbìpàn mwò' ndò' ni cè, à cinni brê' yon shæn lè ðwen ñgishì bì. Son, ke ðwum bi mèan li, a ye fon kpea lè yen?» ¹⁰Yesù kà shě lè fon le: «Shèèni fon le be ton ñji!» Kæ' ðwæli be kwe cìcì màzwùm. Li, ðwum hwæn toen ke ñji'. Ke ñkwìn ðwum màzwùm nun, mè ðweb be làn mè ñkæm nshæn. ¹¹Be tonme ñji', Yesù sheli brê' lè ñgishì nun, à keli Mvènnswæb, à yili nun osòkò', à kyìllà' brê' ke nyinnim ðwum be be ñji' ñtònmi bi nun. À kyìllà' tì ku' fon ñgishì. Be ji wě tà she ñlim yan yili. ¹²Kwan se be ji, be ðyim, Yesù shè lè ðweso' byon le: «Swosèani yì kùš' brê' ye nzwon yi, shindo' làkì ðwu.» ¹³Weso' byon ci ku' wě tà she nun shèe fon, be swosa' yì kùš' brê' ye lwæb be, be lwinnzi yì sã' wùm blàn bì.

¹⁴Kwan se ðwum yenne hilea se Yesù cì si, be she le: «Lè lèñkæm, mwum tòn ne ni ci-nlèli ke ñwum Mvènnswæb nun nyě be lekà' le nyì ni yě ðèn.» ¹⁵Li, be yili fon bæn nun mèn fya' zwem ñnywèn lè kim. Ke nlimmì ye Yesù limme li, à nèòn nun be kpa' zwem, nun kyishon.

Kèn se Yesù kènne ke mla' swùm zwem
(Mt. 14.22-33; Mr. 6.45-52)

¹⁶Kwæbbi pyime, ðweso' Yesù kyilò' ke moan swùm. ¹⁷Be ben kwe, be nan ke cì' ndò' nun, lè be sheò' swùm, fon ken ke Kàpèrnàò. Kpòn pylè lè Yesù bèn kife' cì shan. ¹⁸Mpùn ðunme ðwì lè a ta mlá' swùm funnzi lè kim. ¹⁹Be lè be twennâ cì', a ti kènni swum mè kilòmetà shæn, shindo' fyuru. Be sem Yesù tá kin mla' zwêm lè à ti kwemmi lè cì'. Be yenme li, yi kwen fon. ²⁰Son, Yesù shè lè fon le: «Ba yi kwen ðyin, mùn ne.» ²¹Be ywome li, be yili be ðunnzi nun ke cì' nun, son, ke fya' zwem ñnywèn, cì' bèn cè be lè be kenme nun.

Ñkæb ye ñkwìn ðwum be Yesù kæbbi

²²Shikpon wannime, ñkwìn ðwum be nzwoin be ñgyin swùm kin bàkà' be mwu nun le cì' sue ku' ðün kwe mbo'. Be limme le cì' màzwùm ne ðweso' Yesù kenne nlim. Be limmi tì ku' le Yesù kènne kân lè ðweso' byon mban. ²³Ke kwan màzwùm nun, mè cì' ðyindo' wae ke Tìbèriâ', be kiin

ɲkwìn b̄wum màzwùm cinni kwe ke lwùmmò' se bon jie brê' ke nyè ye Yesù be lè à yilà Mvènnswæb osòkò'. ²⁴Ke nyen ye ɲkwìn b̄wum yenne le kwo fe' Yesù, kwo fe' b̄weso' byon be kân kwe, be duòn ke me cǐ' màzwùm nun, be ken ke Kàpèrnàò lè be ken nun kæbbi.

Yesù ne ðyi ji nyè tǎ ñzison ɲkæmɲkæm fe

²⁵Kwan se ɲkwìn b̄wum benne kwe ɲgyin swùm, be cinni Yesù. Be cibbi lè nun le: «Ñlisà', wù b̄en cǐ yǎ kwan?» ²⁶Yesù fyònnzi lè bon le: «Mùn tǎ byin shě lè leɲkæm le byin tǎ ka mun kæbbi ntwi' se byin ywotà yì hilea ye mùn tǎ cǐ, son, ntwi' se mè zwùm nyin ti ñlwinni lè brê'. ²⁷Kpæmmèni me', lè byin cinni ji nyè tǎ tòn ðwùmðwùm, ba kì byin ke mwù lè ɲkæb ji nyè yě be kwan kwæ' lè à gwèân. Ji nyè ðwùmðwùm màzwùm, mùn, **Mwen Mwum** ne ta nun fe, ntwi' se Ce nyèm Mvènnswæb ðwiâ mùn swu ɲgun.» ²⁸Be kà cibbi lè nun le: «Bwi' ye ku' ci le, bwi' kà lwinnzi she se Mvènnswæb yili?» ²⁹Yesù fyònnzi lè bon le: «She se Mvènnswæb yili si le byin te' zwùm lè mwum ne nun fyii.» ³⁰Be cibbi ti lè nun le: «Ke à si li, yǎ hilea se wù yě bwi' lisea, lè bwi' yen le wù ni mwum ne nun fyii? Be nyè yi, bwi' ke ñlim ke nywi ywù? Yǎ she se wù yě ku' cǐ? ³¹Mè mbibea bye' jie ji ndò' ne be be lon le **mânè** kwan se be be ke nlim kyò', wě tǎ she be kœ ke ðewǎ Mvènnswæb nun. Be le' kwe le: “À feâ bon ji nyè wai ke ðeb.” » ³²Yesù fyònnzi lè bon le: «Mùn tǎ byin shě lè leɲkæm le, Mòizè ne fee kan byin ji nyè wae ke ðeb, son, Ce nyèm Mvènnswæb ne ta ji ɲkæmɲkæm nyè wai ke ðeb fe. ³³Ntwi' se ji ne Mvènnswæb tǎ fe, à ni nyè tǎ kyili ɲwai ye ke ðeb lè à tǎ lan ɲgyò' wan ñzison ɲkæmɲkæm fe.»

³⁴Be kà shě lè nun le: «Mwumɲkæm, suku' bon bwi' ji màzwùm fe.» ³⁵Yesù wèli ɲwum, à shè lè bon le: «Mùn ne' ne ðyi ji nyè tǎ ñzison ɲkæmɲkæm fe. Mwum ne tǎ kìn ke cǐ shêm, ñjè ji bà tí nun kwènni be. Mwum ne tèt' ti ku' zwùm lè mùn, ñjè mlǎ' bà tí nun kwènni nywò' ndò'. ³⁶Son, mùn shèâ ló' byin mbyî nùn le kwo fe' she byin yennâ ma mùn lè mè me' nyin si, byin tèt' kan zwùm lè mùn. ³⁷Bwum be Ce nyèm fe mùn fya' hwæn ye kǐn ke cǐ shêm. Mùn bà ku' mùn mwum ne tǎ kǐn cǐ shêm byinnɔa. ³⁸Ntwi' se mùn kyili kân ɲwai ye ke ðeb lè mùn kiin she shêm ne' cǐ, son, mùn fyòn kǐn lè mùn ci she mwum ne fyii mùn. ³⁹Swum se mwum ne fyii mùn yili mùn ci, à si le bǎ mùn b̄wuli mwum m̄bò' ndò' ke nyinnim b̄wum be nun fe mun fya', son, mùn yimnzi bon hwæn ke ywi nun, kwan se m̄mlòkǎ' ɲgyò' wan ye wòli. ⁴⁰Ntwi' se swum se Ce nyèm yili si le, mwum ne tǎ mùn yenni hwæn, à kè ñlim ke nywi yêm, lè à cinni ñzison she ðwùmðwùm, lè mùn konndi nun ywi yimnzi, kwan se m̄mlòkǎ' ɲgyò' wan ye wòli.»

⁴¹Ke nywò' ye mè Yuda ywœ le Yesù leli, à shè le: «Mùn ni ji ne kyili ɲwai ye ke ðeb», be ðunmi nun ɲjili ke nlim yan nun, ⁴²lè be ta le' le:

«Yesù ne mwèn Jòsê! ne ban? Bwi' limmi kan ce nyon lè mon nyon nun? Ti, a ci jene le, à shè le nun ne kyili ñwai ye ke dëb?» ⁴³Yesù ywome li, à shè lè bon le: «Donnzênì ñnjili ye byin ta mûn njili yi. ⁴⁴Mwum ndo' wòli kan kim à kîn ci shêm, beshè Ce nyèm shì nun kwemnzi ke ke shêm. Mûn, mûn yě nun yimnzi ke ywi nun, kwan se mmlòkà' ngyó' wan ye wòli. ⁴⁵Be ko' ke dèwà me ci-nleli ke ñwum Mvènnswàb nun le: “Mvènnswàb ne ye bon hwæn ywum lisea”. Mwum hwæn ne tã ñkwu Ce nyèm ywoti, à yili swum se nun tã lisa', à tã kîn ci shêm. ⁴⁶Son se lisa' kan le mwum ndo' yennâ Ce nyèm, suku' nun ne wai ke ci shon, nun ne kyishon ne yennâ nun.

⁴⁷«Mûn tà byin shě lè leñkàm le mwum ne tëlâ zwùm lè mûn cinnâ ñzison d'wùmd'wùm. ⁴⁸Mûn ne d'yi ji nyě tã ñzison ñkàmñkàm fe. ⁴⁹Mè mbibea byin jie ji nyě be be lon le **mânè** ke nlim kyo'. Kwo fe' li, be ywie bon hwæn. ⁵⁰Son, ji ñkàmñkàm nyě kyili ñwai ye ke dëb, nun ne nyě le mwum ndo' ji nun, lè à bà tí ywi. ⁵¹Mûn ne d'yi ji nyě tã ñzison ñkàmñkàm fe, ye kyili ñwai ye ke dëb. A mwum ndo' ji ji màzwùm, à yě ñzison d'wùmd'wùm cinni. Ji ñkàmñkàm nyě mûn yě fe bã lan ngyó' wan cinni ñzison d'wùmd'wùm, à ni nwò' nywi yêm.»

⁵²Mè Yudà ywome li, be ñunmi ngyi kwùmmi ke nyinnim shan nun le: «Mwum tòn ne yě ku' ci le, à kà fe bwi' nwò' nywi yon, bwi' ji?» ⁵³Yesù shè lè bon le: «Mûn tã byin shě lè leñkàm le byin shi nwò' nywi **Mwen Mwum** ji, shikì byin nwi mvæb nywi yon, byin ba ñzison ñkàmñkàm cinni. ⁵⁴Mwum ne tã nwò' nywi yêm ji, à nwi tì ku' mvæb nywi yêm, à cinnâ ñzison d'wùmd'wùm. Mûn yě nun yimnzi ke ywi nun ke mmlòkà' ngyó' wan nun. ⁵⁵Ntwi' se nwò' nywi yêm yi ji nyě ñkàmñkàm, mvæb nywi yêm yi swum nwi she ñkàmñkàm. ⁵⁶Mwum nyě tã nwò' nywi yêm ji, à nwi tì ku' mvæb nywi yêm, à tã tòn m̄bæti lè mûn, mûn tòn ku' m̄bæti lè nun. ⁵⁷M̄bòkì ne Ce nyèm ne fyii mûn cinni ñzison, mûn ku', mûn cinni ñzison màzwùm ke nyè yon. Li, mwum ne tã nwò' nywi yêm ji, à cinni ku' ñzison nyè yêm. ⁵⁸Nwò' nywi yêm ye d'yi ji nyě kyili ñwai ye ke dëb. À bã wě ji nyě mè mbibea byin jie. Kwo fe' she be jie nun, bon, be ywie. Ti lè ji nyě mûn fe ne, mwum ne tã nun ji, à yě ñzison d'wùmd'wùm cinni.»

⁵⁹Yesù be ñzã' le' yi leli kwan se nun be ywum lisea ke nyenswàb mè Yudà ke Kàpèrnàò.

Ñzã' le' Yesù ye lisa' mbyi nzison d'wùmd'wùm

⁶⁰Màn b'wesò' Yesù ne be le' si ywo ñunmi leli ke nyinnim shan nun le: «Ñzã' le' ne ni d'ye kyibli ñzwo'. Wen ne ye ku' nun ywo?» ⁶¹Ke nlimmì ye Yesù limme ke nlim yon nun le b'wesò' byon ta fyon ke nyinnim shan nun li, à shè lè bon le: «Ñzã' le' màzwùm tà byin hwumnzi ñzwo'? ⁶²Ke à si li, se ye be d'ye le, beshè byin ta **Mwen Mwum** yenni lè à tã nàn be

deb cě nun wae nun? ⁶³ M̀p̀ùn M̀v̀ènnswàèb ne ta ñzison ñkàèmkàm fe, mwum dín wòli kan kim à cì swum màzwùm lè ñkimmo' yon ne'. M̀p̀ùn M̀v̀ènnswàèb kien tòn ke nyinnim shin nun, ke nzǎ' le' ye m̀n k̀in byin shě yi nun, yon ye lisa' byin mbyi nzison ñkàèmkàm. ⁶⁴ Son, byindo' bi kwe nyinnim shin nun, be kè kan ñlim ke nywi yēm.» (Ntwi' se ñdikà' ndunmi ye nun ñunme she shon, Yesù limme ñwum be ba ñlim kě lè nun, kòndi lè mwum ne yě nun fya' fe wan.) ⁶⁵ À kà kòndi leli le: «Ke ntwi' màzwùm ye m̀n shèe byin le mwum ndo' wòli kan kim à k̀in ke cì shēm beshe M̀v̀ènnswàèb shì nun kwemni ke ke shēm.»

⁶⁶ Ìjwài kwan màzwùm, ñwesò' m̀èan byon be be nun ñwon nyè kyiile lè nun, be kèn kan tí lè nun m̀ban. ⁶⁷ Yesù kà shě lè k̀i-wùm blàn b́i ñwesò' byon le: «Ti ku' lè byin, byin yili ti ku' kèn?» ⁶⁸ Simôn Pièr fyònnzi lè nun le: «Mwumkàm, ñwi' ye kèn ći wen? Wù ne cinni kan ñzǎ' le' ye ta ñzison ñwum ñwum fe? ⁶⁹ Bwi' keâ mwù lè ñzǎ' le' ywù, ñwi' limmi tí ku' le wù ni Mwum nsanmi ne wai ći M̀v̀ènnswàèb.» ⁷⁰ Yesù ywome li, à cibbi lè bon le: «M̀n ne yàenne kàn byin? byin wùm blàn b́i hwæn? Son, mwum ndo' ni ke nyinnim shin nun ne mwum Satæn.» ⁷¹ À be leli li lè Judà, mwèn Simôn Iskariò. Ntwi' kwo fe' she nun be ke nyinnim k̀i-wùm blàn b́i ñwesò' Yesù nun si, nun ne ye nun fya' fe wan.

Mè ñgyinni Yesù be kàn zwùm t̀eli lè nun

7 ¹ Ke nyè ne yi, Yesù be yòn ke me myi ne ke ñgyo' Gàlilé nun. À yile kàn nun yon ke me myi ne ke ñgyo' Jùdè nun, ntwi' se mè ci-zwi' me Yudà be kàb lè be wu nun. ² Be lè ñgwìn mè Yudà nyě be be lon le Ìjgwìn-yì-ñwun ti kwemmi nùn. ³ Li, mè ñgyinni Yesù she lè nun le: «Wa' ke cě, wù kèn be ke Jùdè bǎ ñwesò' byù bye kwe yen ku' mè she ne wù tǎ cì. ⁴ Ke wu tǎ pa' me she se ći, kwàsi wù ne' swi' ñwum hwæn pǎ'. Ntwi' se mwum ndo' tǎ ka swum se nun tǎ cì gwùmni, beshe nun yili le ñwum limmi nun.» ⁵ (Mè ñgyinni byon ne' be kàn zwùm t̀eli lè nun.) ⁶ Yesù shè lè bon le: «Byin, byin cinni kwan kwan hwæn, ti lè m̀n, kwan shēm wòli kife'. ⁷ Lan wan wòli kan kim be byinnzi byin. Ti lè m̀n, be ta m̀n byinnzi ntwi' se m̀n tǎ bon mè ywi' ñwosi le mè she ne bon ta cì ni m̀byibba. ⁸ Byin, kènnèni byin ñgwìn ji. Ti lè m̀n, m̀n bǎ ñgwìn ne tòn ne kènni, ntwi' se kwan shēm wòli kife'.» ⁹ Ke nyè ye nun shèe bon ñzǎ' le' yi, à lwàb nun be Gàlilé.

Kèn se Yesù kènnè Ìjgwìn-yì-ñwun ji

¹⁰ Son, kwan se be lè mè ñgyinni byon kennà ći ñji ñgwìn, Yesù ku', à kènnò' tí ku' kwe, son, à kwàsi kan nun ne' pisean. ¹¹ Mè ci-zwi' me Yudà be nun kàbbi kwe ñgwìn màzwùm nun, lè be ta cibbi le: «À ni ku' fen?» ¹² Bwum be be kwe, be be ñgyi kwùmni ke ñgun ñji, lè byindo' ta le' le: «Mwum tòn ni tǎ lwen ći.» Byindo' ku', bon le: «Ayi. Nyí ni tǎ ñwum kwù

kěń byebbi lîsea.» ¹³Son, kwo fe' li, mwum ndɔ' lwùmme kǎn fɔ' lè nun lèli nywi yon mwù zwò, ntwi' se be be mè ci-zwi' me Yuda yi.

¹⁴Be lè ñgyìn ye be be ñgwìn ji nun kyilâ ke nyinnim, Yesù kèn ðun ke nyenswæb ndwun, à ðunmi ðwum ywum lîsea. ¹⁵Mè Yuda ywome ñlîsà' ywum yon li, se ci bon lè shimma, be ðunmi leli le: «A ci le, mwum tòn ne limmi ywum ye ðewǎ Mvènnswæb nun li, shikì à yusa' yon mbyî?»

¹⁶Yesù ywome li, à fyònnzi lè bon le: «Ywum ye mùn tǎ lîsà' yi tǎ ka wai ke zwum shêm nun, son, Mvènnswæb ne fyii mùn, nun ne ta mûn yon fe. ¹⁷Mwum ne tǎ yili nun ci swum se Mvènnswæb yili yě limmi beshe ñlîsà' ywum yêm ta wai ke cǐ Mvènnswæb, kè beshe ye ta wai ke ñkimmɔ' yêm nun. ¹⁸Mwum ne tǎ leli ke ñkimmɔ' yon nun yili le ðwum twuli nun ne', son, mwum ne tǎ yili le be twuli mwum ne fyii nun, mwum màzwùm ni ci-leŋkæm, le' me mbwè' ndɔ' ba nun nywi. ¹⁹Môizè ne fee kǎn byin mè lwuà? Son, kwo fe' li, mwum mbɔ' ndɔ' ke nyinnim shin nun tǎ ka mè lwuà màzwùm lwinnzi. Ti, yen se byin ta mbyi kæbbi lè byin wu mùn nun?» ²⁰Ïkwìn ðwum ywome li, be she lè nun le: «M̀pùn ndɔ' ni wù mwu? Wen ne ta mbyi kæbbi lè nun wu wù?» ²¹Yesù fyònnzi lè bon le: «Mùn cikà' hilea ke nyinnim shin nun, nywɔ' mè yinnì nyin ndɔ', kǎmmi fɔ'. Byin yenme li, shimma cið' byin hwæn. ²²Be lè Môizè ciâ byin lè ñkimmɔ' le byin ðunnzi ðwen mè ðweb ñdùn. (Lè leŋkæm Môizè ne ðunme kǎn ñdunnzi ndùn màzwùm, son, mè mbibe a byin be ðunme.) Kwo fe' nywɔ' mè yinnì nyin, byin ta ðwen ñdùn ðunnzi. ²³Beshe byin woli kim byin ðunnzi mwèn ne ndweb ñdùn nywɔ' mè yinnì nyin lè byin lwinnzi lwuà Môizè, ti yen se ci byin ta nyeni lè mùn, ke ñkimnzi ye mun kimnze kwæ' nywi mwum gwùm, nywɔ' mè yinnì nyin? ²⁴Kyilîni lè ñlin me kǎ' ke nywi ywum ye byin ta yen ke me' zwêm. Ndikà' byin lin mè kǎ' ke mbyi leŋkæm nun.»

Mè ncibbi ne ðwum ta cibbi ke nywi Kristò

²⁵Lan Yèrusàlèm ndɔ' be leli le: «Mwum ne tòn ni ne be ta ka kæb lè be wu nun? ²⁶Ceèni fe', à tǎ leli ke pisean, shikì mwum ndɔ' shè ku' nun le' ndɔ'. Mè ci-zwi' bye' ta lɔ' mwù ké lè leŋkæm le mwum tòn ne ni **Kristò**, mwum ne Mvènnswæb yě fyii? ²⁷Bwi', bwi' limmi cě mwum ne tòn ne wai nun. Son, kwan se **Kristò** yě bĕn, mwum ndɔ' bǎ limmi cě nun wai nun.»

²⁸Ke kwan màzwùm nun, Yesù be ywum lîsea ke nyenswæb ndwun. À ywome she ðwum màzwùm be le' si, à shè lè ñkwu kimmi le: «Leŋkæm se, byin limmi mûn. Byin limmi tì ku' cě mùn wai nun. Son, byin limmi kan le mûn bĕn kan cě lè ñkimmɔ' yêm, son, mwum ndɔ' ne fyii mùn. Nun ne ðyi ci-leŋkæm. Byin limmi kan nun. ²⁹Son, mûn, mùn limmi nun, ntwi' se mùn wai moan ke shon, nun ne fyii mùn.»

³⁰Kwan se bon ywɔe li, be ðunmi mbyi kæbbi lè be bæ n nun, son, mwum ndɔ' yinnidi kan nun lè fyà', ntwi' se be lè kwan mbæn shon wòli kife'.

³¹ Kwo fe' li, ke nyinnim ðwum ðe ðe kwe, bye tele zwùm lè nun ðe mèan. ðe ðe le' le: «Kwan se **Kristò** yè ðèn, à yè hilea cí a lan ye mwum tòn ne cí?»

Mfyi ye ðe fyie ðwum le ðe ken Yesù ðænni

³² Mè **Fàrizièn** ndò' ywò' swum se ðwum ðe leli ke ñgun ñji ke nywi Yesù. ðe pyie ñwum fò' bon lè mè ci-zwi' me ci-mfe sàtikàè', li, ðe fyid' mè ci-mbòn nyenswàb ndwun le ðe ken Yesù ðænni. ³³ Yesù ywòmè li, à shè lè bon le: «Bwi' ke tòn ðwi' lè byin nùn, son, ke kwan kwæ' nun, mùn yè byin donnzi, mùn kèn ðe cè mwum ne fyii mùn. ³⁴ Byin ye mùn kàbbi, son, byin ba mùm cinni, ntwi' se byin wòli kan kim byin ðen cè mùn yè ðe nun.» ³⁵ Mè Yudà ðunmi leli nyinnim shan nun le: «Yà cici se nun yè kèn ðyè nun, ðwi' shi nun cinni? À yili nun ken ðyè ke cè mè ñgyinni me Yudà bye nywæleà ke nyinnim ðwum ðe ba mè Yudà nun, lè nun lisà' mè kyín màzwùm ywum? ³⁶ À shè tì le ðwi' ye nun kàbbi, son, ðwi' ba nun cinni, ntwi' se ðwi' wòli kan kim ðwi' ken ðèn cè nun yè ðe nun. Sù nzàè' le' màzwùm ni ku' le?»

Mlà' ye ta ñzison ñkàmñkàm fe

³⁷ Nywò' ne ñgwìn mlðe, ñgyìn màzwùm ne ðe ñgyìn ndwun, à làn mè ñgyìn bye fò'. Nywò' màzwùm, Yesù wa' zwò ke nyinnim ðwum, à shè lè ñkwu kimmi le: «Beshe ñjè mlá' tã mwum ndò' kwènni, à kiin cí shèm lè nun nwi mlá'. ³⁸ A si wé tã she ðe leli ke ðewá Mvènnswàb nun le: “Mwum ne tã zwùm tèli lè mùn, mlá' ye ta ñzison ñkàmñkàm fe ye kwain ke zwum shon nun.” » ³⁹ Ke nleli ye Yesù ðe leli li, à ðe leli ke nywi Mpùn Nsanmi ne ðwum ðe ye zwùm tèli lè nun ye cinni. Ke kwan màzwùm nun, ðe lè Mvènnswàb fyii kife' Mpùn nyon, ntwi' se ðe lè Mvènnswàb fe kife' Yesù ñtwu yon.

Ñkwùm ye ðwum ðe ñgyi kwùmmi ke nywi Yesù

⁴⁰ Ke nyè ye ðe ywò' ñzàè' le' yi, byindo' lè ðwum bye ðe ke ñkwìn ðwum nun ðunmi leli ke nyinnim shan nun le: «Lè leñkàm, mwum ne tòn ne ni ci-nleli ke ñwum Mvènnswàb nun nyè ðe leká' le Mvènnswàb yè fyii.» ⁴¹ Byindo', bon le: nyí ni **Kristò**, mwum ne Mvènnswàb fyii. Son, byindo' le' ku' làn nyan le: «Leñkàm se le **Kristò** yè wai ke ñgyò' Gàlilé nun? ⁴² Be kò' kan ke ðewá Mvènnswàb nun le **Kristò** yè ðe mwum nyè ke mvu ðwum mvèn Dàvíð nun? Le à yè wai ke Bètlèhèm, ye ðe myi mvèn Dàvíð?» ⁴³ Ke ñkwùm ye ñkwìn ðwum màzwùm kwùm ñgyi li, ñkyiili ðen ke nyinnim shan nun. ⁴⁴ Byindo' lè ðwum yili le bon ðæn Yesù, son, mwum ndò' yinndi kan nun lè fyà'.

Mè ci-zwi' me Yudà ðe kãn zwùm tèli lè Yesù

⁴⁵ Mè ci-mbòn nyenswàb ndwun fyoin ðe ke cè mè ci-zwi' me ci-mfe sàtikàè' bon lè mè **Fàrizièn**, fyà' pwìn. ðe ðenme kwe, mè ci-zwi' màzwùm

kà cibbi lè bon le: «Yen se ci byin kènnzi kǎn Yesù cǎ?» 46 Mè ci-mbòn nyenswǎb ndwun màzwùm kà fyònnzi be lè bon le: «Mwum din ndo' lèli kife' mbyi wě mwum ne tòn ni.» 47 Mè Fàriziēn kà cibbi lè bon le: «Byin ti ku', byin ti ti mè mbwè' byon bi dwon? 48 Byin ywǎ nywǎ' ndo' le ci-zwi' nye' ndo' mbò' kèà òlim ke nywi yon? Kè shindo', byin ywǎ le Fàriziēn ndo' kèà ti òlim lè nun? 49 Bwum dindin be ta òlim kě lè nun, ntwi' se bon limmi kan lwuà Mòizè. Mvènnswǎb yě bon vènè' yennzi.» 50 Nìkòdēm be kwe ñkwìn me Fàriziēn màzwùm nun. Nun ne kien Yesù yenni nywǎ' ndo'. À d̄yi, à shè lè bon le: 51 «Ke bè' lwuà she' nun, bwi' wòli kan kim bwi' yennzi mwum ndo' vènè' d̄in, shikì bwi' limmi swum ndo' se nun cǎ.» 52 Mè Fàriziēn bye fò' ywǎme swum se Nìkòdēm lèli li, be kà cibbi lè nun le: «Wù hwæn, wù ni ti mwum Gàlilè? Kènne, wù ce ke d̄ewǎ Mvènnswǎb nun, wù yě yen le kwo fe' ci-nlèli ke ñwum Mvènnswǎb nun ndo' mbò' bǎ wai ke ñgyo' Gàlilè.» [53 Ke nyě màzwùm, wen ne hwæn yè mbyi d̄wòn nyon be.

M̄bæn ye be bænnze òlib ndo' ke nywi nlà' nun

8 1 Yesù nèòn nun ke ñgwùmñgwùm se cinni mè ñjì ñgǎe' òlívè. 2 Shikpon hwili, à kyilì be, à kèn ke nyenswǎb ndwun, ñkwìn b̄wum hwæn swòli nun ke. À tòn ñji', à d̄unmi bon ywum lisea. 3 Mè ci-nlimmi me lwuà lè mè Fàriziēn kennzi òlib ndo' ke ci shon. Be bænnze nun lè à tǎ òlà' ywi. Be d̄yili nun swi' b̄wum hwæn pǎe', 4 be kà shè lè Yesù le: «Ñlisà', be bænni òlib ne jene ke nywi nlà' nun. 5 Mòizè lele ke lwuà nyon nun le bwi' bi wu pa' me yib màzwùm lè mè ñgwǎ'. Ti lè wù, wù le' ku' le?» 6 Be lele kǎn li d̄in, be lele li lè be b̄web nun, bon ywǎ' swum se ye nun kwean ñwum, ke nyě yi, be ken nun wulea be lè son. Son, Yesù swòsì nun mwù ñgyo' lè à tǎ ñgo' ndo' kǎa ke kwub nun lè mwenn̄gwu. 7 Mbòki ne be be ñjèti lè ñcibba' le' màzwùm, Yesù wasi mwù zwò, à ce bon, à shè lè bon le: «Mwum ndo' mbò' ke nyinnim shin nun nyě limmi le nun ni cì kife' byebbi ndo', à seti nun ywummi lè ñgwǎ'.» 8 À lèli li, à swòsì' nun mwù yon be ñgyo', lè à tǎ ñgo' yon kǎa. 9 Bwum màzwùm ywǎme ñzǎe' le' yi li, be d̄unmi wa' be nd̄wonnd̄won, ñd̄unmi bye b̄wumñkǎem nun, a ken bèn bye b̄wǎ' nun. Yesù nzwon be kyi bon lè òlib ni nyě be lè à ke swi' shon ñd̄yi. 10 Ke nyě yi, Yesù wasi mwù zwò, à cibbi lè òlib ni le: «Bwum bye kin wù wulea bi fen? Mwum ndo' wèsi kan wù?» 11 M̄lib ni fyònnzi lè nun le: «Mwumñkǎem, kwo fe' mwum mbò' bǎn.» Yesù shè lè nun le: «Mùn ku', mùn b̄a ku' bon mun wù wèsi. Kènne, son, b̄a wù cì ti byebbi nywǎ' ndo'.»]

Yesù ne d̄yi ñwanni she ñkǎemñkǎem

12 Yesù d̄yi, à kònn̄d̄i ti shè be lè ñkwìn b̄wum le: «Mùn ne d̄yi ñwanni she ta d̄wùm ke nyinnim b̄wum be ñgyo' wan nun. Mwum nyě tǎ mun

ɔwɔn nyɛ yɛ ɲwanni she ta ɲzison ɲkæmɲkæm fɛ cinni. À bà tí kènni ke ɲjimmi nun.» ¹³Mè Fàriziɛn ywɔme li, bɛ she lè nun le: «Wù tã shitàkwù swù dɔyi lè wù ne'. Li, swum se wù tã lɛli, bwi' wòli kan bwi' twe' son lè lɛɲkæm.» ¹⁴Yesù fyɔnnzi bɛ lè bon le: «Mun dɔyi fɛ' shitàkwù shêm lè mún ne', swum se mún tã lɛli à si lɛɲkæm, ntwi' se mún limmi cìci se mún wai nun, mún limmi tí cɛ mún kènme nun, son byin, byin limmi kan cɛ mún wai nun, shikì byin limmi ku' cɛ mún kènme nun. ¹⁵Byin ta mè kà' linni ke nlimmì ye bɔwum wan limmi nun. Ti lè mún, mún tã ka mwum ndɔ' mè kà' linni. ¹⁶Son, bɛshe a ta bɛ lè mún lin mè kà', ɲlin mɛ kà' yêm yi ke mbyi nun, ntwi' se mún tã ka mè kà' linni mún kyishêm, son, bwi' bi bwi' lè Ce nyèm nɛ fyii mún. ¹⁷Bɛ kɔ' ke dɛwà mɛ lɔwà shin nun le bɛshe bɔwum bì ndɔ' dɔyi shitàkwù ke swum fɔ' nun, lè shitàkwù màzwùm si she lɛɲkæm. ¹⁸Mún tã shitàkwù shêm nɛ' dɔyi. Ce nyèm nɛ fyii mún tã tí kònnɔ̀ shitàkwù dɔyi ke nywi yêm.» ¹⁹Bɛ cibbi lè nun le: «Ti lè Ce nywù, à ni fɛn?» Yesù fyɔnnzi lè bon le: «Byin limmi kan mún, shikì byin limmi ku' Ce nyèm. Byin limmè mún, byin limmè tí ku' Ce nyèm.»

²⁰Yesù bɛ bon ɲzã' le' yi shɛ kwan se nun bɛ bon ywum liɛsa ke nyenswæb ndwun. À bɛ ɲtònmi ke moan mè ɲgwùm lòn ye bɛ bɛ mbe Mvènnswæb kɛ ke nlim. Mwum ndɔ' bæn kan nun, ntwi' se bɛ lè kwan mbæn shon wòli kifɛ'.

«Byin wòli kan kim byin ken cɛ mún kènme nun»

²¹Yesù kònnɔ̀ bon shɛ le: «Mún yɛ kèn, byin ye mún kæbbi bɛ, son, byin ba mún cinni, byin ye ywi ke byebbi nyin nun. Byin wòli kan kim byin ken cɛ mún kènme nun.» ²²Mè Yudà ywɔme li, bɛ ðunmi lɛli nyinnim shan nun le: «À yɛ nun nɛ' wu? Ke nun shɛ le bwi' wòli kan kim bwi' ken cɛ nun kènme nun?» ²³Yesù ywɔme li, à fyɔnnzi lè bon le: «Byin, byin bi bɔwum bɛ wa' ke cɛ ɲgyɔ' wan nun, son, ti lè mún, mún wai ke dɛb. Byin, byin bi bɔwum bɛ cɛ ɲgyɔ' wan nun, mún bà mun mwum nɛ cɛ ɲgyɔ' wan nun. ²⁴Son se ci, mún shɛ lè byin le, byin ye ywi ke byebbi nyin nun. Byin shi mún tweli wɛ tã she mún tòn se, lè byin ye ywi byebbi nyin nun.» ²⁵Mè Yudà kà cibbi bɛ lè nun le: «Yã mwum nɛ wù?» Yesù fyɔnnzi lè bon le: «Mún shèkà' byin son ɲdikà' ndunmi ye mún ðunme byin ywum sannzi. ²⁶Mún cinni mè le' mɛan nyɛ mún yɛ shɛ ke nywi yin, nyɛ mún yɛ byin mè kà' linni nlim. Son, mwum nɛ fyii mún, à ni ci-lɛɲkæm, mún tã suku' lan ɲgyɔ' wan swum se mún ywɔe ɲwum yon shɛ.»

²⁷Ke nleli ye Yesù lele li, ɲzã' le' yon lean ɲgyɔ' ðin. Bwum bɛ bɛ ɲgyɔ' limmi kan le à tã lɛli ke nywi Ce nyon. ²⁸Li, Yesù kà shɛ lè bon le: «Kwan se byin kà wasakà' mún, **Mwen Mwum**, byin kà tɛkà' mún wɛ tã she mún tòn, byin kà limmàkà' le mún tã ka swum ndɔ' cí lè mwù yêm, mún tã suku' swum se Ce nyèm lisa' mun shɛ. ²⁹Bwi' bi bæti lè mwum nɛ fyii mún, à ðonni kan mún kyi, ntwi' se mún tã su' swum se ta nun ɲlim lɔwuka cí.» ³⁰Mbòki nɛ Yesù bɛ lɛli li, bɔwum mɛan tele zwùm lè nun.

Ñzàè' le' ne Yesù shèe ke nywi Abràhâm

³¹Yesù kà shě lè mè Yudà bye kee ñlim lè nun bi le: «Beshe byin ke mwù ke ywum ye mún lisà' byin nun, byin ye be bwesò' byém lè leŋkàm. ³²Li, byin ye leŋkàm limmi, leŋkàm màzwùm ye byin fyòsi mgbonmgbon.»

³³Be kà fyònnzi be lè nun le: «Bwi' bi bwum be ke mvu bwum Abràhâm nun. Kwo fe' ñgyìn m̀bò', bwi' dun kife' son ke nye mwum ndò'. Ti, se ci le wù le' le bwi' ye fyònni mgbonmgbon?» ³⁴Yesù fyònnzi be lè bon le: «Mún tà byin shě lè leŋkàm le mwum ne tá byebbi cí hwæn, à ni son byebbi. ³⁵Son tà ka tòn kwan hwæn ke nye m̀bò' nun, son, mwèn ci nye ni kwan hwæn ke đwon nyan. ³⁶Beshe Mwen Mvènnswàb fyòsi byin mgbonmgbon, lè leŋkàm byin ye be kwan hwæn mgbonmgbon. ³⁷Mún limmi limmi lwen le byin bi ke mvu bwum Abràhâm nun. Son, byin ta kàb lè byin wu mún, ntwi' se byin kè kan mwù ke ywum ye mún lisa' byin nun. ³⁸Mún tá leli ke nywi ywum ye Ce nyèm lisa' mun, son, ti lè byin, byin ta ywum ye ce nyin shèe byin cí.»

³⁹Be kà fyònnzi be lè nun le: «Ce nye' ne Abràhâm.» Yesù shè lè bon le: «Beshe byin bê bwen Abràhâm leŋkàm, byin cinnè mè kikàen ne nun cinne ku'. ⁴⁰Son jene, kwo fe' she mún shèe byin leŋkàm she mún ywòe cí Mvènnswàb si, byin ta mbyi kàbbi le byin wu mún. Abràhâm fde kàn swum màzwùm cí. ⁴¹Byin ta fyòn mè kikàen ce nyin đwon.» Be kà fyònnzi lè nun le: «Be ye kan bwi' wan. Bwi' cinni kan ce ndò' mbyí, suku' Mvènnswàb.» ⁴²Yesù shè lè bon le: «Mvènnswàb bê Ce nyin leŋkàm, byin yilé mún, ntwi' se mún wai cí shon, mún ni ke cě ntwi' yon. Mún kín kán cě lè mwù yém, son, nun ne fyii mún. ⁴³Yen se ci byin tà ka swum se mún tà byin shě ywo? À si ntwi' se byin wòli kan le byin nonnzi mè ywi' ke nzàè' le' yém nun. ⁴⁴Ce nyin ni Satàen. Li, byin yili byin ci swum se nun yili. À be bwum wukea ñdiká' ndunmi ñgyò' wan. À tà ka leŋkàm leli, ntwi' se le' leŋkàm ndò' ba nun nywi. She shon si she me m̀bwè' ntwi' se nun ne đyi ci-me m̀bwè', mè m̀bwè' hwæn ta wai cí shon. ⁴⁵Ti lè mún, mún tá leŋkàm leli. Son se ci, byin tà ka mwù kě ke nzàè' le' yém nun. ⁴⁶Wen ne ke nyinnim shin nun nyě cinni ñkimmò' le nun lisà' mún byebbi m̀bò' ndò' ne mún ciâ? Beshe mún tá leŋkàm leli, yen se ci byin tà ka mwù kě ke nzàè' le' yém nun? ⁴⁷Mwum ne đyi mwum Mvènnswàb, à tá ñzàè' le' yon ywo. Son byin, byin tà ka ñzàè' le' yon ywo, ntwi' se byin ba bwum byon.»

⁴⁸Mè Yudà kà shě lè nun le: «À si leŋkàm ke nshè ye bwi' ta shè le wù ni mwum ne wai Sàmàrí, m̀pùn m̀byebbi ndò' ni wù nywi.» ⁴⁹Yesù fyònnzi lè bon le: «Mún cinni kan mún m̀pùn m̀byebbi ndò' nywi yém, son, mún tá Ce nyèm twuli. Ti lè byin, byin ta mún tweli wě swum đin. ⁵⁰Mún tà ka ñtwu yém ne' kàbbi. Mwum ndò' ni kwe nyě tà mún yon kàbbi, lè à tá ñgim yém đyi. ⁵¹Mún tà byin shě lè leŋkàm le mwum ne tá mwù kě ke nzàè' le' yém nun, ywi bà nun bænni.»

⁵²Mê Yudà she lè nun le: «Jene, bwi' limmâ lwen le wù cinni mpùn mbyebbi ndo' mwu. Ce fe', Abrahâm ywiâ, mè ci-nleli ke ñwum Mvènnswæb nun, be ywi tì nùn. Son wù, wù tã le' le mwum ne tã mwù kě ke nză' le' ywù nun, ywi bà nun bænni. ⁵³Mbibeà nyè' Abrahâm ywiâ. Wù ne cinni ñtwu, wù làn nun? Mè ci-nleli ke ñwum Mvènnswæb nun ywiâ tì ku' nùn. Wù tã ku' wù ne' tweli lè wən?» ⁵⁴Yesù fyònnzi lè bon le: «Mũn twulè mũn ne' lè mwù yêm, ñtwu yêm bê swum dîndin. Mwum ne tã mún twuli ni Ce nyêm, nun ne byin ta shè le nun ne ðyi Mvènnswæb nyin. ⁵⁵Son, byin limmi kan nun. Mũn, mún limmi nun. Mũn sheè le mũn limmi kan nun, mũn bê ku' ci-me mfwè' wě byin. Son, mún limmi nun, mún tã mwù kě ke nză' le' yon nun. ⁵⁶Ñlim lwukae mbibeà nyin Abrahâm zwum lè she nun yě ñgyìn nyě mún yě bèn nun yenni. À yenne nun, à be ñlwinni lè ñdàli.»

⁵⁷Mê Yudà kà shě lè nun le: «Wù wòli kife' ðwùm mwum shân, se ci le wù shè le wù yennâ Abrahâm?» ⁵⁸Yesù shè lè bon le: «Mùn tã byin shě lè lènkâm le, lè be kà ye Abrahâm, be lè mún ti kwe.»

⁵⁹Mê Yudà ywome li, be sheli mè ñgwò' le bon ye nyí ywummɔa nun, son, Yesù gwùmnì nun, à kwan nyenswæb ndwun, à kèn nun.

Ñkimnzi ye Yesù kímnze ci-ɓwubè ndo'

9 ¹Kwan se Yesù be làn ke cìci ndo', à yen mwum ndo' ne be ci-ɓwubè ñdiká' ye shon. ²Bwesò' Yesù kà cibbi lè nun le: «Ñlisà', yen se ci be ye mwum ne tòn ne lè à ni ci-ɓwubè? Byebbi mè ce nyon ne ci, kè byebbi nyon ne' ne cì nun?» ³Yesù fyònnzi lè bon le: «A ba ku' bon ntwi' byebbi mè ce nyon, shìkì a be ku' ntwi' byebbi nyon ne'. À ni ci-ɓwubè li lè ɓwum yen she twun se Mvènnswæb yě cì nywi yon. ⁴Se yili le, kwan se nywò' ke zwò si, mún lwinnzi she mwum ne fyii mún, ntwi' se kpòn tã kìn. Ke kwan màzwùm nun, mwum ndo' wòli kan tì kim à cì swum ndo'. ⁵Kwan se mũn ke ke ñgyò' wan, mún ne ðyi ñwannì se ta ðwùm ke nyinnim ɓwum be ñgyò' wan.»

⁶Ke nyè ye Yesù lele ñză' le' yi, à swi mètì ñgyò', à fyinnò' yon le ñgyò' nun, ye fyonnì mè mló', à kpò' ci-ɓwubè ni yon me'. ⁷À shè lè nun le: «Kèn ke yon Sìlòè nun, wù ɓosi me' kwe.» (Sù Sìlòè ni le ci-mfyi.) Ci-ɓwubè ni kèn kwe, à ɓosi me'. Kwan se nun wai kwe, lè me' yon welâ. ⁸Mè ñwè byon, lè ɓwum be be nun yenni, lè à tã ywum ðolea, be ðunmi leli le: «Mwum tòn ne ne be kán tòn tòn ke cě, lè à tã ywum ðolea?» ⁹Byindo' lè ɓwum le' le nyí ni ne. Byindo' bon le: «Ayi, nun ne ban, son, à gwili nun ðin.» Son, mwum màzwùm ðyi lè mwù yon ne', à shè le: «Mùn ne.» ¹⁰Be kà cibbi lè nun le: «Me' ywù ci le, ye kà wèli?» ¹¹À fyònnzi le: «Mwum ne be ta lon le Yesù lõn mè mló', à kpò' mún yon me', à shè lè mún le mún ken ke yon Sìlòè, mún ɓosi me' kwe. Mún kèn ku' li, mún cì ku' wě tã she nun lele. Ke nyě ye mún ɓosi me', me' yêm welì.» ¹²Be ywome li, be cibbi

lè nun le: «Mwum màzwùm ni fɛn?» À fyònnzi lè bon le: «Mũn lìmmi kan mũn.»

¹³Be kà kènnzi mwum ne be ci-ɓwubè ni ke cí me **Fàrizièŋ**. ¹⁴Nywo' mè yinnì mè Yudà ndo' ne Yesù lòen mè mló', à wèlì ci-ɓwubè ni me' nun. ¹⁵Mè **Fàrizièŋ** yenme bon, be cibbi tì ku' làn nyan lè mwum tòn ni le: «Yen se lannze wù nywi, wù dunmi yenni jene?» À fyònnzi lè bon le: «À kpɔe mún mè mló' ke me', mún kèn me' ɓosi. Jene me' yêm welâ.» ¹⁶Li, mè **Fàrizièŋ** byindo' dunmi leli le: «Mwum ne cì swum màzwùm wai kǎn cí Mvènnswàɓ, ntwi' se nun tǎ lwuà ngyìn mè yinnì nye' sèmnzi.» Son, byindo' le' ku' le: «Ci-ncí byebbi wòli kim à cì yì pa' hilea màzwùm?» Ke le' màzwùm nun, be be mè nɗum kyikyì.

¹⁷Li, mè **Fàrizièŋ** cibbi tì be lè mwum ne be ci-ɓwubè ni le: «Ti lè wù, wù tǎ ku' le' ke nywi mwum ne weli wu me' le yen?» À fyònnzi lè bon le: «Ci-nleli ke nɗum Mvènnswàɓ nun ne.» ¹⁸Son, mè ci-zwi' me Yudǎ kè kan mwù lè she nun be ci-ɓwubè, son jene à ti yen nùn si, han be ci be loin ce nyon bon lè mon nyon, ¹⁹ɓǎ be cibbi lè bon. Be ɓenme, be kà cibbi lè bon le: «Mwen nyin ne nyé? Byin yili lè leŋkǎm le byin ye nun lè à ni ci-ɓwubè? Ti, yen se ci jene, me' yon welâ?» ²⁰Mè ce nyon kà fyònnzi le: «Ŋgyi ɓan, mwɛn nye' ne, ɓwi' ye nun lè à ni ci-ɓwubè. ²¹Son, ɓwi' limmi kan ɓwi' swum se lannze nun nywi à ti yen jene, shìkì ɓwi' limmì ku' mwum ne wèlì nun me'. Cibbèni lè nun, ñɗwɛb ne ti, à yé byin fyònnzi lè nun ne'.» ²²Mè ce nyon be leli li, ntwi' se be be mè ci-zwi' me Yudǎ yì. Ntwi' se be lè mè ci-zwi' me Yudǎ toǎn nɗum fò' le, mwum ne yé ðyi, à shè le Yesù ni **Kristò**, mwum ne Mvènnswàɓ fyii, be ye nun kwannzi ke nɗkwin ɓwum nyenswàɓ mè Yudǎ nun. ²³Son se ci mè ce nyon she le: «Ñɗwɛb ne ti. Cibbèni lè nun ne', à yé byin fyònnzi.»

²⁴Li, mè **Fàrizièŋ** ci be loin tì mwum ne be ci-ɓwubè ni be, be cibbi lè nun le: «Shè leŋkǎm ke swi' Mvènnswàɓ. ʼBwi', ɓwi' limmi le mwum ne tòn ni, à ni ci-ncí byebbi.» ²⁵À fyònnzi lè bon le: «Mũn lìmmi kan ɓeshe ci-ncí byebbi ne, kè nun ne ɓan. Son, swum fò' se mún lìmmi à si le, mún be ci-ɓwubè, me' yêm welâ jene.» ²⁶Be cibbi lè nun le: «Yen se nun cie ǎ kà wèlì wu me'?» ²⁷Mwum ne tòn ni fyònnzi lè bon le: «Mún shèâ byin son mbyî nùn, byin yili kan byin ywo' byin. Yen se ci byin yili le mún konndi tì byin son sannzi be? Kè shindo', byin yili byin be ku' ɓwesò' byon?» ²⁸Mè **Fàrizièŋ** ywɔme li, be ðunmi nun kɔlea, be she lè nun le: «Wù ne ðyi ku' mwesò' nyon. ʼBwi', ɓwi' ɓi ɓwi' ɓwesò' Mòizè. ²⁹ʼBwi' limmi lwen le Mvènnswàɓ lele lè Mòizè. Son, ti lè mwum màzwùm, ɓwi' limmi kan ma ɓwi' cě nun wai nun.» ³⁰Mwum ne tòn ni fyònnzi lè bon le: «Le' shìmmea se li, she byin limmi kan cě nun wai nun. Kwo fe' li, à wèlǎ bon mun me'. ³¹ʼBwi' limmi le Mvènnswàɓ tǎ ka nɗkeli me ci-ncí byebbi ywo, son, mwum ne tǎ nun mwumnzi, à cì swum se nun yili, nun ne Mvènnswàɓ tǎ nɗkeli yon ywo. ³²ʼBwi' ywo' kife' nywo' ndo' le mwum ndo'

welâ me' mwum ne be ye lè à ni ci-ɓwubè. ³³Beshe mwum màzwùm shiè wai cě Mvènnswàb, ă ciè kǎn swum ndo' li.» ³⁴Mè Fàriziēn fyònnzi lè nun le: «Wù ni mbyebbi seansean ñdìkǎ' nye ywú. Wù yili wù lisà' tì ku' ɓwi' ywum?» Li, be kwannzi nun nyinnim shan nun.

Bwubè nyě ke mbyi Mvènnswàb nun

³⁵Yesù ywome le be kwannzâ ci-ɓwubè màzwùm nyinnim shan nun li, à kèn nun cinni, à shè lè nun le: «Wù tǎ zwùm tɛli lè **Mwen Mwum?**» ³⁶Mwum ne tòn ni fyònnzi lè nun le: «Mwumɲkǎm, shè mun wen ne **Mwen Mwum**, lè mún te' zwùm lè nun.» ³⁷Yesù shè lè nun le: «Cɛ fe', wù yennâ nun. Mún ne **Mwen Mwum**, mún ne ta leli lè wù jene.» ³⁸Mwum ne tòn ni kà shě le: «Mwumɲkǎm, mún yilâ.» Ke nyě yi, à swummi ke swi' Yesù. ³⁹Yesù shè lè nun le: «Mún kien ke ɲgyɔ' wan lè mún lin kyitǎ', lè mún ci le mè me' mè ci-ɓwubè welâ'. Ti lè ɓwum bye ɓa mè ci-ɓwubè, mún ci lè mè me' nyan dwo'ka'.» ⁴⁰Mè Fàriziēn ndo' be be kwe, be ywo' ñzǎ' le' ye Yesù be leli li, be cibbi lè nun le: «Bwi' ɓi tì ku' ɓwi' mè ci-ɓwubè?» ⁴¹Yesù fyònnzi lè ɓon le: «Byin ɓê mè ci-ɓwubè, ɓyin pyiè kǎn kyitǎ'. Son, ke nshè ye ɓyin she le ɓyin ɓa mè ci-ɓwubè, ɓyin pyiâ ma kyitǎ' nùn.»

Yesù ne ɗyi ci-mbòn mè ɓo' nyě ɲkǎmɲkǎm

10 ¹Yesù shè le: «Mún tà ɓyin shě lè leɲkǎm le, mwum ne yili nun ɗun ke ɲka' me ɓo' nun, son, ă ɗun kan ke ɲwum ɲka', à fyòn ɲka' ɗi nun, lè à ni ci-nywi'. ²Son, mwum ne tǎ ɗun ke ɲwum ɲka', nun ne ɗyi ci-mbòn mè ɓo'. ³Ci-mbòn ɲwum ɲka' wò nun yon, mè ɓo' ɓyon ywo' ɲkwu yon. À tǎ mè ɓo' ɓyon lon ke me myin nun. Li, à kwannzi ɓon wan. ⁴Kwan se nun kwannzime ɓon wan hwæn, à ɗunmi kèn ke swi' shan lè mè ɓo' ta nun ɗwon be nyè, ntwi' se be limmi ɲkwu yon. ⁵À si shilè she be ɗwon ɲkyìn mwum ke nyè, son, be ye fyòn ɲkyìn ni yean nun, ntwi' se ɓon limmi kan ɲkwu yon.»

⁶Yesù ɗwi ɓon ɲkǎn le' yi, son, be ywoti kan swum se nun yili nun leli ke nlim.

⁷Li, à kònnɗi shè be le: «Mún tà ɓyin shě lè leɲkǎm le mún ne ɗyi ɲwum ɲka' me ɓo'. ⁸Bwum bye seti ɓèn mbyi ke swi' shêm lè mún kà ɓɛn, ɓon hwæn, à ɓi mè ci-nywi' lè mè ci-ntǎ', son, mè ɓo' ywɔe kǎn mè ɲkwu nyan. ⁹Mún ne ɗyi ɲwum ɲka'. Mwum ne yě làn fya' yêm, mún yě nun swæti, à yě ɗun lè nun ne', à kònnɗi kwan, à cinni tì ji nyon wě tà she nun yili. ¹⁰Ci-nywi' tǎ kìn ɓǎ nun yib nywi', lè nun wu, lè nun kyasi. Ti lè mún, mún kìn ɲgyɔ' wan ɓǎ ɓwum cinni ñzison she ɲkǎmɲkǎm, ɓa ñcinni ye linnzi, son, ñcinni ye ɓon ye ɓo' ke nlim kwan hwæn.

¹¹«Mún ne ɗyi ci-mbòn mè ɓo' nyě ɲkǎmɲkǎm. Ci-mbòn mè ɓo' ɲkǎmɲkǎm tǎ ywi ce wě swum ɗindin ke ntwi' me ɓo' ɓyon. ¹²Ci-nci

she lòn nyě be fe mè pɔ' fya' lè à bon bon, kwan se nun tã ñwe' yenni le à tã kîn, à tã be, à nzwonnzi mè pɔ', à yean nun. Mè pɔ' yenme ñwe', be nywæli kyikyî, li, ñwe' dunmi bon bænni lè à tã ji. ¹³ Ci-she ni yean shiki nywi kwennà' nun lè le' me pɔ' ntwi' se nun tã nun su' she lòn shon cî. ¹⁴⁻¹⁵ Mùn ni ci-mbòdò mè pɔ' nyě ñkæmɱkæm. Mùn limmi mè pɔ' byêm, mè pɔ' byêm limmi tì ku' mún. Mbanmbɔ' ku', Ce nyèm limmi mun, mún limmi tì ku' nun. Ti lè mè pɔ' byêm, mún tã ywi ce wě swum dindin ke ntwi' yan. ¹⁶ Mùn cinni tì mè pɔ' byindɔ' bye ba ke cě ñka' ye nun, bon bi tì ku', a yili le mún kèn bon tweli. Be ye ñkwu yêm ywo, be kiin. Li, bòn mè pɔ' yě be mbɔ', ci-mbòdò mè pɔ' be ku' mbɔ'.

¹⁷ «Ce nyèm tà mun yili, ntwi' se mún tã ywi tweli wě swum dín bǎ mún yimni ywi be. ¹⁸ Mwum ndɔ' ne ba mún wu, mún ne ye ywi yili lè mún ne'. Mùn cinni ñkimmɔ' nyili ywi lè mún ne', mún cinni tì ñkimmɔ' nyimni ywi. Mwũ le' ye Ce nyèm fyii mún lè mún kiin cî, yon ye.»

¹⁹ Kwan se Yesù le' li, mè Yudà dunmi tì bon ne' kyiilea ke me ñkwìn nun. ²⁰ Mán ke nyinnim shan nun be le' le: «M̀p̀ùn m̀byebbi ndɔ' ni nun nywi. À ni titi'. Yen se byin ta mè ywi' nònnzi fi lè byin ta ywo'? » ²¹ Byindɔ' le' ku' làn nyan le: «Mwum ne ðyi lè m̀p̀ùn m̀byebbi ke nywi tà ka pa' nzǎ' le' yi lèli. Mwum ne ðyi lè m̀p̀ùn m̀byebbi nywi wòli kim à cì ci-bwubè dunmi yenni be?»

Mè Yudà be yili bon ywummɔ' Yesù lè mè ñgwɔ'

²² Be be ñgwìn nyenswæb ndɔ' ji ke Yèrusàlèm. Ke nji ye be be ñgwìn màzwùm ji nun, be be kwan se be fɔsàkà' nyenswæb ndwun b̃n. ñgwìn màzwùm be ji kwan se mbeb be kwèn. ²³ Ke kwe nyenswæb ndwun, Yesù be kènkèn kwe ke pà' ndwun nyě be ñwònddi lè nyenswæb mban. Be be pà' màzwùm lon le pà' Sàlòmôn. ²⁴ Mè Yudà kanndi nun ñgyɔ', be she lè nun le: «Beshe wù ne **Kristò**, mwum ne M̀v̀ènnswæb fyii, shè le bwi' ke mgbon nun, ntwi' se bwi' hwummá lè m̀b̀òndngǎ' nlimmi le beshe wù ne mwum màzwùm.» ²⁵ Yesù fyònnzi lè bon le: «Mùn shèâ ma byin mbyî nùn, son, byin tà ka mwù ké nlim. Mè she ne mún tã cì ke jin Ce nyèm nun tà mun shitàkwù ðyi. ²⁶ Son, byin tà ka mwù ké nlim, ntwi' se byin ba mè pɔ' byêm. ²⁷ Mùn limmi mè pɔ' byêm, be ta ñkwu yêm ywo, be ðwon mún nyè. ²⁸ Be ba ywi nyě ñgyinmbɔ' ywi. Mún, mún tà bon ñzison ðwùmðwùm fe, li, mwum ndɔ' wòli kan kim à fyòn bon ke fya' yêm. ²⁹ Ce nyèm ne fe mún bon fya' ni ñdwun, à làn ywum hwæn lè ñkimmɔ'. Li ne cì, mwum ndɔ' wòli kan kim à fyòn swum ndɔ' ke fya' yon. ³⁰ Mùn, bwi' lè Ce nyèm, bwi' bi swum fɔ'.»

³¹ Mè Yudà ywo' li, be sheli tì mè ñgwɔ' bǎ bon ywummɔ' nun nun. ³² Yesù kà shě lè bon le: «Mùn ciâ mè she nlwukea mèan lè ñkimmɔ' ye Ce nyèm fe mun; byin hwæn, byin yennâ nun lè mè me' nyin. Ke ntwi' yǎ she lwen se byin ye mún ywumma lè mè ñgwɔ' nun?» ³³ Mè Yudà fyonnzi lè

nun le: «A ba ntwi' she lwen ndɔ' se wù cí se bwi' yili bwi' ye wù wu nun, son, à si ntwi' se wù tã jin Mvènnswàb gwànnzi. Wù bǎ mwum wě bwi'? Yen se ci wù tã wù ne' tweli wě Mvènnswàb?» ³⁴ Yesù fyònnzi lè bon le: «Be kɔ' kan ke dèwà me lwuà shin nun le: “Mvènnswàb le' le: 'Byin bi wě mè mvènnswàb?” ³⁵ Bwi' limmi le mwum ndɔ' wòli kan à byinnò' swum se be kɔ' ke dèwà me lwuà nun. Bwum be Mvènnswàb be leli lè bon, bon be à shè le byi bi wě mè mvènnswàb. ³⁶ Ti lè mún, Mvènnswàb yàen mun, à fyii mún ke ngyɔ' zwem. Ti, a ci le, byin she le mún tã jin Mvènnswàb gwànnzi ke nyé nleli ye mún lele le mún ni Mwen Mvènnswàb? ³⁷ Mun shi she se Ce nyèm fe mún fya' lwinnzi, ba byin ke òlim lè mún. ³⁸ Son, beshe mún tã son lwinnzi, byin shi fe' òlim ké ke nywi yèm, twelèni she màzwùm wě swum nkaemkaem. Li, bǎ byin limmi seansean le bwi' lè Ce nyèm, bwi' bi swum fɔ'.»

³⁹ Ke kàmmi màzwùm nun, be ònmi mbyi kàbbi bǎ be bæn nun, son, à nywàli bon fya'.

⁴⁰ Yesù kònnɔ' kèn be ngyin òu' ne be ta lon le Jùrdèn, ke cici she Jân jimnze bwum nun, à kèn tòn kwe. ⁴¹ Bwum mèan be kìn ke cì shon lè be ta le' le: «Jân cí kǎn hilea ndɔ', kwo fɔ'. Son, ywum hwæn ye nun le' ke nywi mwum tòn ne yi leŋkàm.» ⁴² Li, bwum mèan ke nyinnim shan nun kee òlim lè nun.

Ywi Làzà

11 ¹⁻² Mwum ndɔ' be kwe, jin shon be le Làzà. À be tòn ke Bètànî bon lè mè ngyinni byon bye mè yib, Matà bon lè Màrî. Màrî màzwùm ne swie Nyeli nye' Yesù mlǎ' ngyɔ' me nwùm lwen ke me kwù, à kwon be lè ònywùn yon. A kien bèn nywɔ' ndɔ', Làzà pyisi ngyènnngwèn. ³ Mè ngyinni byon fyi mwum ndɔ' ke cí Yesù bǎ nyí ni she nyí le: «Nyeli nye', ngyè nlim nywù ni ngyènnngwèn.» ⁴ Kwan se Yesù ywɔ' òtwum yi, à shè le: «Ngyènnngwèn ywi se ban. Mwù ngyènnngwèn màzwùm yi le bǎ ye lisà' òtwu Mvènnswàb, ke nyé màzwùm ti ku', bwum ye Mwen Mvènnswàb twuli.» ⁵ Yesù yile Matà, ngyinni nyon Màrî lè tì lè Làzà òzwòzwò'. ⁶ Kwo fe' she nun ywɔe le Làzà ni ngyènnngwèn si, à nòn tì be ngyin bí ke cici se nun be nun. ⁷ Ke nyé yi, à kà shé lè bwesɔ' byon le: «Bwi' fyoènni be ke Jùdè.» ⁸ Bwesɔ' byon ywɔ' li, be fyonnzi lè nun le: «Nlisà', kwan làb kife' she mè Yudà bye kwe be yili bon wu wù lè mè ngyɔ', wù yili wù fyòn tì be kwe?» ⁹ Yesù fyònnzi lè bon le: «Nywɔ' tã ka òwùm ngyasi ye shikpon, a ken bèn kwàbbi nun? Mwum nyé tã kènkèn kwan se nywɔ' tã òwùm, mbà' tã ka nun swi, ntwi' se nun tã ngyanni she cě ngyɔ' zwem yenni. ¹⁰ Son, tì lè mwum nyé tã kènkèn kpon nun, mbà' yé nun swi, ntwi' se ngyanni ba tì.»

¹¹ Yesù mlǎ' òzǎ' le' yi, à kònnɔ' shè le: «Ngyènnngwèn Làzà tì dye dye, son, mún kènme bǎ mún yimnzi nun.» ¹² Bwesɔ' byon ywɔ' li, be kà shé lè nun

le: «Nyeli, beshe nun dŷeâ, à yě kimmɔ'». ¹³Yesù be yili nun she le Làzâ ywiâ ke nzǎ' le' ye nun be le' yi nun, son, bŷesɔ' byon be bákà' le à le' le dŷe se be ta dŷe gba' se. ¹⁴Li, Yesù pwæl̀̀̀' fon son me' le: «Làzâ ywiâ.» ¹⁵À kònnɔ' shè be le: «̀̀̀nim ta mún lwukea she Làzâ pyisi ñgwènngwèn lè mún bã kwe. M̀̀̀vènnswæb cìi son li ntwi' yin, bã byin te' zwùm lè mún. Bwi' kennèni le kwe cìi shon.» ¹⁶Mwen fæ' ndɔ' be kwe, jin shon be le Tòmasi, à shè lè bŷùlu bŷesɔ' Yesù le: «Bwi' kennèni ku', bã bwi' ywièni bwi' lè ñlisà' nye' mban.»

Yesù ne mwum nyě tá ñzison ñkæmñkæm fe

¹⁷Yesù bèn ke Bètànì lè be gwummâ Làzâ ke mbyù' nun, ñgyìn ti nyí. ¹⁸Bètànì be kǎn læbbi lè Yèrusàlèm, a wòli kan a ci mè kilòmetà lè. ¹⁹Ke nye mè Matà, mè Yudà be kwe mèan, bye kien bon ñlim flɔsi zwum ntwi' ywi ñgyinni nyan.

²⁰Kwan se Matà ywɔ' le Yesù ni bènna, à wa', à kèn nun bònngæa mbyi nun, son, Màrì lwæb be næm nun ñtònmi. ²¹Matà yenme Yesù, à shè lè nun le: «Nyeli, wú bē ke fe, ñgyinni nyēm ywiè kǎn. ²²Son, mún limmi le kwo fe' jene, M̀̀̀vènnswæb yě wù ywum hwæn ye wù yě nun cibbi fe.» ²³Yesù shè lè nun le: «̀̀̀gyinni nywù yě ywi yimni.» ²⁴Matà ywɔ' li, à fyònnzi lè nun le: «Mún limmi le ke mmlòkà' ñgyɔ' wan nun, à yě ywi yimni, bon lè bŷum bye ywiâ hwæn mban.» ²⁵Yesù kà shè lè nun le: «̀̀̀kimmɔ' nyimni bŷum ywi lè mfe yan ñzison ta mun wai ke fya'. Mwum nyě tá zwùm teli lè mún, kwo fe' nun ywi fe', à yě ñzison ñkæmñkæm cinni. ²⁶Mwum nyě tá zwùm teli lè mún, à tá tòn nzison ñkæmñkæm tòn, à bà tí ku' ywi nyě dŷùmdŷùm ywi. Wù tá ñlim ké lè le' màzwùm?» ²⁷Matà fyònnzi lè nun le: «À si li Nyeli nyèm, mún tá ñlim ké le wù ni **Kristò**, Mwen M̀̀̀vènnswæb, mwum ne be lè à yě bèn ke ñgyɔ' wan.»

Mkpanndi ye ñlim kpannde Yesù zwum

²⁸Kwan se Matà lele li, à kèn be næm. À bèn, à lon ñgyinni nyon Màrì ke kwi' nun, à shè lè nun le: «̀̀̀lisà' ni ke fi, à tà wú lon le wù kiin.»

²⁹Kwan se Màrì ywɔ' ñzǎ' le' yi, à wa' zwò m̀̀̀byimmi, à dúnmi kènnò' ke cì Yesù. ³⁰(Be lè Yesù dún kife' myi, à bi ku' kwe cìi se Matà cinne nun kwe.) ³¹Mè Yudà bye be næm nun bon lè Màrì bã be bonnzà' nun yenme le à wa' zwò, à kwan wan m̀̀̀byimmi li, be dúnmi nun dŷon nyè. Be be bákà' le à kènme kwe ke mbyù' ñgyinni nyon zwem.

³²Ke mbèn ye Màrì bèn ke cìi se Yesù be kwe, à yen nun, à switì nun me kwù, à shè lè nun le: «Nyeli, wú bē fe, ñgyinni nyēm ywiè kǎn.»

³³Yesù yen mbòki ne Màrì bon lè mè Yudà ta kwe, ñlim kpanndi Yesù zwum han, kon bŷu nun mwu. ³⁴À cibbi lè bon le: «Yǎ cìi se byin gwum nun nun?» Be fyonnzi lè nun le: «Mwumñkæm, kìn, wù yen cìi

màzwùm.» ³⁵Ke kwan màzwùm nun, Yesù dunmi kwe. ³⁶Mè Yudà yenme li, be dunmi shè le: «Cèèni fe' mbòkì nē nun yile nun.» ³⁷Son, byindo' ke nyinnim shan nun she le: «Mwum nyě cinni ñkimmò' ñwèlì mē ci-òwubē mē' wòle kan kim, à cì ywi bæen kan Làzâ?»

Ñyimmzi ye Yesù yimmze Làzâ ywi

³⁸Ñlim konndi ti Yesù kpanndi be zwum, à wa' kèn ke mbyû' nun. Cìci sē be gwumme Làzâ kwe, mvù ndò' se be, be ðwòke ñwum mvù màzwùm be lè gan ñgwò'. ³⁹Yesù yenme li, à shè le: «Ywùnnzèni gan ñgwò' ni.» Matà, ñgyinni ci-ywi ywòme li, à shè lè nun le: «Nyeli nyèm, be gwumme nun a ti ðyè ñgyin nyí, à ti nwùm jene nùn.» ⁴⁰Son, Yesù fyònnzi lè nun le: «Mùn shí kàn wu le wu kè ñlim lè mùn lè wù yě ñtwu Mvènnswàb yenni?» ⁴¹Li, be ywunnzi gan ñgwò' ni. Ke nyě yi, Yesù wasi mē' zwò, à shè le: «Ce nyèm, mùn tà wu osòkò' yili ntwi' se wù ywà ñkeli yēm. ⁴²Mùn, mùn limmi limmi le wù tã ñkeli yēm ywo kwan hwæn, son, mùn tã leli jene ntwi' ðwum be kanndi mùn be, bã bon limmi le wù nē fyii mùn.» ⁴³À leli hwæn, à kun lè ñkwu kimmi le: «Làzâ, kwaìn fi.» ⁴⁴Li, mwum nē be lè à ywià nùn kwaìn, mē fyã' lè mē kwù nun ðwili lè kwokwo, ñwum be ti ku' nun kpæmmi lè swum plé. Yesù kà shé lè bon le: «Sùleàni nun, byin donnzi nun à kèn nun.»

Mè ci-zwi' mē Yudà ta kwi' Yesù ji (Mt. 26.1-5; Mr. 14.1-2; Lk. 22.1-2)

⁴⁵Mè Yudà mēan bye kien ke cì Mârî, be yen ti ku' swum sē Yesù cìe, be ke ñlim ke nywi yon. ⁴⁶Son, byindo' ke nyinnim shan nun, be ken mè **Fàrizièñ** cinni, be she bon swum sē Yesù cìe. ⁴⁷Mè **Fàrizièñ** bon lè mè ci-zwi' mē ci-mfe sàtikà' ywòme li, be lon mè ci-ñkènnzi nyenswàb, be she lè bon le: «Mwum tòn nē ti yì hilea cì mēan. 'Bwi' ye cìèni le? ⁴⁸'Bwi' donnzi nun ðindin, lè ðwum hwæn ye ñlim ké ke nywi yon. Ke nyě yi, mè ci-zwi' mē suzàen bye Ròm ye ðēn, be twukà' nyenswàb ndwun nye' ñgyò', be kyasi ti ðwum bye ñgyò' nye' nun.» ⁴⁹Mwum ndò' be kwe nyinnim shan nun, jin shon be le Kàifì, nun nē be mwumñkàm mè ci-mfe sàtikà' nyenswàb ke ðwùm màzwùm nun. À ðyi, à shè lè bon le: «Mè mwù nyin ke ñshimma. ⁵⁰Byin yen kan le à si le' lwen ke cì shin le mwum mbò' ywi ke ntwi' ðwum bye ñgyò' nye' nun hwæn, lè be làkì ðwi' hwæn kyasi?» ⁵¹(Ñzã' le' ye nun leli yi be kàn nun kwean ñwum ke nyili yon nun. Ke nun be mwumñkàm mè ci-mfe sàtikà' ke ðwùm màzwùm nun, Mvènnswàb fēe nun ñkimmò' nleli ke mbyí le Yesù yě ywi ke ntwi' ðwum mē Yudà. ⁵²Son, à sue kàn ywi ntwi' ðwum mē Yudà, à ywi ti ku' bã nun ci ðwum Mvènnswàb bye cìci hwæn ke ñgyò' wan nun be fyonni swum fò'.)

⁵³Ñdikà' nywo' màzwùm, mè ci-zwi' mē Yudà sunndi ñwum fò' lè be ye Yesù wu. ⁵⁴Li nē ci, Yesù be kàn tí kènkèn ke nyinnim mē Yudà nun. À

kèn ke nsòn ndɔ' ye be ta lon le Èfràyím. Ñsòn màzwùm be ke nlim kyɔ'. Cìcì màzwùm se nun tɔn kwe bon lè ɓwesɔ' byon.

⁵⁵Be lè ñgyìn ne mè Yudá ye **Ñgwìn-ñkwan-Èjìb** ji ti kwukwæ'. Lè ñgyìn màzwùm kà wòli, ɓwum ðunmi wa' ke me nsòn nyan, lè be ken ke Yèrusàlèm, ɓá bon sannzi bon ne' wě tà she ɓè' shan yili. ⁵⁶Be be Yesù kæbbi. Kwan se bon ɓen ke nyenswæb ndwun, be ðunmi cibba' lè ɓwùlu le: «Byin ɓaka' le à yě ñgwìn ɓènni?»

⁵⁷Be lè mè ci-zwi' me ci-mfe sàtikæ' lè mè **Fàrizièn** sheâ le: «Beshe mwum ndɔ' limmi cìcì se Yesù ni kwe, à ci ɓwi' ñlimmi ɓá ɓwi' ken nun ɓènni.»

Ñswì ye Màrì swìe Yesù mlá' ñgwɔ' me nwùm lwen me kwù
(Mt. 26.6-13; Mr. 14.3-9)

12 ¹Be lè **Ñgwìn-ñkwan-Èjìb** nzwonme ñgyìn fyuru, Yesù wa' kèn ke Bètànì, cìcì se Làzâ, mwum ne nun yimnze ywi be tòn kwe. ²À ɓènme kwe, be fe nun ji. Matà ne be ji màzwùm kyìilea. Làzâ be ke nyinnim ɓwum be be ji lè Yesù mban. ³Màrì sheli kitɔ' letà mlá' ñgwɔ' me nwùm lwen se lòn mèan ndɔ'. Be cie mlá' ñgwɔ' màzwùm lè mè ndì ñgæ' ndɔ' ne be ta lon le **narù**. Màrì shelime mlá' ñgwɔ' yi, à swì Yesù yon ke me kwù. Ke nyě yi, à ðunmi kwon lè ñnywùn nyon. Nye hwæn lwin lè mè nwùm mlá' ñgwɔ' màzwùm. ⁴Mwesɔ' Yesù ndɔ' be kwe, jin shon be le Judà Ìskàrið, nun ne be lè à yě Yesù kyí. À ðyi, à shè le: ⁵«Yen se ci be kyì kan mlá' ñgwɔ' màzwùm lè lòn ñkæm ndu' nlè ɓá be fe mè ci-nzæmnzæm lòn yi?» ⁶À lele kán li ntwi' se nun be mè ci-nzæmnzæm nyæmmi, son, ntwi' se nun be làn nyon ci-nywi'. Nun ne be ñgwùm lòn ɓènni. Li, lòn ye be be kè ke nlim, à be yon jikea. ⁷Son, Yesù kà shě le: «Donnzi Màrì! À cii li ntwi' ñgyìn ne be ye mùn kèn gwùmmi nun. ⁸Byin ye be lè mè ci-nzæmnzæm kwan hwæn. Ti lè mún, ɓwi' ɓa be lè byin kwan hwæn.»

Ñji ye mè ci-zwi' me Yudà jie kwi' Làzâ

⁹Mè Yudá mèan ywɔ' le Yesù ni ke Bètànì. Li, be wa', be ken kwe. Be sue kán kèn kwe ntwi' Yesù, son, be kenne tì ku' ɓá bon yen Làzâ ne Yesù yimnze ywi nun. ¹⁰Mè ci-zwi' me ci-mfe sàtikæ' sunndi tì ku' ñwum fɔ', ɓá bon ɓi wu tì ku' Làzâ, ¹¹ntwi' se mè Yudá bye ke ñkwìn nyan nun kwean mèan, be ke ñlim ke nywi Yesù ntwi' Làzâ.

Ñɗun ye Yesù ðuen ke Yèrusàlèm
(Mt. 21.1-11; Mr. 11.1-11; Lk. 19.28-40)

¹²Shikpon fɔ', ñkwìn ɓwum mèan ndɔ' ye kien **Ñgwìn-ñkwan-Èjìb** ji ywɔ' le Yesù yě ɓèn ke Yèrusàlèm. ¹³Be ywɔ' li, be ken man sea linni, be ken nun ɓònngea mbyi nun lè be ta kun le: «Ñtwu be lè Mvènnswæb, à fe

floa lè mwum ne tă kìn ke jin shon nun, à fe floa lè nun ne m̀vèn ke ɲgyɔ' Ìzràèl nun.»

¹⁴Yesù cinne mwɛn mvàmndè ndɔ' kwe, à nàn nun nyè wě tà she be kɔ' ke d̄ewǎ Mvènnswàb nun le:

¹⁵«Lan **Siôn**, ba byin yi.

Ceèni fe', m̀vèn nyin tă kìn,

à ni ke mwɛn mvàmndè zwêm òtònmi.»

¹⁶Ke kwan màzwùm nun, ɓwesɔ' Yesù ywɔti kan swum se be lànznì. Son, kwan se M̀vènnswàb fee Yesù òtwu ke nnànnzi ye nun nànnze nun ke d̄eb, be ɓun le be kɔe son mbyì ke d̄ewǎ Mvènnswàb nun ke jin shon nun, be yen le se ciâ ku' li.

¹⁷Bwum be be kwe kwan se Yesù yimnze Làzâ ke ywi nun, à loin nun ke mbyù' nun, be kenne ɓwùlu swum se ɓon yenni shě. ¹⁸Li ne cie, ɓwum kiin nun ɓonɲgea mbyi nun, ntwi' se be lè be ywâ le à ciâ hilea màzwùm. ¹⁹Li ne ci, mè **Fàrizièn** ònmi leli ke nyinnim shan nun le: «Ceèni fe', mwum tòn ne lèân ɓwi'. Bwum ta nun su' læm sũ nyè.»

Ìjkæb ye mè Grê' ndɔ' kæbbe Yesù

²⁰Mè Grê' ndɔ' be ke nyinnim ɓwum be kin ke Yèrusalèm ɓǎ be d̄ɔa M̀vènnswàb ke ɲgwin nun. ²¹Be senndi ke moan Filipò nyě wai ke Bètsaidà she ke ɲgyɔ' Gàlilè nun, be she lè nun le: «Mwumɲkæm, ɓwi' yili ɓwi' yen Yesù.» ²²Filipò wa', à kèn Àndrê shě. Ke nyè yi, ɓon ɓi hwæn, be wa', be ken ti Yesù shě. ²³Yesù kà shě lè ɓon le: «Kwan wolâ jene she **Mwɛn Mwum** yě òtwu cinni ke nnànnzi ye M̀vènnswàb yě nun nànnzi ke d̄eb. ²⁴Mùn tà byin shě lè leɲkæm le ze' gwê ta su' nzwon kwan hwæn fɔ', ɓeshe be shi son ɓi ke ɲgyɔ'. Kwan se wù ɓime son, se ɓwum, se kwannzi ti me' yindɔ' be m̀ean. ²⁵Mwum ne tă òzison shon ndwæli, à yě son ɓwuli, son, mwum ne tă òzison shon tweli wě swum òin ke cě ɲgyɔ' wan, à yě òzison she d̄wùmd̄wùm cinni. ²⁶ɓeshe mwum ndɔ' yili nun ci she shêm, à d̄won m̀n nyè. Li, cici se mùn yě be kwe, ci-she nyèm be ku' kwe. Ce nyèm yě mwum ne tă she shêm cì twuli.»

Ñsannzi ye Yesù be le' ywi shon sannzi

²⁷Yesù kònndi shè be le: «Mwù kyeâ mùn, mùn yě cì le? Mùn wòli kim mùn shè lè ɓùba nyèm le à nywæsì mùn ke le' vènè' se ye mùn ɓènni nywi se nun? Son, a si ke ntwi' nyen vènè' màzwùm se mùn kiin ke cě ɲgyɔ' wan nun. ²⁸Ke à si li, Ce nyèm, cì jin swù be twun ke me' ɓwum.» Kwan se nun leli li, ɲkwu ndɔ' wai ke d̄eb lè ye ta le' le: «Mùn ciâ jin shêm be twun ke me' ɓwum, mùn yě ti kònndi cì se twu, a lan li.»

²⁹Ke ɲkwìn ɓwum ye be kwe swòli, ye konndi ti ɲkwu màzwùm ywo, ɓyindɔ' ònmi le' le: «M̀bàn ne hwæbli.» Byindɔ' le' ku' làn nyan le: «Cikpu' M̀vènnswàb ndɔ' ne leli lè nun.» ³⁰Yesù ywɔ' li, à shè lè ɓon

le: «Ëkwu ye byin ywɔ' ye, ye leli kǎn ntwi' yễm, son, ye leli ntwi' yin. ³¹Kwan she Mvènnswæb yě lan wan mè kǎ' lǎnnzi wolâ jene, à yě tì ku' m̀vèn ne ñgyɔ' wan fyinni. ³²Ti lè m̀n, m̀n yě ɓe lè ɓe nannzâ m̀n zwô, li, m̀n yě ɓwum hwæn swɔsi me kwù ɓyễm.»

³³(Yesù ɓe pa' ywi she nun yě ywi lisea ke nleli ye nun ɓe lèli yi nun.) ³⁴Kwan se ñkwìn ɓwum ywɔ' li, ɓe fyonnzi lè nun le: «Be lisa' ɓwi' ke dèwà me lwuà nun le **Kristò** yě tòn d̀wùmd̀wùm lè me', à ɓǎ ywi. Ke à si li, yen se ci wù shì le ɓe ye **Mwen Mwum** nannzi zwô? Wen ne **Mwen Mwum** màzwùm?» ³⁵Yesù kà shě lè bon le: «Ke kwan kwæ' nun, ñwanni ke ke nyinnim shin nun. Kènkeànni kwan se ñwanni màzwùm ke kwe, ɓǎ njimmi lækì ɓyin shìmmi, ntwi' se mwum nyě tǎ kèn ke njimmi nun limmi kan cìcì se nun tǎ kèn nun. ³⁶Yilèni ñwanni kwan se ɓyin ke lè son ke fya' ɓǎ ɓyin fyonnì ɓwum ɓe ton ke ñwanni nun.»

Mè Yudǎ ɓe kǎn ñlim kě ke nywi Yesù

Kwan se Yesù lele ñzǎ' le' yi, à kèn gwùmni lǎbbi lè bon. ³⁷Kwo fe' she nun cìe yì hilea mèan swi' shan si, ñkwìn ɓwum kèe kǎn ñlim ke nywi yon. ³⁸Se lannze li ɓǎ ñzǎ' le' ye Èzài, ci-nleli ke ñwum Mvènnswæb nun lekà' lwinni, ye nun lele le:

«Nyeli nye', yà mwum ne kèe mwù ke ntwum ye' nun?
Nyeli nye' liseá ñkimmɔ' yon lè wen?»

³⁹Be wòle kǎn kim ɓe ke mwù ke nlim, ntwi' se a si wě tǎ she Èzài m̀bɔ' màzwùm kònnde tì le' ke nywi yan le:

⁴⁰«Mvènnswæb shimndeá bon me' mwu, lè ɓe lækì yen,
à pǎlâ bon kon mwu, lè ɓe lækì ywum limmi,
shìkì ɓe yonni ke fya' yon nun lè nun kimnzi bon.»

⁴¹Èzài lele li, ntwi' se ɓe lè à yennâ ñtwu Yesù mbyî ke ndemndem nun, à ɓe le' li ke nywi Yesù.

⁴²Kwo fe' li, ke nyinnim me ci-zwi' me Yudà bon ne' nun, ɓwum mèan kee ñlim nywi Yesù. Son, ke bon ɓe mè **Fàriziè̃n** yi, ɓe kwàsi kan kě nlim shan pisean, ntwi' ɓe lækì bon fyinni ke nyenswæb nyan nun. ⁴³Ñtwu ye ta wài ke fya' ɓwum, yon ye bon yili, a lan ye ta wài ke fya' Mvènnswæb.

Ñzǎ' le' Yesù ye ɓwi' mè kǎ' lǎnnzi

⁴⁴Ke nyě yi, Yesù lele lè ñkwu kimmi le: «Mwum ne tǎ ñlim kě lè m̀n, ǎ tǎ ka su' kè ke nywi yễm, à tǎ tì ku' kě ke nywi mwum ne fyii m̀n. ⁴⁵Mwum ne tǎ mun yenni, à yennâ tì ku' mwum ne fyii m̀n. ⁴⁶M̀n, m̀n kiin ñgyɔ' wan wě ñwanni, ɓǎ mwum ne tǎ ñlim kě lè m̀n lækì tòn ke njimmi nun. ⁴⁷Beshe mwum ndɔ' tǎ ñzǎ' le' yễm ywo, li, ǎ kè kan mwù ke nlim, m̀n ne ɓa nun mè kǎ' lǎnnzi. Ntwi' se m̀n kiin kǎn cě ñgyɔ' wan lè m̀n lannzi ɓwum mè kǎ', son, m̀n kiin lè m̀n swæti ɓwum. ⁴⁸Mè kǎ' ye mwum ne tǎ mun d̀wì lè fyǎ' mè' ɓænni, nyě yili kan

ñzǎ' le' yêm. Ywum ye mûn liseâ ye nun mè kâ' lànzi nywɔ' mmlòkà' ñgyɔ' wan. ⁴⁹Ntwi' se mûn be kân leli lè mwù yêm, son, Ce nyèm ne fyie mûn, nun ne shæe mûn lè ñwum yon ywum ye mûn yě leli hwæn. ⁵⁰Mûn limmi le swum se nun shè mun ta ßwum ñzison she ðwùmðwùm fe. Li, swum se mûn tǎ shè, mûn tà son shě wě tà she se kwaen Ce nyèm ke ñwum.»

M̄bɔsi ye Yesù ɓɔse ɓwesɔ' ɓyon mè kwù

13 ¹Ñgwîn-ñkwân-Èjîb be lè à wilime nywɔ' màzwùm. Yesù limme le kwan wolâ she nun yě ñgyɔ' wan ðonzi, à kèn be ke ke Ce nyon. À be ßwum ɓyon ɓye cě ñgyɔ' zwêm yili ñzwɔnzwò', à yile ɓon a kèn ɓèn ke mmlòkà'.

²Kwæbbi wolime, Yesù ɓon lè ɓwesɔ' ɓyon ðunmi ji ji. Satèn be lè à ðuân ke nywi Judà ne mwên Simôn Ìskàrîô, ɓǎ nun kyí Yesù. ³Yesù limmi le Ce nyon Mvènnswæb ne fe nun ywum hwæn pæ' ke fya', à limmi tì le à wai ke fya' Mvènnswæb, lè à yě tì kònnɔ' fyònni be ke ci shon. ⁴À wa' zwò, à nywæ' plè ndwun nyon, à sheli plè nyě ðin, à kpæm ñkwù'. ⁵Ke nyě yi, à sheli peân, à lwo' mlâ' ke nlim, à ðunmi ɓwesɔ' ɓyon mè kwù ɓɔsi, lè à ɓon kwon be lè plè ne nun kpæmmi ke ñkwù' ni. ⁶À kîn ɓèn ke ywi Simôn Piêr, nun ni shè lè Yesù le: «Nyeli nyèm, wù ne ye mûn mè kwù ɓɔsi ðyě fya'?» ⁷Yesù fyònnzi lè nun le: «Swum se mûn tǎ ci se, wù limmi kan son jene, son, wù kà limmàkà' son lè kwan leân kwæ'.» ⁸Piêr shè lè nun le: «À si shilè, wù ɓà mun mè kwù ɓɔsi.» Yesù kònnɔ' tì nun fyònnzi le: «Mun shì wù mè kwù ɓɔsi, lè wù ɓà tì wù mwum nyèm.» ⁹Kwan se Piêr ywɔ' li, à shè lè nun le: «Nyeli nyèm, ke à si li, ɓa wù su' mûn mè kwù ɓɔsi, swi mun mwù, wù kònnɔ' tì ku' mûn mè fyà' ɓɔsi.» ¹⁰Yesù kònnɔ' tì nun shě be le: «Mwum ne ɓɔâ ɓɔ', kwæ' nywi shon si pwebbi, swum se nun yě ci, suku' m̄bɔsi me kwù. Byin ɓi pwibbɔa, son, ɓyin pweb kan ɓyin hwæn.» ¹¹(Be lè Yesù limmâ mwum ne yě nun kyí, li ne ci à shè le: «Byin ɓa pwibbɔa ɓyin hwæn.»)

¹²Kwan se Yesù ɓɔsi ɓon mè kwù hwæn, à sheli plè ndwun nyon, à swi be nywi, à kèn tòn nji'. À tònme nji', à shè lè ɓon le: «Byin limmi swum se mûn ci ɓyin se?» ¹³Byin ta mun lon le Ñlisà', ɓyin lon tì mûn le Nyeli nyin. Byin ɓwu kan mbyi, ntwi' se mûn ne ku'. ¹⁴Beshe mûn, mûn ne Nyeli nyin, mûn be tì ñlisà' nyin, mûn ne ɓɔsi ɓyin mè kwù, ɓyin ku', ɓɔsèni ku' ɓwùlu mè kwù ke nyinnim shin nun. ¹⁵Mûn lisea ɓyin m̄bòki ne ɓyin ye ðwon ke m̄bɔsi ye mûn ɓɔsâ ɓyin mè kwù nun. ¹⁶Mûn tà ɓyin shě lè leñkæm le, ci-she ndɔ' ɓǎ ñdwun, à làn ci-zwi' she nyon, shiki ci-mfyi be ku' ñdwun, à làn mwum ne fyi nun. ¹⁷Ke ɓyin limmâ ywum màzwùm jene, ɓyin ye be ke tòn lwen nun beshe ɓyin ci li.

¹⁸«Mûn kwùm kan ɓyin nùn, mûn limmâ ɓwum ɓye mûn yæn. Son, a yili le swum se be kœ ke ðewǎ Mvènnswæb nun lwinni, she be le' le:

“Mwum ne bwi' ta ji ji bwi' lè nun swon pen fɔ', à ti be ci-byinnì nyèm.”
 19 Mùn tà byin mè ywi' dɔwosi jene lè swum màzwùm kà bɛn, bǎ kwan se se ye bɛn, byin limmì le mùn ni wɛ̀ tà she mùn ni ku'. 20 Mùn tà byin shɛ̀ lè lɛŋkǎm le mwum ne tǎ mwum ne mùn tǎ fyi yɛ̀, à tà ti ku' mùn yɛ̀, nyɛ̀ tǎ mun yɛ̀, à tà ti ku' mwum ne fyii mùn yɛ̀.»

Judà ne be mwum nyɛ̀ yɛ̀ Yesù kyɛ̀
(Mt. 26.20-25; Mr. 14.17-21; Lk. 22.21-23)

21 Ke nyè ye Yesù lele ñzǎ' le' yi, ñlim byiti nun zwum, à shè lè bɔwɛsɔ' byon le: «Mùn tà byin shɛ̀ lè lɛŋkǎm le ke nyinnim shin nun, mwum mbɔ' ndɔ' ni kwe nyɛ̀ yɛ̀ mùn kyɛ̀.» 22 Ke nywɔ' ye bɔwɛsɔ' byon ywɔ' li, kon kyeâ bon mwu, be ðunmi bon ne' cɛ̀eni me' me', ntwi' se be limmi kan mwum ne nun tǎ le' lè nun. 23 Ke nyinnim bɔwɛsɔ' Yesù nun, nyɛ̀ nun yile ñzwɔnzwɔ̀ be ke ke shon ñtɔn. 24 Simôn Piêr nwiti nun ŋwum le nyɛ̀ ni cibbi lè Yesù le nyɛ̀ ni tǎ le' lè wen? 25 Li, mwesɔ̀ ni nɔnmɔ̀ Yesù nywi, à cibbi lè nun le: «Nyeli nyèm, kè yà mwum ne wù tǎ le' lè nun?» 26 Yesù fyɔnnzi lè nun le: «Mùn yɛ̀ mbu' pen ndwɔ̀ ke mla' ndwɔ̀ nun. Mwum ne mùn yɛ̀ fe, lè nun ne.» Yesù lɛme li, à nyè' mbu' pen, à ndwɔ̀ nun ke mla' ndwɔ̀ nun, à fe lè Judà, mwen Simôn Ìskàriô. 27 Kwan se Judà yè mbu' pen ni, Satæn ðun nun nywi. Ke nyè yi, Yesù shè lè nun le: «Swum se wù yili wù ci, kimnzi mè fyà', wù ci son mbyimmi.» 28 (Bye fɔ' be be kwe swon pen swɔli, be ywɔti kan mwù nzǎ' le' màzwùm. 29 Ke Judà be ci-ŋgwùm lɔn, màn byindo' be bǎkà' le Yesù yili nun fyi nun, bǎ nyɛ̀ ni ken ywum ŋgwɛn hwinni, kè shindo', nyɛ̀ ni ken mè ci-nzæmnzæm ywum ndɔ' fe.) 30 Judà yème mbu' pen ni, ke fya' zwem ñnywɛn, à kwan wan. Ywum màzwùm be lǎnnzi li kpon nun.

Ñzǎ' le' nyɛ̀ nywæb

31 Ke nyè ye Judà kwan wan, Yesù shè lè bɔwɛsɔ' byon bye fɔ' le: «Jene, **Mwen Mwum** cinnâ ñtwu, bɔwum hwæn ye ñtwu yon yenni, be yen ti ku' ñtwu Mvènnswæb ke nywi yon. 32 Ke nyen ye be ye ñtwu yon yenni li, Mvènnswæb nun ne' yɛ̀ ti ku' bon ñtwu mwen nyon lisea. À bǎ kǎe' bǎenni lè ñci yi. 33 Bwen byêm, bwi' ke fe' tɔn bwi' lè byin kwan kwæ'. 'Byin kà kǎbkà' mùn, son, ywɔ̀eni fe' swum se mùn shèâ mbyɛ̀ lè mè Yudà. Mùn shèe bon le: “Byin wòli kan kim byin kiin cɛ̀ mùn kènme nun.” Mùn tà tí ku' byin ñzǎ' le' mbɔ' màzwùm kwùbbi jene. 34 Ñzǎ' le' nywæb ne mùn yili mùn she byin, à ni le, yilèni bɔwùlu ke nyinnim shin nun. Mbòkì ne mùn yilá byin, yilèni tí ku' bɔwùlu ke nyinnim shin nun. 35 Ke nyili ye byin ye bɔwùlu yili ke nyinnim shin nun li, wen ne hwæn yɛ̀ yen, à limmì le byin bi bɔwɛsɔ' byêm.»

Yesù tǎ Simôn Piêr mbyinnɔ̀ ye nun yɛ̀ nun byinnɔ̀a shɛ̀
(Mt. 26.31-35; Mr. 14.27-31; Lk. 22.31-34)

36 Ke nyè yi, Simôn Piêr cibbi lè Yesù le: «Nyeli nyèm, wù kènme fen?» Yesù fyɔnnzi lè nun le: «Wù wòli kan kim jene wù ðwon mùn ke cici se

mùn kènme nun, son, wũ kà dƿonkà' mùn.» ³⁷Simôn Piêr kà cibbi lè nun le: «Nyeli nyèm, mǔn wòli kan kim mùn dƿon wù jene ntwi' yen? Kwo ƒe yili ƒe wu ƒe' mún ke ntwi' ywù, mùn ƒà wù donnzi.» ³⁸Yesù cibbi lè nun le: «Leŋkàem se she wù le' le ƒe wu ƒe' wu, wù ƒà mun donnzi? Mùn tà wu shě lè leŋkàem le, lè dƿim nyí kà dƿí ñkwu, wù yě ƒyinnò' kàmmi lè le wũ limmi kan mun.»

Yesù ne dƿi mbyi nyě kènme cí Mvènnswàb

14 ¹Yesù shè lè ƒwesò' ƒyon le: «Ba ƒyin ton lè mè mƿyonŋga' ke me nlim nun, tɛlèni zwùm lè Mvènnswàb, ƒyin te' ti ku' zwùm lè mùn. ²Mùn kènme ƒyin yi cí tòn ƒòsi ke nye Ce nyèm, ntwi' yi cí tòn yi kwe mèan. A shiè ƒe leŋkàem, mún sheè kǎn ƒyin. ³Kwan se ye ƒe, lè mùn ƒòsà ƒyin yi cí tòn yi, mùn yě ƒyòin ƒe, mùn kìn ƒyin tweli ƒǎ ƒyin ton ku' cìci se mùn ni kwe. ⁴Ti lè cě mùn kènme nun, ƒyin limmi mbyi.» ⁵Tòmási ywò' li, à shè lè Yesù le: «Nyeli nyè', ke ƒwi' limmi kan cìci se wù kènme nun, ƒwi' ye cì le, lè ƒwi' kà limmi mbyi?» ⁶Yesù shè lè nun le: «Mùn ne' ne dƿi mbyi, mùn ƒe ti ci-leŋkàem, ñzison ta mún wai fya'. Mwum ndò' wòli kan kim à kìn ke cí Ce nyèm, à shi mùn lèan ke fya'. ⁷Mwum ne limmà mún, à limmà ku' Ce nyèm. Ñdunmi ye jene, ƒyin limmà Ce nyèm, ƒyin konndi ti ku' nun yenni.»

⁸Filipò ywòme li, à shè lè nun le: «Nyeli nyè', swum se ƒwi' suku' yili, à si le wù lisà' ƒwi' Ce nywù.» ⁹Yesù ƒyònnzi lè nun le: «Filipò, kwan ti læbbi, ƒwi' ƒi ƒe ƒwi' lè ƒyin, wũ limmi kife' mún dƿé? Wù le' le mùn lisà' wù Ce nyèm ntwi' yen? Ywò' fe', mwum ne yennà mún, à yennà ku' Ce nyèm. ¹⁰Wũ limmi kan le ƒwi' ƒi swum ƒò', ƒwi' lè Ce nyèm? Mùn shě lè ƒyin le ñzǎ' le' ye ta mun kwean ŋwum ye, mún tà ka yon leli lè mwù yèm. Son, ke mbæti ye ƒwi' ƒi bæti lè Ce nyèm, nun ne ta she shon lwinnzi ke nywi yèm. ¹¹Ñshè ye mun shè ƒyin le ƒwi' lè Ce nyèm, ƒwi' ƒi swum ƒò' ye, twelèni yon lè le' leŋkàem. 'Byin shi fe' son tweli lè le' leŋkàem ke ntwi' se mùn ne le' li, twelèni son lè le' leŋkàem ntwi' she se Ce nyèm tǎ lwinnzi ke nywi yèm. ¹²Mùn tà ƒyin shě lè leŋkàem le mwum ne tǎ ñlim ké ke nywi yèm, à yě ku' pa' she se mùn tǎ cì cí. À yě ma cì, se lan li, ntwi' se mùn kènme tòn ke ke Ce nyèm. ¹³Ywum ye ƒyin ye cibbi ke jin shèm nun hwæn, mùn yě yon cí, ƒǎ Mwen lisà' ñtwu Ce nyon lè ƒwum. ¹⁴Beshe ƒyin cibbi swum ndò' ke jin shèm nun, mùn yě ƒyin son ƒe.»

Le' she dƿi nywi mbën Mpùn Nsanmi

¹⁵«Beshe ƒyin ta mún yili, ƒyin kà lwinnzakà' ñzǎ' le' ye mùn tà ƒyin shě. ¹⁶⁻¹⁷Mùn yě Ce nyèm cibbi le à ƒyìi ƒyin Ci-mkpa' nyě dín ndò' ti, ƒǎ nun ton kwan hwæn lè ƒyin. Ci-mkpa' màzwùm ne dƿi Mpùn nyě tǎ ƒwum mbyi leŋkàem liŋsea, Mpùn nyě lan wan wòli kan ƒe yé, ntwi' se ƒe tà ka nun yenni, shìkì ƒe limmi ku' nun. Ti lè ƒyin, ƒyin limmi nun, ntwi' se à ni ƒyin nywi. À tǎ tòn lè ƒyin mban.

18 «Ke à si li, mún bà byin donnzi kyi wě mè ndu', mún yě tì kònni kìn be cì shin. 19 Ke kwan kwæ' nun, lan wan ba tí mún yenni, son, ti lè byin, byin ye tì mún yenni be, ntwi' se, ke mún ni ñzison, byin ku', byin ye be ñzison. 20 Kwan se ñgyìn màzwùm kà wòlàkà', byin ye limmì le bwi' lè Ce nyèm, bwi' bi swum fò', byin limmì tì ku' le byin bi bæti lè mún, mún ku', mún be m̀bæti lè byin.

21 «Mwum ne tã ñzǎ' le' yêm bænni ke mwu, à d̀wonnzi yon, nun ne ta mun yili. Mwum ne tã mun yili, Ce nyèm yě ku' nun yili, mún ku', mún yili tì ku' nun, mún b̀wùmni nun swi'.»

22 Judà (ba kì nyě be be lon le Judà Ìskàriô) d̀yi, à shè lè nun le: «Nyeli nye', se ci le, wù yě su' b̀wùmni ke swi' she', shikì wù b̀wùmni ku' ke swi' lan wan?» 23 Yesù fyònnzi lè nun le: «Beshe mwum ndò' tã mun yili, à yě ñzǎ' le' yêm d̀wonnzi. Ce nyèm yě nun yili, bwi' lè Ce nyèm, bwi' ye kìn tòn ke cì shon. 24 Mwum ne tã ka mún yili, à tã ka ñzǎ' le' yêm d̀wonnzi. Ñzǎ' le' ye byin ta ywò' ye ta mun kwean ñwum ye, ye tã ka wa' ke ñwum yêm nun, son, Ce nyèm ne fyii mún, nun ne ta mun yon fyì.

25 «Mùn shèà byin ñzǎ' le' yi kwan se bwi' ke tòn lè byin se. 26 Ce nyèm yě byin M̀pùn Nsanmi fyì ke jin shêm nun bǎ nun kpa' byin. Nun, à yě byin ywum hwæn pæ' lisea, à cì byin bunngà' ywum hwæn ye mún shèà byin.

27 «Ba byin ton lè mè mfyonngà' ke me nlim nun, shikì yi kwen byin. Mún tã byin ñlim f̀sòsi. M̀f̀sòsi nlim yêm ba wě ye lan wan ta byin f̀sòsi, f̀sòsà ne mún ke nywi ne mún tã byin fe. 28 Byin ywòà kǎn she mún shèe byin le mún kènme, son, mún yě tì fyòin be ke cì shin? Beshe byin yilè mún, ñlim lwukaè byin lè she mún kènme ke ke Ce nyèm, ntwi' se Ce nyèm ne d̀yi ñdwun, à làn mún. 29 Mún sannzà tì byin ywum màzwùm jene lè ye kà b̀én, bǎ kwan se yon ye b̀én, byin twe' ñzǎ' le' yêm lè le' leŋkǎm. 30 Kwan nzwonme kwæ', lè mún bà tí sèàn shě lè byin, ntwi' se m̀vèn ne ñgyò' wan b̀ènme. Á cinni kan ñkimmò' ndò' ke nywi yêm, 31 son, se yili le lan wan limmì le mún yili Ce nyèm, mún cì tì ku' wě tã she nun shèe mún. Weàni zwò, bwi' kennèni.»

Yesù ni wě ñjì ngæ' ñkǎmngkǎm

15 1 Yesù shè lè b̀wesò' byon le: «Mùn ne d̀yi ñjì ngæ' ñkǎmngkǎm, Ce nyèm ne mwum ne tã ñjì ngæ' ni pwebsi. 2 Mè ñwæm nyě tã ka yì gwùm sean, à tã nun kwìò' ñgyò'. Ke nyě yi, à f̀sòsi nyě tã yì gwùm sean lè nun f̀sòsi san lwen. 3 Li ne ku', ñlìsà' ywum ye mún lisea byin, ye fyòsà byin sanmi. 4 Bèèni bæti lè mún wě tã she mún ni m̀bæti lè byin. Ñwæm ngæ' ndò' wòli kan kim ye d̀yi yon kyishon, ye san gwùm, yon shi be bæti lè ñkwù' ngæ'. Swum fò' se ku', byin shi be bæti lè mún, byin wòli kan kim byin cinni mè kìkàen nlwukea.

5 «Mùn ne d̀yi wě ñjì ngæ', byin be ku' wě mè ñwæm. Mwum ne d̀yi m̀bæti lè mún, mún be ku' m̀bæti lè nun, mwum màzwùm tã mè le'

nlwukea cí kwan mèan hwæn, ntwi' se byin wòli kan byin ci swum ndo' shìkì mún shì fyà' yêm ké nlim. ⁶Mwum ne shì be mbæti lè mún, be ye nun dŵò' pèdìn wě ɲwæm ɲgæ' ye be kwi, be dŵi' yon twu', yon wumme, be sheli yon, be ken win banni nun, ye buki. ⁷Beshe byin bi bæti lè mún, byin bæen tì ku' ñzǎ' le' yêm, swum se byin yili, cibbèni son, byin ye cinni. ⁸Kwan se byin cinni mè kíkàen nlwukea kwan mèan hwæn, byin lisà' tì ku' le byin bi bŵesò' byêm, ke kwan màzwùm nun se bŵum ta ñtwu Ce nyèm yenni. ⁹Wě tà she Ce nyèm tà mun yili, mbanmbò' ku', mún tà ku' byin yili li. Tòènni, byin limmì le mún yili byin. ¹⁰Mbòkì ne mún be ñywòli ke nzǎ' le' Ce nyèm nun, mún limmì le à yili mun, mbanmbò' ku', a byin be ywòli ke nzǎ' le' yêm nun, byin ye tòn kwan hwæn ke nlimmì nun le mún yili byin.

¹¹«Ñshè ye mún shè byin ñzǎ' le' màzwùm yi, à yi bǎ ñdàli yêm shè byin, mè nlim nyin be ñlwinni lè ñdàli. ¹²Yilèni bŵùlu ke nyinnim shin nun wě mbòkì ne mún yilâ byin. Ñzà' le' ne mún yili mún she byin, à ni. ¹³Mbòkì nyili làn kan nyě mwum tǎ mwù yon kyí ntwi' nyili me ɲwè byon. ¹⁴Byin bi mè ɲwè byêm, beshe byin ci swum se mún tà byin shè. ¹⁵Mún tà ka tí byin lon le mè ci-she byêm, ntwi' se ci-she limmì kan mè mbàkà' ci-zwi' she nyon. Mún tà byin fyòlon lon le mè ɲwè byêm, ntwi' se mún lišèà byin ywum hwæn ye mún yuseà fya' Ce nyèm. ¹⁶Byin be yàen kan mún, son, mún ne yàen byin bǎ byin ken, byin ci mè she nlwukea nyě yě mwù kwannzi. Li, ywum hwæn ye byin ye Ce nyèm cibbi ke jin shêm nun, à yě byin yon fe. ¹⁷Swum se mún yili ló' le byin ci, à si le byin yili bŵùlu ke nyinnim shin nun.»

Lan wan be Yesù byìnnzi bon lè bŵesò' byon

¹⁸«Beshe lan wan ta byin byìnnzi, limmèni le mún ne be sete byìnnzi. ¹⁹Byin bê ke læm lan wan nun, be yilè byin, ntwi' se byin ta bòn kènni byin lè bon. Son, mún yànnâ byin ke nyinnim shan nun, mún pà' byin ke bòn nyan nun. Li ne ci, be ta byin byìnnzi nun. ²⁰Nyèlèni fe' ñsè' le' zwum ke nzǎ' le' ne mún shè byin le: “Ci-she wòli kan à be ñdwun, à làn ci-zwi' she nyon.” Beshe bon be mún vènè' yennzi, be ye ku' byin yennzi be li. Beshe bon be ywòli ke nzǎ' le' yêm nun, be ye ku' be ywòli ke nzǎ' le' yin nun, mbanmbò' li. ²¹Be ye byin vènè' yennzi, ntwi' se byin bi bŵum byêm, be ye cì li, ntwi' se bon limmì kan mwum ne fyii mún. ²²Mún shiè bèn, mún sannzi bon ñzǎ' le' Mvènnswǎb, mè kǎ' Mvènnswǎb bænnè kǎn bon lè ntwi' byebbi ne bon ta cì. Son jene, ke bon ywâ swum se mún sannzâ bon, be ba tí mè kwèm cinni. ²³Mwum ne tà mun byìnnzi, à tà ku' Ce nyèm byìnnzi. ²⁴Mún shiè bèn, mún cì mè she ne mwum ndo' cì kife' mbyî, mè kǎ' Mvènnswǎb bænnè kǎn bon ntwi' byebbi ne bon ta cì. Son jene, be yennâ mè she nyèm ne mún tǎ cì, be ti bwi' byìnnzi, bwi' lè Ce nyèm. ²⁵Son, ywum màzwùm ta lànnzi hwæn li

bã swum se be kɔ' ke dɛwã Mvènnswàb nun lwinni, she be kɔ' le: “Be ta mun byinnzi ngyɔ' din.” »

²⁶ Yesù kònddi tì bon shě le: «Mwum ne yě byin kɪn kpea yě bèn. Ci-mkpa' màzwùm ni Mpùn nyě tã mbyi leŋkàm lisea, à tã wai cě Ce nyèm. Mun bènme cě Ce nyèm, mún yě Ci-mkpa' ni fyii lè nun d̄yi shitàkwù shêm. ²⁷Ti ku' lè byin, byin ye tì ku' shitàkwù shêm d̄yi, ntwi' se byin be lè mún òdikà' ndunmi she shêm, a kiin bèn d̄yě.»

16 ¹«Mún shè byin ywum ton yi lè byin làkì wòn ke ntè' zwum yin nun. ²Be ye byin fyinni ke me nyenswàb me Yudà nun. A su' kan li, son, kwan ndɔ' kà wòlàkà' she bwum be ye byin wu, be ye bàkà' le bon bi ta she Mvènnswàb lwinnzi ke ncì ye li nun. ³Be ye byin ywum màzwùm cĩ hwæn li, ntwi' se bon limmi kan Ce nyèm, shikì be limmi mún. ⁴Son, mún tà byin yon shě li, ntwi' kwan se kwan ncì yi ye bon wòli fya', byin bun le mún shèe byin òzǎ' le' màzwùm mbyí tin.»

She se Mpùn Nsanmi yě cì

«Mún sete kǎn byin òzǎ' le' yi shě ke ndunmi ntwi' se bwi' be bwi' lè byin cici fɔ'. ⁵Jene, mún fyònme mún be ke cě mwum ne fyii mún. Ke nyinnim shin nun, mwum ndɔ' cibbi kan ku' mún le mún kènme fen? ⁶Son, ke nleli ye mún leli yi, byin bi lè mè yiye ke nlim. ⁷Kwo fe' she byin bi lè mè yiye si, mún tà byin leŋkàm shě ke nshè ye mún shè le, a si le' lwen ke cì shin le mún ken, ntwi' se mun shì kèn, lè Ci-mkpa' nyin bã bènni. Son, mun kèn, lè mún yě byin nun fyii. ⁸Kwan se nun yě be lè à bènna, à yě lan wan byebbi ne bon ta cì lisea, à lisà' tì bon swum se d̄yi ke mbyi nlwen nun, à sannzi tì bon le mè kǎ' Mvènnswàb bi kwe. ⁹Swum se nun yě bon lisea ke nywi byebbi ne bon ta cĩ, à si le be tà ka òlim kě ke nywi yêm. ¹⁰Ti lè swum se yen mbyi nlwen, à si le mún yě mún fyòn be ke cĩ Ce nyèm, li, byin ba tì mún yenni. ¹¹Swum se nun yě tì ku' bon shě ke le' me kǎ' nun, à si le mè kǎ' bænnâ òvèn nyě ngyɔ' wan.

¹²«Mún cinni tì òzǎ' le' mèan ye mún yili mún she byin, son, byin wòli kan byin bæn yon mwu jene. ¹³Son, kwan se Mpùn nyě tã bwum mbyi leŋkàm lisea yě bèn, à yě byin kènnzi ke mbyi màzwùm nun. À bã leli lè mwù yon, son, à yě byin ywum ye nun ywɔâ shě, à sannzi tì ku' byin ye kà bènka'. ¹⁴À yě byin òtɔw yêm lisea, ntwi' se ywum ye nun yě ywɔ' ke n̄wum yêm, yon ye nun yě byin kɪn shě. ¹⁵Ywum ye Ce nyèm cinni hwæn pæ', yêm ye. Li ne ci, mún shè le Ci-mkpa' ni yě byin ywum ye nun ywɔ' ke n̄wum yêm kɪn shě.»

Mè yiye ye fyònni òdàli

¹⁶ Yesù kònddi shè lè bwesɔ' byon le: «Ke kwan kwæ' nun, byin ba tì mún yenni, son, kwan ye tì kònddi làn be kwæ', byin ye tì mún yenni.»

¹⁷ Bwesɔ' byon ndɔ' ywɔme li, be d̄unmi leli ke nyinnim shan nun le:

«Ñzàè' le' ne nun shè ðwi' le ke kwan kwæ' nun, ðwi' ba tí nun yenni, son, kwan ye tí kònni làn be kwæ', ðwi' ye tí nun yenni, ñzàè' le' ni lisa' le yen? Ndo' ne nun kònni tí le' le à si ntwi' se nun fyònmè nun be cě Ce nyon, à lisa' tí ku' le yen? ¹⁸Kwan kwæ' se nun le' si, sù màzwùm ni ku' le yen? Swum se nun yili nun le', ðwi' tà ka ðwi' son ywo.»

¹⁹Yesù yen le be yili be ðunmi nun ñzàè' le' cibbea, à kà cibbi lè bon le: «Ñzàè' le' ne mún le' le, ke kwan kwæ' nun, byin ba tí mún yenni, son, kwan ye tí kònni làn be kwæ', byin ye tí mún yenni, ni ne byin ta jiji ke mwu yin nun? ²⁰Mún tà byin shě lè leŋkàem le byin kà kwekà, lè byin ta nywi ywætea, son, lan wan ye be lè ñlim lwèn. Byin ye be lè mè yiye ke nlim nun, son, mè yiye byin ye fyònni ñdàli. ²¹Kwan se ye tã mlib kwènni, à tã be lè ngu swi', ntwi' se nun limmi le kwan nyen vèné' shon wolâ. Son, kwan se ta be lè mwèn kweân, ñlim ta nun fye lè ñkwènni nywi ye nun be ywo', ñlim ðunmi nun lwukea ntwi' se nun limmi le mwum kweân ke ñgyô' wan. ²²Mbanmbo' ne ku' lè byin, byin ði jene lè ngu swi', son, kwan se ðwi' ye tí kònni cinnèni be, ñlim ye byin lwukea. Li, mwum ndo' bà byin ñdàli yin kwinnzi.

²³«Kwan se ñgyìn màzwùm kà wòlàkà', byin ba tí mún ñzàè' le' ndo' cibbea, kwo ke nywi swum fò' ndo'. Mún tà byin shě lè leŋkàem le ywum hwæn ye byin ye Ce nyèm cibbi ke jin shêm nun, à yě byin yon fe. ²⁴Han a kiin bèn jene, byin cibbi kife' swum ndo' ke jin shêm nun. Cibbèni, byin ye cinni, li, mè nlim nyin yě lwinni lè ñdàli.»

Yesù lèân ñgyô' wan lè ñkimmô'

²⁵«Mún shè byin mè le' ni hwæn ke me ñkàen le' nun. Son, kwan ndo' kà wòlàkà' she mún bà tí leli lè byin ke me ñkàen le' nun, mún yě byin ywum ye ðyi ke nywi Ce nyèm sannzi seansean. ²⁶Kwan se ñgyìn màzwùm yě wòlì, byin ye ywum ye byin yili cibbi lè Ce nyèm ke jin shêm nun. Ba byin bakà' le mún yě nun ðoa ntwi' yin, ²⁷ntwi' se nun ne' yili byin. À yili byin li, ntwi' se byin yili mun, byin limmi tí seansean le mún wai cì shon. ²⁸Mún wae ke cì Ce nyèm, mún kiin ke cě ñgyô' wan. Jene, mún ðonnzime ñgyô' wan, mún fyònmè mún be ke cì Ce nyèm.» ²⁹Bweso' byon kà shě lè nun le: «Ènhèn, ke ñdonnzi ye wù ðonnzà ñlèli ye ke me ñkàen le' nun, ðwi' ti wù ywoti jene lwèn. ³⁰Jene, ðwi' limmi le wù, wù limmi ywum hwæn, wù limmi ma swum se ðwum yili, shiki be cibbi wù. Son se ci, ðwi' limmi seansean le wù wai cì Mvènnswàeb.»

³¹Yesù ywo' li, à fyònnzi lè bon le: «Byin limmâ jene li? ³²Cèèni fe', kwan ndo' ta kìn, se wolâ ma nùn, she byin ye nywæli kyikyì, wèn ne hwæn kèn be ðwon nyon. Ke kwan màzwùm nun, byin ye mún ðonnnzi kyì. Son, mún tà ka tòn kyì, ntwi' se ðwi' bi kwan hwæn ðwi' lè Ce nyèm. ³³Mún shè byin ñzàè' le' yi, bã byin cinni fwa ke mbæti ye byin bi bæti lè mún nun. Byin ywime vèné' yenni ke ñgyô' wan nun, son, kpæmmèni me', ntwi' se mún lèân ñgyô' wan lè ñkimmô'.»

Yesù tà Mvènnswæb keli ntwi' bwesɔ' byon

17 ¹Ke nyè ye Yesù leli li, à wasi mɛ' zwò, à dunmi déb ce lè à tà le' le: «Ce nyèm, kwan wolâ jene. Lìsa' òntwu yêm, bã mún ku', mún lisà' tì ku' làn nyèm òntwu ywú. ²Ntwi' se wù fee mún òkimmɔ' ke nywi bwum hwæn, bã mún ci bwum bye wù feâ mún fya' hwæn, be cinni òzison she ðwùmðwùm. ³Sù nzison ðwùmðwùm màzwùm ni le be limmì wù, wù ne ðyi Mvènnswæb nyě òkàmòkàm, wù kyiswù, be limmì tì ku' mún, Yesù Kristò ne wù fyii. ⁴Mún lisea òntwu ywú ke ògyɔ' zwêm, mún mlâ she se wù fee mún fya' le mún ci. ⁵Jene, Ce nyèm, fyòsi tì mún be ke ntwu ye mún be nlim moan ywú, kwan se be lè ògyɔ' wan kwan kifè!. ⁶Bwum bye wù yænne ke nyinnim lan wan, wù fe mún ke fya', mún ciâ be limmì wù. Be be bwum byú, wù fee mún bon fya', be ywâ òwum ywú. ⁷Be limmâ jene le ywum ye wù fe mun fya' hwæn, ye wai ke cì swù, ⁸ntwi' se mún shèâ bon òzæ' le' ye mún ywæ òwum ywú, be yeâ yon. Jene, ògyi ðan, be limmâ lè lèòkàm le mún wai ke cì swù, be yili tì ku' le wù ne fyii mún.

⁹«Mún tà wu ða ke nywi yan. Mún tà ka wù ða ke nywi lan wan, son, ke nywi bwum bye wù fe mun fya'. Mún tà wu ða ke nywi yan, ntwi' à bi bwum byú. ¹⁰Bwum bye mún cinni hwæn bi byú, bye wù cinni ku' hwæn, à bi byêm. Bwum ta òntwu yêm yenni ke nywi yan. ¹¹Mún bà tí mún be ke nyinnim lan wan nun, ntwi' mún kímè be ke cì swù. Tì lè bwum byêm, be ye tòn be ke nyinnim lan wan nun. Ce nyèm ne ðyi òsanmi, konni be lè bwum be wù fee mún fya' bi ke òkimmɔ' jin swù nun, òkimmɔ' ye wù fee mún fya', bã bon be swum fɔ' wě tà she bwi', bwi' lè wù, bwi' bi swum fɔ'. ¹²Kwan se be lè bwi' ke bwi' lè bon, mún be konni lè bon ke òkimmɔ' jin swù nun, òkimmɔ' ye wù fee mún fya'. Mún kànnzi tì bon, nyě òbɔ' ndɔ' bwu kan, a shi ku' be nyě be lè à yě ku' bwu, bã swum se be kɔ' ke ðewâ Mvènnswæb nun lwinni. ¹³Jene, mún fyònme be ke cì swù. Mún tà leli li lè bwesɔ' byêm, kwan se mún ke fe ke ògyɔ' wan nun, bã òdàli yêm shè bon, be bɔ' tì ku' ke nlim. ¹⁴Mún sannzâ bon òzæ' le' ywú, li, lan wan ta bon byinnzi, ntwi' se bon ba ke bòn nyan nun wě tà she mún ku', mún bà ke bòn nyan nun. ¹⁵Mún tà ka wu ða le wù pæ' bon ke nyinnim lan wan nun, son, konni lè bon lè Satæn læki bon pòkea. ¹⁶Be ba ke bòn lan wan nun, wě tà she mún ku', mún bà ke bòn lan wan nun. ¹⁷Lìsa' bon lèòkàm, bã bon be bwum byú ògyinmbɔ'. Lèòkàm màzwùm si òzæ' le' ywú. ¹⁸Mún fyíâ bon ke nyinnim lan wan nun, wě tà she wù fyii ku' mún kwe. ¹⁹Mún fe mún ne' hwæn lè wù ke ntwi' yan, bã bon ku', be be bwum byú lèòkàm.

²⁰«Mún tà ka wù su' ða ke nywi yan, mún tà tí ku' wù ða ke nywi bwum bye kà kèkà' ònim ke nywi yêm ke nywɔ' ye be kà ywòkà' òzæ' le' yan nun. ²¹Mún tà wu ða bã bon hwæn, be be swum fɔ'. Ce nyèm, mún

yili le be be bæti lè bwi' wě tà she wù ni m̀bæti lè m̀n, m̀n be ku' m̀bæti lè wù. M̀n yili le be be swum fɔ', bǎ lan wan limmì le wù ne fyii m̀n.

22 M̀n cià le be cinni ñtwu ye wù fee ku' m̀n, bǎ be be swum fɔ' wě tà she bwi', bwi' lè wù, bwi' bi swum fɔ'. 23 M̀n ni m̀bæti lè bon, wù ni ku' m̀bæti lè m̀n, bǎ bon fɔsi be swum fɔ'. Li, lè lan wan limmì le wù ne fyii m̀n, be limmì tì ku' le wù tà bon yili wě tà she wù yili ku' m̀n.

24 «Ce nyèm, wù feà m̀n bon fya', m̀n yili le be be ku' ke cici se m̀n yě be kwe, bǎ bon yen ñtwu yêm, ñtwu ye m̀n cinni ke fya' ywù, ntwi' se wù yile m̀n lè wù kà fɛe ngyɔ' wan. 25 Ce nyèm ne d̄yi ñlwinni, lan wan limmi kan wu, son m̀n, m̀n limmi wu, b̄wum ton be limmì tì ku' le wù ne fyii m̀n. 26 M̀n cià bon be limmì wù, m̀n yě tì ku' kòndi bon wù lisea, bǎ m̀b̀ki ne wù yili m̀n, be yili tì ku' b̄wùlu li, m̀n, m̀n be ku' m̀bæti lè bon.»

M̀bæn ye be bæne Yesù

(Mt. 26.47-56; Mr. 14.43-50; Lk. 22.47-53)

18 ¹ Yesù leli hwæn, be wa' kèn bon lè b̄wesɔ' byon, be sheɔ' mwen ndɔ' be kwe. Yesù kènnɔ' kwe bon lè b̄wesɔ' byon. ² Judà ne be lè à yě nun kyĩ, be lè à limmâ cici m̀zwùm lwen, ntwi' se Yesù be kènkì kwe gba' bon lè b̄wesɔ' byon. ³ Li ne Judà kènnɔ' kwe lè læm me suzæn ke nyè, kòndi lè mè m̀b̀n bye mè ci-zwi' me ci-mfe sàtikæ' lè mè Fàriziën fyie. Be be lè mè kaki me fyà', kòndi lè mè læm nun. Mè kwòn wì be tì bon me fyà'. ⁴ Li, Yesù ne be lè à limmâ ywum ye ye lannzi nywi yon nun hwæn, à yenme bon, à gòɔ' bon, à cibbi lè bon le: «Wen ne byin ta kæb?» ⁵ Be fyonnzi lè nun le: «Bwi' ta Yesù, mwum ne wai Nàzàré' kæbbi.» Yesù ywɔ' li, à shè lè bon le: «M̀n ne.» Ke læm shan nun, Judà ne yě nun kyĩ be kwe. ⁶ Ke nshè ye Yesù shè bon le: «M̀n ne», nywi gholà' bon, be ðunmi fyòn be lè nyè, lè be ta pyità' ngyɔ'. ⁷ Yesù kòndi tì lɔ' bon cibbi be le: «Wen ne byin ta kæb?» Be fyonnzi lè nun le: «Bwi' ta Yesù, mwum ne wai Nàzàré' kæbbi mè.» ⁸ Yesù shè tì bon be le: «M̀n ne mè. Beshe m̀n ne byin ta kæb, ðonnzèni b̄wum be m̀n nyè be, be ken bon.» ⁹ Li ne ñzà' le' Yesù lwinni, nyè nun lele le: «Ce nyèm, b̄wum be wù fee m̀n fya' hwæn, nyè m̀bɔ' ndɔ' b̄wu kan.»

¹⁰ Simôn Piêr be lè kàfà' fya', à zwè' son ke fàèb nun, à kwæ' ci-she ci-mfe sàtikæ' ndwun ndɔ' ywi' she fya' ji. (Jin ci-she m̀zwùm be le M̀likwusi.)

¹¹ Son, Yesù yenme li, à shè lè Piêr le: «Kě kàfà' swù be ke fàèb nun. Wù bàka' le m̀n bǎ vènè' she Ce nyèm yili le m̀n yen se yenni?» ¹² Ke kwan m̀zwùm nun, ñkwìn me suzæn lè ci-zwi' nyan, kòndi lè mè m̀b̀n bye mè Yudà kèe bon nyè, be bæne Yesù. Be bæne nun, be kpæm nun mè fyà' lè mè ndu'. ¹³ Be wa' kwe, be seti kèn lè nun cì Anà. Anà m̀zwùm ne shee mwen Kàifi. Kàifi ne be mwum ñkæm mè ci-mfe sàtikæ' ke ðwùm m̀zwùm

nun. ¹⁴Kàifi ni ne shee lè mè ci-ɲkènnzi nyenswæb le: «À si le' lwen ke ci shin le mwum m̀bɔ' ywi ke ntwi' ɓwum bye ɲɲɔ' nyɛ' nun hwæn.»

M̀byinnò' ye Piêr byinnɔe le nun ɓá mwesò' Yesù
(Mt. 26.69-70; Mr. 14.66-68; Lk. 22.55-57)

¹⁵Simôn Piêr bon lè mwesò' Yesù ndɔ' be Yesù ɗwon nyè. Mwumɲkàm mè ci-mfe sàtikàè' limme mwesò' Yesù nyè m̀bɔ' ni. Li ne ci, à ɗuɗn ke ɓònmbiyi mwumɲkàm mè ci-mfe sàtikàè' bon lè Yesù, kwù fɔ'. ¹⁶Son, Piêr lwæbbe be ke bàbà nun, moan ɲwum ɲka'. Li, mwesò' Yesù nyè m̀bɔ' ni kwain, à kèn m̀lib ne be ɲwum ɲka' ɓòn yenni, à ci be ɗunnzi Piêr. ¹⁷Ci-mbòn ɲwum ɲka' ni shè lè Piêr le: «Wù ku', wù ɓá mwesò' mwum ne be ɓæn ni?» Piêr fyònnzi lè nun le: «Ayi, m̀n ne ɓan.»

¹⁸M̀bòki ne mbeɓ be kwèn kwe, mè ci-she lè mè m̀bòn hwæn ɓanni win, be ɗunmi yon wo. Piêr ku' senndò' kwe ke shan, à ɗunmi ku' win wo lè ɓon m̀ban.

Ñcibbi ye mwumɲkàm mè ci-mfe sàtikàè' cibbe Yesù mè le' ndɔ'
(Mt. 26.59-66; Mr. 14.55-64; Lk. 22.66-71)

¹⁹Ke kwan màzwùm nun, mwumɲkàm mè ci-mfe sàtikàè' ɗunmi Yesù mè le' ndɔ' cibbea ke nywi ɓwesò' byon, kònnɗi lè ke nywi ywum ye nun be lisà'. ²⁰Ke fyònnzi le' Yesù nun, à shè lè nun le: «M̀n be leli lè ɓwum hwæn ke bàbà nun, m̀n lisà' tì ywum ke me nyenswæb me Yudà nun, lè tì ke nyenswæb ndwon nyɛ' nun, ke cici se mè Yudà hwæn ta swòli kwe. M̀n gwùmnnzi kan swum ndɔ'. ²¹Ti, se ci le, wù tà mun pa' me ñcibbi màzwùm cibbea? Ñdikà' wù cibbi lè ɓwum bye ywɔe swum se m̀n be shè, ntwi' se ɓon be limmi ywum ye m̀n shèe ɓon lwen.»

²²Kwan se Yesù be ñzæ' le' yi shè, ci-mbòn ndɔ' ne be nun moan ke, à ɓwùm nun ɓen ɲwum, à cibbi lè nun le: «Li ne be ta fyònnzi lè mwumɲkàm mè ci-mfe sàtikàè'?» ²³Yesù fyònnzi lè nun le: «Shè mun swum se m̀n gwànnzi ke nleli yêm nun. Son, ɓeshe m̀n gwànnzi kan swum ndɔ', yen se wù ɓwùm mun ɓen ɲwum nun?»

²⁴Ke nyè yi, Anà ci be ken lè Yesù ke cì Kàifi ne mwumɲkàm mè ci-mfe sàtikàè', lè à ke lè mè fyà' kpimmea.

Simôn Piêr kònnɗi tì byinnò' le nun limmi kan Yesù
(Mt. 26.71-75; Mr. 14.69-72; Lk. 22.58-62)

²⁵Ke kwan màzwùm nun, Simôn Piêr be win wo. Be cibbi lè nun le: «Wù ku', wù ɓá mwesò' mwum tòn ni?» Piêr byinnò', à shè le: «Ayi, m̀n ne ɓan.» ²⁶Ci-she mwumɲkàm mè ci-mfe sàtikàè' ndɔ' be kwe. À be ke ndu' lim mwum ne Piêr kwæe ywi'. À shè lè Piêr le: «M̀n yenne kàn wu ke mwen ndem nun, byin lè Yesù?» ²⁷Piêr fyònnzi tì be lè nun le nyí ni tã ɓwèlèò' ɗin. Ke fya' zwem ñnywèn, ɗyim nyi kwò'.

Mbèn ye 6e 6enne lè Yesù ke swi' Pilatwù
(Mt. 27.1-2, 11-14; Mr. 15.1-5; Lk. 23.1-5)

²⁸Shikpon hwili lè kpõn, 6e wa' lè Yesù ke cǐ Kàifi, 6e ken lè nun ke cǐ gwemná, jin shon 6e le Pilatwù. Son, mè ci-zwi' me Yudà sèm kan kwù shan kwe d'won nyon, ntwi' 6e làkì 6è' nyenswæb nyan sèmnzi, li, 6e wòli kan tí kim 6e ji **Ḷḡwìn-ḡkwan-Èjìb**. ²⁹Li ne cie, Pilatwù kwan ke sèm shon nun, à kènnò' ke cǐ shan. À 6ènmè, à cibbi lè 6on le: «Byin kin fe lè mwum tòn ne. Yǎ le' 6yebbi se nun cǐ?» ³⁰Be fyonnzi lè nun le: «Nun shiè 6e ci-ncǐ 6yebbi, 6wi' kièn lè nun ke cǐ swù?» ³¹Pilatwù shè lè 6on le: «Shelèni le nun, 6yin ken nun mè kà' lànnzi lè 6yin ne', wě tà she l'wà nyin yili.» Mè ci-zwi' me Yudà fyonnzi 6e lè nun le: «Bwi', 6wi' wòli kan kim 6wi' she le 6e wu mwum ndò'.» ³²Li ne ḡkæn le' ye Yesù 6e leli ke nywi ywi ne nun yě ywi lwinni.

³³Be nyě yi, Pilatwù duòn 6e sèm nun, à lon Yesù, à cibbi lè nun le: «Wù ne d'yi m'vèn mè Yudà?» ³⁴Yesù fyònnzi lè nun le: «Wù tà son leli ntwi' se se wai wù ke nlim nun, kè wù ywò son ke ḡwum mwum ndò'?» ³⁵Pilatwù shè lè nun le: «Wù yen mun, mún ni mwum Yudà? Ḷḡwìn 6wum 6yù lè mè ci-zwi' me ci-mfe sàtikà', 6on 6e kin wù kě ke fya' yêm. Yen se wù cǐ?» ³⁶Yesù fyònnzi lè nun le: «Ywò' shêm 6a she ḡgyò' wan. Se 6í she cǐ ḡgyò' wan, 6wum 6yêm læbbè mè kwòn, 6ǎ 6e làkì mún kènnzi ke swi' me ci-zwi' me Yudà. Son, li ne 6an. Ywò' shêm 6a she cǐ ḡgyò' zwem.» ³⁷Pilatwù kà shě lè nun le: «Ke à si li, wù ni m'vèn?» Yesù fyònnzi lè nun le: «Se kwan wu ḡwum le mún ni m'vèn. 6e ye mún, mún kiin ke cǐ ḡgyò' wan, 6ǎ mún su' leḡkæm leli. Mwum ne tá mbyi leḡkæm d'won tá swum se mún tá shè ywo.» ³⁸Pilatwù ywòme li, à cibbi lè nun le: «Yen se 6e ta lon le leḡkæm?»

(Mt. 27.15-31; Mr. 15.6-20; Lk. 23.13-25)

Kwan se Pilatwù lele ñzǎ' le' yi, à kwaìn tí 6e wan. À kènnò' ke cǐ me Yudà, à shè lè 6on le: «Mún, mún yen kan mún le' 6yebbi ndò' ke nywi mwum tòn ni. ³⁹Son, 6è' shin yili le kwan se **Ḷḡwìn-ḡkwan-Èjìb** wòlime, mún kwannzi 6yin ci-nye njè ndò', m'bo'. Li, 6yin yili mún pǎ' fyà' lè m'vèn mè Yudà?» ⁴⁰Ke nywò' ye mè Yudà ywò' li, 6e d'unmi kun le: «Ba wù pǎ' fyà' lè nun. Bàràbàs ne 6wi' yili le wù pǎ' fyà' lè nun.» Bàràbàs màzwùm, ci-mfyònnǎ' ywum lè kim ne 6e.

Ñlannzi ye 6e lannze Yesù mè kà'

19 ¹Li, Pilatwù cǐ 6e ken Yesù 6o lè ḡgwà'. ²Mè suzæn sheli yì lwon, 6e twon tàm ndò' lè yon, 6e swon Yesù nun mwu, 6e konndi tí nun gân pèan ndò' swí nywi. ³Be kwemmi lè nun, 6e wummi swi' shon, 6e d'unmi nun kòlea, lè 6e ta le' le: «Bwi' ta wù webbi, m'vèn mè Yudà.» 6e

konndi tî nun yî ßen ßwùmmɔa ɲwum. ⁴Pilatwù kònddi tî lɔ' kwean ße, à shè lè ɲkwìn ßwum le: «Ywɔ̀enì fè', mùn yè ßyin nun kwannzi fe wan, ßá ßyin limmi le mún cinni kan nun le' ßyebbi ndɔ' nywi.»

⁵Ke nyè yi, Yesù kwaìn wan. À ße lè tàem ne ße twoin lè yî lwon ke mwu, à ße tî lè gân pèan si nywi. Pilatwù kà shě lè ßon le: «Cèèni fè', mwum màzwùm ne.» ⁶Son, kwan se mè ci-zwi' me ci-mfe sàtikàè' lè mè mßòn yen nun, ße ðunmi kun le: «Ywummɔ' nun ɲgæ' mè ßɔɔ' zwem, ywummɔ' nun ke ɲgæ' mè ßɔɔ' zwem.» Pilatwù ywɔ' li, à kà shě lè ßon le: «Shelèni nun, ßyin ywummɔ' ku' nun lè ßyin ne', ntwi' se mún, mún cinni kan mún le' ßyebbi ndɔ' ke nywi yon.» ⁷Mè Yuda ywɔme li, ße fyonnzi lè nun le: «Bwi' cinni lwuà nye' ndɔ'. Ke lwuà màzwùm nun, à si kɔa le se cibbi le à ywi, ntwi' se nun shèe le nun ni Mwen Mvènnswæb.» ⁸Kwan se Pilatwù ywɔ' ɲzæ' le' màzwùm, yi yæki nun ðun mbyî zwum. ⁹À ðuɔ̀n ße sèm shon nun, à cibbi lè Yesù le: «Wù wa' ku' fèn?» Son, Yesù yè kan nun ɲwum. ¹⁰Pilatwù kà shě lè nun le: «Mùn ne wù yili kan wù yè mùn ɲwum? Wù limmi kan le mùn cinni ɲkimmɔ', mùn pàè' fyà' lè wù? Mùn cinni tî ɲkimmɔ' le mùn ci ße ywummɔ' tî wù ɲgæ' mè ßɔɔ' zwem?» ¹¹Yesù ywɔme li, à fyònnzi lè nun le: «Wù cinni kan ɲkimmɔ' ndɔ' ke nywi yèm, a shi ße ye Mvènnswæb ne fe wu fya'. Li ne ci, mwum ne kîn mùn fe fya' ywù, nun ne ci ßyebbi, à làn wù.»

¹²Ñdiká' ndunmi kwan màzwùm, Pilatwù ðunmi mè mbyi kibbea ßá nun pàè' fyà' lè Yesù. Son, mè Yuda ðunmi tî shè ße lè ɲkwu kimmi le: «Wu pàè' fyà' lè mwum tòn ne, lè wù ßá ɲwè mvèn ndwun ne ke ɲgyɔ' Ròm. Mwum ne tã nun ne' lon le m̀vèn, à ni ci-ßyìnni mvèn ndwun.» ¹³Ke nywɔ' ye Pilatwù ywɔ' ɲzæ' le' yi, à ci le ße kwannzi Yesù wan, nun ne' kèn tòn ke gba' nlin me kàè' zwem, ke cìcì se ße ße lon le lwùmmɔ' me mblé. (Ke le' me Èbrù nun, ße ße son lon le Gàbatà.) ¹⁴Ñgwìn-ɲkwan-Èjib, ße lè à wilime nywɔ' màzwùm. Nywɔ' lwinnime, Pilatwù shè lè mè Yuda le: «M̀vèn nyin ni ti ni.» ¹⁵Son, ße ðunmi tî kun ße le: «Wu nun, wu ßwi' nun, ywummɔ' nun ɲgæ' mè ßɔɔ' zwem.» Pilatwù ywɔ' li, à fyònnzi lè ßon le: «Byin yili le mùn ywummɔ' ßyin m̀vèn nyin ke ɲgæ' mè ßɔɔ' zwem?» Mè ci-zwi' me ci-mfe sàtikàè' fyonnzi lè nun le: «Bwi' cinni kan tî m̀vèn ndɔ' mbyî, suku' m̀vèn ndwun ne ke ɲgyɔ' Ròm.» ¹⁶Li, Pilatwù fe ßon Yesù fya', ßá ße ken nun ywummɔa ke ɲgæ' mè ßɔɔ' zwem.

Ñywummɔ' ye ße ywummɔe Yesù ke ɲgæ' mè ßɔɔ' zwem
(Mt. 27.32-44; Mr. 15.21-32; Lk. 23.26-43)

Li, ße twe' Yesù, ¹⁷ße fe nun ɲgæ' mè ßɔɔ' nyon ɲgun, ße kwan myi lè nun, ßá ße ken lè nun ke lwùmmɔ' ndɔ' se ße ße lon le ɲgwɔ' mwù. (Ke le' me Èbrù nun, ße ße cìcì màzwùm lon le Gòlgòtá.) ¹⁸Kwe ne mè suzàen ywummɔ' Yesù ke ɲgæ' mè ßɔɔ' zwem. ße ywummɔ' tî ku' ßwum ßi ndɔ' kwe, kwan fɔ' nun, nyè m̀bo' fya' ji Yesù, nyè m̀bo' ku' ke fya' mè'.

19Pilatwù cì bɛ kɔ' ŋɔ' ndɔ', bɛ ken yon yili kɛ mwu ŋɔɛ' mɛ bɔtɔ' Yesù. Ñzǎ' lɛ' yɛ bɛ kɔɛ bɛ lɛ: «Yesù, mwum nɛ wai Nàzàrê', m̀vèn mɛ Yudà.»

20Mɛ Yudà bɛ làn kwe mɛan lɛ bɛ ta ŋɔ' yi nzanŋgea, ntwi' se cici màzwùm bɛ kǎn lǎbbi lɛ myi. Bɛ kɔ' ŋɔ' màzwùm kɛ lɛ' mɛ Èbrù nun, kɛ lɛ' làtɛn nun lɛ tì kɛ lɛ' grê' nun. 21Mɛ ci-zwi' mɛ ci-mfɛ sàtikà' yɛnme li, bɛ ken Pilatwù shɛ lɛ: «Sɛ ba lwɛn she wù kɔ' lɛ: “M̀vèn mɛ Yudà”, ñdikà' wù kɔ' lɛ: “Mwum tòn nɛ lɛ' lɛ nun ni m̀vèn mɛ Yudà.” » 22Pilatwù fyònnzì lɛ bon lɛ: «Swum se mùn kɔâ yɛ ku' tòn kwe kɔa li.»

23Kɛ nyɛ yɛ mɛ suzǎn ywummɔ' Yesù kɛ ŋɔɛ' mɛ bɔtɔ' zwɛm, bɛ she mɛ plɛ byon byɛ ðin, bɛ kyiila' bon kɛ nyinnim shan nun, bon nyí. Bɛ she tì ku' plɛ nyon nyɛ ndwun nyɛ bɛ gwùm ðin, tǎ' ðun kan nlim. 24Mɛ suzǎn bi ðunmi leli kɛ nyinnim shan nun lɛ: «Ba kì bwi' yætɛni plɛ ni, ñdikà' bwi' ðwièni wɛ bi bǎ bwi' yɛn mwum nyɛ yɛ nun she.» Li nɛ swum se bɛ kɔɛ kɛ ðɛwǎ Mvènnswǎb nun lwinni, she bɛ lɛ' lɛ:

«Bɛ kyiileâ mɛ plɛ byɛm byɛ ðin.

Ti lɛ plɛ ndwun nyɛm, bɛ ðwi wɛ bi.»

Swum se mɛ suzǎn cie, à si.

25Kɛ moan ŋɔɛ' mɛ bɔtɔ' Yesù, mon nyon bɛ kwe ñdyimi, bon lɛ mon sò' nyon, kònnɔ' lɛ Màrì, myí Klòpàsì, lɛ tì lɛ Màrì nyɛ wai kɛ Màdàlà. 26Yesù cɛ, à yɛn mon nyon. Kɛ moan mon nyon, à yɛn tì ku' mwesò' nyon nyɛ nun yili ñzwɔ'. À shɛ lɛ mon nyon lɛ: «Mon, mwɛn nywù nɛ.» 27À shɛ tì ku' lɛ mwesò' nyon ni lɛ: «Mon nywù nɛ.» Kɛ kwan màzwùm nun, mwesò' ni twe' nun, à kɛn lɛ nun ðwon nyon. 28Kɛ nyɛ yi, kɛ nlimmì yɛ Yesù limmì lɛ she shon mlɔâ jɛnɛ, à shɛ lɛ: «Ñlim mla' ta mun fyɔ.» Li, à lwinnzi swum se bɛ kɔ' kɛ ðɛwǎ Mvènnswǎb nun. 29Kwe cici màzwùm, kòn ndɔ' bɛ kwe ðyi lɛ bǎ' sǎbbi nlim. Mɛ suzǎn swonnzò' kwùsa' kɛ nlim, bɛ swɔ' son kɛ zwi' pɛ' ndɔ', bɛ nǎmnnzò' Yesù son kwe zwô. 30Kwan se nun nywon bǎ' si, à shɛ lɛ: «She shɛm mlɔâ hwæn.» Kɛ nyɛ yi, à swòsì mwù, m̀pùn mɛ yinnì nyon mlò'.

Ñɔwo yɛ suzǎn ndɔ' ðwoe Yesù pwu lɛ kwòn

31Ŋgyìn mɛ yinnì mɛ Yudà bɛ lɛ à wilime nywɔ' màzwùm. Li, mɛ ci-zwi' mɛ Yudà yile kǎn lɛ bɔwum byɛ bɛ ywummɔɛ kɛ mɛ ŋɔɛ' mɛ bɔtɔ' zwɛm, ŋgyìn mɛ yinnì ni cinni bon kwe, ntwi' se ŋgyìn màzwùm bɛ ŋgyìn ndwun. Li, bɛ wa', bɛ ken Pilatwù cibbi lɛ nyí ni ci lɛ bɛ bi ken mɛ mkpa' bɔwum màzwùm blòkea, bɛ pilà' bon kɛ mɛ ŋɔɛ' mɛ bɔtɔ' zwɛm.

32Li, mɛ suzǎn bɛn, bɛ blòkà' mɛ mkpa' bɔwum byɛ bɛ ywummɔɛ lɛ Yesù kɛ kwan fɔ' nun. 33Kwan se bon bɛn kɛ cì Yesù, bɛ yɛn lɛ à ywiâ ñdikà' ŋwé, li nɛ ci bɛ blòka' kan nun mɛ mkpa'. 34Son, kɛ nyinnim mɛ suzǎn nun, nyɛ m̀bɔ' ndɔ' ðwo nun pwu lɛ kwòn. Kɛ fya' zwɛm ñnywɛn, mlá' lɛ mvǎb bai ŋgyɔ'. 35Mwum nɛ tà byin ywum ton yɛ sannzi, à yɛnne yon lɛ ze', à tǎ shitàkwù màzwùm ðyi, bǎ byin cinni swum se byin yɛ ñlim kɛ

lè son. Ywum ye nun tà byin shě yi, à yi lɛŋkàem. Nun ne' limmi le à tà lɛŋkàem shě. ³⁶Ywum màzwùm lean hwæn li, bǎ swum se be kœ ke dèwǎ Mvènnswæb nun lwinni, she be le' le: «Kwo fe' web shon fɔ', be ba blò.» ³⁷Be kɔ' tî ke cìcì ndɔ' ke dèwǎ Mvènnswæb nun le: «Be ye mwum nyě bon dwo lè kwòn yenni.»

Ŋkè ye be kee Yesù ke mbyù' nun

(Mt. 27.57-61; Mr. 15.42-47; Lk. 23.50-56)

³⁸Be nyě yi, Jòsê', mwum ndɔ' ne wai ke Àrimàtê, kèn Pilatwù dɔwɔn Yesù cibbi. (Jòsê' màzwùm be mwesò' Yesù ndɔ', son, ǎ be kǎn lisà' le nun ni mwesò' nyon, ntwi' se nun be mè ci-zwi' me Yudà yi.) Pilatwù ywɔme swum se Jòsê' cibbi si, à yili. Li, Jòsê' kèn dɔwɔn sheli. ³⁹Nìkòdê̄m, mwum ne kien Yesù yenni nywɔ' ndɔ' kpon nun, bèn ku' bon lè Jòsê', à shiù yi pa' mèwu me nwùm kyikyì, yon bì. Be lè be fyinnɔà yon cìcì fɔ'. Bæm mæwu me nwùm màzwùm be kyibli ñzwɔ'. ⁴⁰Bwum bì màzwùm sheli dɔwɔn Yesù, be bwi' son ke kwokwo nun lè be swiâ son mèwu me nwùm màzwùm nywi, wě tà she mè Yudà ta cì kwan se bon yili bon gwum mwum ndɔ'. ⁴¹Ke cìcì se be ywummœ Yesù ke ŋgæ' mè bɔtɔ' zwêm, mwɛn ndem ndɔ' be kwe. Ke mwɛn ndem màzwùm nun, mbyù' ndɔ' be kwe nyě be gwùm kife' mwum ndɔ' mbyì nlim. ⁴²Ke ŋgyìn mè yìnni mè Yudà be lè à wilime nywɔ' màzwùm, be sheli dɔwɔn Yesù, be ken son gwùmmi kwe, ntwi' se mbyù' màzwùm be kwukwæ'.

Ñyìmni ye Yesù yimne ywi

(Mt. 28.1-10; Mr. 16.1-8; Lk. 24.1-12)

20 ¹À be shikpon fɔ' hwili lè kpòn, be lè shikpon ke bɔwùmni dìn, Màrì nyě wai ke Màdàlà yè mbyi mbyù' Yesù. À bèn, à yen le ŋgwò' ne be dɔwɔke ŋwum mbyù' Yesù lè nun, à bà tî. ²À fyòn be lè mèli, à kèn Sìmôn Piêr cinni bon lè mwesò' nyě mbo' nyě Yesù yile ñzwɔ', à shè lè bon le: «Be shelà dɔwɔn Nyeli nyè' ke mbyù' nun. Bwi' limmi kan cìcì se be ken nun kě nun.» ³Piêr bon lè mwesò' nyě mbo', be ywɔ' li, be yè mbyi mbyù' Yesù. ⁴Be be yanni, bon bì hwæn, son, mwesò' nyě mbo' ni yanne mbyìmmi à làn Piêr. Nun ne seti bèn ke mbyù' nun. ⁵À swòsò' mwù ke mbyù' nun bǎ nun ceò' ke nlim. À suku' mè fyà' kwokwo yenni be nlim dìn, son, ǎ dún kan. ⁶Ke nyè yon, Sìmôn Piêr bèn ku', à dúɔn làn nyon ke mbyù' nun, à yen mè fyà' kwokwo kwe ŋgyɔ', ⁷à kònddì tì ku' swum plè she be bɔwile ŋwum Yesù nun yenni. Swum plè màzwùm be kǎn fyinnɔa lè mè fyà' kwokwo mban, son, se be làn nyon pɛdìn hweli. ⁸Li, mwesò' Yesù nyě sete bèn ke mbyù' nun dún ku' làn nyon kwe. À yen ywum màzwùm, à limmi le Yesù ni bà tî. ⁹(Be lè bɔwesò' Yesù ywɔtì kife' swum se be kœ ke dèwǎ Mvènnswæb nun le Yesù ywìme ywi yimni.) ¹⁰Ke nyě yi, bɔwesò' Yesù bì bi fyoin be dɔwɔn nyan.

M̄bwùmni ye Yesù ßwùmne ke swi' Mârî nyě wai ke Mādâlâ
(Mr. 16.9-11)

¹¹Mârî fyòin tì be, à kìn ðyi ke moan mbyû' lè à tã kwe. Kwan se nun be kwe, à swòsò' mwù ke mbyû' nun lè à tã cèò' ke nlim. ¹²À ceme li, à yen mè cikpu' Mvènnswæb bon bí, lè mè plè pwibboa ke nywi, be toen ke cìcì se be nonnze Yesù nun, nyě m̀bò' tòn ke lwùmmò' se mwù be kwe, nyě m̀bò' tòn ku' ke me kwù. ¹³Mè cikpu' Mvènnswæb bi yen Mârî, be cibbi lè nun le: «Dyim mè yib, yen se wù tã kwe nun?» À fyònnzì lè bon le: «Be shelâ ðwon Nyeli nyèm, m̀n limmi kan cìcì se be ken nun kèò' nun.»

¹⁴Ke nyě ye nun lele ñzæ' le' ni, à wasi mwù, à ce be nyè yon, à yen mwum ndò', à ni ñfyi. Yesù ne be, son, Mârî limmi kan le nun ne. ¹⁵Yesù cibbi lè nun le: «Dyim mè yib, yen se wù tã kwe nun? Wen ne wù tã kæb?» Ke ncibbi yi nun, Mârî be ßàkà' le ci-mpwebsi ndem ni ne. Li, à shè lè nun le: «Mwumɲkæm, ßeshe wù ne sheli ðwon Nyeli nyèm, shè mun cìcì se wù kèn son ké nun, ßã m̀n ken son sheli.» ¹⁶Kwan se nun lèli hwæn, Yesù lon nun ke jin shon nun. À ywome li, à limmi nun, à lon nun ke le' me Èbrù nun le Ràbùnì. (Sù nlon màzwùm ni le ñlisà'.) ¹⁷Yesù shè lè nun le: «Ba wù yìnnì m̀n, ntwi' se m̀n nàn kife' ðeb ke cí Ce nyèm. Son, kènne, wù shè mè ɲgyinni ßyèm le m̀n nànme ke cí Ce nyèm nyě ðyi ku' Ce nyin, m̀n kènme ke cè Mvènnswæb nyèm nyě ðyi ku' Mvènnswæb nyin.»

¹⁸Ke fya' zwem ñnywën, Mârî wa', à kèn ßwesò' Yesù shě le: «M̀n yennâ Nyeli nyè'.» À leme li, à ðunmi bon swum se Yesù shì nun sùlea.

M̄bwùmni ye Yesù ßwùmne ke swi' ßwesò' byon
(Mt. 28.16-20; Mr. 16.14-18; Lk. 24.36-49)

¹⁹Kwæbbi fò' màzwùm, ßwesò' Yesù be swòli ke nye m̀bò' nun nyě be ñtwòkea lè mè kyî, ntwi' se bon be mè ci-zwi' me Yudà yi nun. Yesù kwan ke nyinnim shan nun, à ðyi, à shè lè bon le: «Flòa be lè byin.» ²⁰Ke nyè ye nun lele ñzæ' le' yi, à ðunmi bon mè ßàn me mbyimmò' lisea ke me fyà' byon, à lisà' tì ku' bon pwu shon. Ke nyen ye ßwesò' byon yenni Nyeli nyan, ñlim lwinni bon lè ñdàli. ²¹Yesù kònnì tì lò' bon shě be le: «Flòa be lè byin. M̀bòki ne Ce nyèm fyii m̀n, m̀n ku', m̀n tà ku' byin fyi.» ²²À leme li, à hwummi bon m̀pùn nywi, à shè lè bon le: «Yèèni M̀pùn Nsanmi. ²³Bwum bye byin ye shè le ßyebbi nyan ti ðyě ñzùsi, lè à ti ku' ñzùsi, leɲkæm. Bwum bye byin ye byinnò' le ßyebbi nyan ßã be ñzùsi, lè à ßà ku' be ñzùsi, leɲkæm.»

Yesù bon lè Tòmasi

²⁴Tòmasi nyě be be lon le mwen fæ' be kăn ke nyinnim ßwulu ßwesò' Yesù nun kwan se Yesù ßwùmne bon ke swi'. ²⁵Bwùlu ðunmi nun shě

le: «Bwi' yennâ bwi' Nyeli nyé!» Son, Tòmasi fyònnzi lè bon le: «Mun shì mè bàn mè mbyimmɔ' yenni ke me fyà' byon nun, mùn yìnnɔ' yon lè fyà' yêm, mùn kè ti ku' fyà' ke pwu shon nun, mùn bã yili le leŋkàm se.»

²⁶ Sonndè làn be mbɔ', bwesɔ' Yesù be ti swɔli ke nàm nun. Kàmmí màzwùm, Tòmasi be ðyě kwe lè bon. Mè ħwum nye hwæn be ñtwòkea lè mè kyí. Kwo fe' li, Yesù kwan ke nyinnim shan nun, à shè lè bon le: «Flɔa be lè byin.» ²⁷ Ke nyě yi, à ce Tòmasi me', à shè lè nun le: «Nànnɔ' fyà' ywú, wù yìnnɔ' mè bàn mè mbyimmɔ', kènnzì ti ku' fyà' ywú, wù bweb pwu shêm. Kyìli lè ħkwùm ħgyi, son, yili le leŋkàm se, mùn yìnnâ ywi.» ²⁸ Tòmasi ywɔme li, à shè le: «Wù ne ðyi Nyeli nyèm, wù be ti Mvènnswæb nyèm.» ²⁹ Yesù shè lè nun le: «Wù le' li ntwi' se wù yennâ mùn, son se wu yili le leŋkàm se. Tõn lwen si lè bwum bye ta yili le leŋkàm se, shìki be yen mùn.»

Mwũ ħkɔ' ðewà ton se

³⁰ Yesù kònnɔ' ti yì hilea cí mèan ke swi' bwesɔ' byon, ye mùn kɔ' kan ke ðewà ton se nun. ³¹ Son, ywum ye ðyi ke ðewà se nun, mùn kɔ' yon bã byin limmì le Yesù ni **Kristò**, mwum ne Mvènnswæb fyii, à be ti ku' Mwen Mvènnswæb. Li, ke nyě ñlimmí màzwùm, byin cinni ñzison ke nyě yon.

M̀bwùmni ye Yesù bwùmne ke swi' bwesɔ' shanmbi byon ndɔ'

21 ¹ ħgyin ndɔ' lan be kwæ' le, Yesù kònnɔ' ti bwùmni ke swi' bwesɔ' byon ndɔ' ke moan swùm se be be lon Tìbèriâ'. Ywɔèni fe' ñbòki ne se lannze. ² Nywɔ' màzwùm, bwesɔ' Yesù ndɔ' be swɔli ke cici fɔ'. Bye be kwe be le: Simôn Piêr, Tòmasi nyě be be lon le mwen fæ', Nàtànâël nyě wai ke Kanà ke ħgyɔ' Gàlilè nun, bwen Zèbèdè, kònnɔ' lè bwesɔ' Yesù bì ndɔ' ti. ³ Simôn Piêr ðyi, à shè lè bwùlu le: «Mùn kènme mvinjan swí.» Be fyonnzi lè nun le: «Bwi' ku', bwi' kenme bwi' lè byin.» Be wa' kèn, be nan ke ci' nun. Kpòn màzwùm làn ðin, be bæen kan swum ndɔ'. ⁴ Kwan se be lè nywɔ' ti bwùmni nùn, Yesù kwan kwe ke moan swùm, son, bwesɔ' byon limmì kan le nun ne. ⁵ À kà cibbi lè bon le: «Mè swùkà, byin bænnâ ħgishì?» Be fyonnzi lè nun le: «Bwi' bæen kan bwi' swum ndɔ'!» ⁶ Yesù shè lè bon le: «Dwièni mvinjan ke fya' ji. Li, byin ye ħgishì bæenni.» Be yonnì ke fya' ji zwem, be swi yì mvinjan ðu'. Be swime li, mvinjan lwìn lè ħgishì, be wòli kan kim be te' yon, be kwannzi yon kyɔ'. ⁷ Mwesɔ' nyě Yesù yili ñzwɔ' shè lè Piêr le: «Nyeli nyé' ne.» Simôn Piêr ywɔme she nun le' le: «Nyeli nyé' ne», à swì plè nyon nywi, ntwi' se be lè à ti nywi pwìn. À swime nun, à pyì ħgwɔ'. ⁸ Bwesɔ' bye fɔ' kin be lè cì', lè be ta mvinjan se lwinnâ lè ħgishì si tɛli. Be be kãn læbbi lè ħgonni ðu'. Læb læbbi be làn mè metâ ndu'. ⁹ Kwan se bon kwan ci' nun, be yen ðankyi ndɔ' kwe lè ħgishì ke zwem satea, brê' ndɔ' be ti ku' kwe. ¹⁰ Yesù shè lè bon le: «Fièni fe' mùn ħgishì ndɔ' ke nyinnim ye byin bæenni jene yi nun.» ¹¹ Simôn Piêr nân ke ci' nun, à tɛli mvinjan se be ñlwinni lè ħgishì klwòkea si kyɔ'. ħgishì ye be ke mvinjan be ħgishì ndu' lè mwùm shæn

blàn lê. Kwo fe' she ñgishì be nlim mèan si, mvinjan yàeta' kan. ¹² Yesù shè lè bon le: «Kiènni, byin ji ji.» Kwo fe' she nun le' li si, mwesò' nyon ndò' lwùm kan nun cibbi le: «Wen ne ku' wù?» Ntwi' se bon limmi le Nyeli nyan ne. ¹³ Yesù senndi ke ke shan, à sheli bré', à feka' bon, à kònni tì ku' bon ñgishì fèkea.

¹⁴ Ñdikà' kwan se Yesù yimne ywi, kàmmi me nlè se, she nun lisa' nun ne' lè bwesò' byon.

Yesù bon lè Simôn Piêr

¹⁵ Ke nyé ye bon ji ji hwæn, Yesù cibbi lè Simôn Piêr le: «Simôn, mwen Jân, wù yili mun a lan mbòkì ne bye lè bwum ta mun yili?» Simôn Piêr fyònnzi lè nun le: «Nyeli nyèm, wù limmi le mún yili wu.» Yesù ká shé lè nun le: «Bòn bwen me pò' byèm.» ¹⁶ Yesù kònni tì nun cibbi be ke kàmmi me mfi nun le: «Simôn, mwen Jân, wù yili mun?» Simôn Piêr fyònnzi lè nun le: «Nyeli nyèm, wù limmi lwen le mún yili wu.» Yesù shè lè nun le: «Bòn mè pò' byèm.» ¹⁷ Ke kàmmi me nlè nun, Yesù kònni nun cibbi le: «Simôn, mwen Jân, wù yili mun?» Ñgu kwan Piêr ke swi' kwan se Yesù cibbi tí nun ke kàmmi she me nlè nun le: «Wù yili mun?» Li, à fyònnzi lè nun le: «Nyeli nyèm, wù limmi ywum hwæn pæ', wù limmi seansean le mún yili wu.» Yesù shè lè nun le: «Bòn mè pò' byèm.» ¹⁸ Mún tà wu shé lè lenkæm le, kwan se wù be mbipân, wù be ñkænndan kpæmmi ke ñkwù' lè wú ne', wù kèn ke cìcì se wù yili, son, kwan se wù yé ywìn, wù yé su' mè fyà' yili òn, mwum òn ndò' kin wù ñkænndan kpæmmi, à kènnzi wù ke cìcì se wù yili kan kèn.» ¹⁹ (Ke nzæ' le' ye nun, Yesù be mbòkì ywi ne Simôn Piêr yé ywi shé, lè nun lisa' ñtwu Mvènnswæb ke ywi nyon nun.) Be nyé yi, Yesù shè lè nun le: «Dwoin mún ke nyè.»

Yesù bon lè mwesò' nyé nun yile ñzwò'

²⁰ Simôn Piêr yònnzi me' be, à yen mwesò' nyé Yesù yile ñzwò' lè à tá kìn. (Nun màzwùm ne nonme Yesù ke nywi kwan se be be ji ji, à cibbi lè nun le: «Nyeli nyèm, yà mwum ne ye wù kyí?») ²¹ Piêr yenme nun li, à cibbi lè Yesù le: «Nyeli nyèm, ti ku' nun, yá swum se ye nun bènni nywi?» ²² Yesù fyònnzi lè nun le: «A mún yili le à ton lè me' han a kiin bèn kwan se mún ywìme fyònni, yen se nywi kwenna' wu nun? Ti lè wù, òwain mún ke nyè.» ²³ Bòbo ònmi yòn ke nyinnim bwesò' bye fò' nun le mwesò' Yesù màzwùm bá ywi. Kànmbè', Yesù shèe kán le nyí ni bá ywi, à suku' shèe le: «Beshe mún yili le à ton lè me' han a kiin bèn kwan se mún ywìme fyònni, yen se nywi kwenna' wu nun?»

²⁴ Mwesò' Yesù mbò' màzwùm ne òyi shitàkwù ke nywi ywum màzwùm, à kò' tì yon ke òwà nun. Bwi' limmi le shitàkwù se nun tá òyi, à si lenkæm.

Mmlàkà' nzæ' le'

²⁵ Ywum ye Yesù cìe lè á ywi kife' yi mèan. Be kòe yon ke yi òwà nun mbò'-mbò', mún bàkà' le ñgyò' wan pwipwèè lè yì òwà màzwùm.